

**SIXTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR TWELFTH SITTING ON WEDNESDAY, THE 1st AUGUST, 2012
(Time 10:30 AM to 1:00 PM and 2:00 PM to 4:00 PM)

QUESTIONS

1. *Questions* entered in separate list to be asked and oral answers given.

PRIVATE MEMBERS' BUSINESS

2. * Resolutions

NGURTHANZUALA
Secretary

* Please see Bulletin Part-II No. 225, SI No. 1-10 dated the 25th July, 2012 for relative precedence of Private Members' Resolution to be moved.

SPEAKER : Mi zawng zawng hnenah pek tur apiang pe rawh u; leiman pekna tura hnenah chuan leiman pe ula; chhiah chawina tura hnenah chuan chhiah chawi ula; tih tura chu tih ula; pawisak tura chu pawisa rawh u. (Rom 13:7)

Starred Question No.201-na zawt turin Member zahawm takte Pu K. Liantlinga leh Pu Lalduhoma an ni a, Pu Lalduhoma hi sawm mai ilangin. (Member : Tihsual a ni lo maw) Kan staff-ten an lo tisual a, Pu K. Lalrinthanga leh Pu Lalrobiaka maw. Heta guide a min chhawp hi kan lo tisual hlauh a ni, min ngaidam rawh u. Starred Question No. 201-na Pu K. Lalrinthanga leh Pu Lalrobiaka te an ni a, Pu K. Lalrinthanga hming hi ziak hmasak a ni a, Pu K. Lalrinthanga kan lo ko ang a, han zawt sela.

Pu K. LALRINTHANGA : Pu Speaker, ka lawm e. Minister zahawm tak Social Welfare Department changtu chhan atana ka zawhna chu :-

- (a) Tar pension hi monthly-in pek theih a ni tawh em?
- (b) Tun dinhmunah hian Old Age Pension engzatin nge dawng?
- (c) Engvanga an dawn hi inzat lo nge anih?
- (d) Hmeithai chhawmdawlina engzatnge pek anih? tih a ni e.

SPEAKER : A chhang turin a changtu Minister zahawm tak Pu P.C. Lalthanliana ilo ko ang.

Pu P.C. LALTHANLIANA, MINISTER : Pu Speaker, Member zahawm tak takte Pu K. Lalrinthanga leh Pu Lalrobiaka te zawhna chhanna chu hetiang hi a ni –

- (a) Pek theih ala ni rih lova. A chhan chu thlatinin Central atang chuan tunhnai chhoah hi chuan kan han hmu tak naa, sanction han dil leh dawn hian a list hi upa lam pension thi te an lo awm a, up-to-date deuh te alo ngai a project tin atangin. Khatiangte han tihkhawm khan hun hi a la thin a. Tunah hian March thla thleng hi chu pek vek a ni tawh a Mizoramah, June thla thleng hi sanction kan hmu tawh nghe nghe a. Amaherawhchu a rang thei anga pek dan te pawh sorkarin a ngaihtuah zel a ni.
- (b) Mi 26,359 in an dawng mek a, heng zing a 23505 te hian Rs. 250 in an dawng a. Mi 2854 te hian Rs. 550 in thlatin an dawng a ni.
- (c) Kum inan loh vang a ni. (Kum 80 chung lamin Central atangin Rs. 500/- p.m. leh State atangin Rs. 50/- p.m. an dawng a. Kum 80 hnuai lamin Central atangin Rs. 200/- p.m. leh State atangin Rs. 50/- p.m., a ni)
- (d) Hmeithai chhawmdawlina pension hi IGMWPS scheme hnuaiyah 891 hnenah thlatin Rs. 200 in pek thin a ni, tih hi a chhanna a ni e, Pu Speaker.

*Speech not corrected

SPEAKER : Zawhbelhna Pu Lalrobiaka kan tihmasa ang a, chutah Pu K. Lalrinthanga.

Pu LALROBIAKA : Pu Speaker, ka lawm e. Kan hming chhiar lo khan ZNP kha i duhsak viau mai thinin ka hria a, Pu Duhoma te in lam hmasa tlat mai thin kha, engnge ni chhan a awm deuh emaw ni chu aw ka ti deuh a ni. Ruling mai tur Ni chhuak lo lang mai turah khan in dah deuh emaw chu aw kan ti deuh a. Ka zawhbelhna chu Pu Speaker,

- (a) Hmeithai pasal thihsan chhungte tan chuan Social Welfare atang hian eizawngtu berawm ta lo National Scheme kha a awm niin ka hria a. Khangah khan engzat nge kan pek?
- (b) Tin, pahnhnaah chuan Hearing Aid leh Wheelchair, tin tar tiang kan han tih leh a tar chiah lo engemaw chetsualna avanga tiang ang chi kha tunlai hian sem ala ni em? tih kha ka zawhbelhna a ni e.

*Speech not corrected

SPEAKER : Zawhbelhna bawk Pu K. Lalrinthanga.

Pu K. LALRINTHANGA : Pu Speaker, ka zawhbelhna chu kum upa tawh, chawmtu neilo dinhmun harsa tak te, hmeithai dinhmun harsa takte tanpuina Social Welfare lam atanga an pek thin hi Bial chhung mi recommend ngai an awm ve thin a. Amaherawhchu, pek laklawh lai te bak hi chu hma a sawn hleithei lova. Sanction pek belh kan nih loh chuan tih te a ni thin a. Chutiangte a nih avang chuan recommend han siam hun tur hi kan hre thei lo hle mai a. Eng hunah nge recommend kan siam ang. Khang tanpui ngai nia kan hriat kha, an lo dawngsawng lawk thei mai nge ni? tih kha han hriatchian ka duh a, ka zawt e.

SPEAKER : Chhang turin a changtu Minister i lo ko ang.

Pu P.C. LALTHANLIANA, MINISTER : Pu Speaker, Member zahawm tak Pu Lalrobiaka zawhbelhna, Hmeithaite hamthatna chungchanga a rawn zawhbelhna kha ka'n chhang hmasa ang a. Kum 18 leh kum 64 inkar pasalten an thihsante tanpuina hi National Family Benefit Scheme hnuaiah Rs. 10,000/- in kan pe thin a. Chu chu kumtinin a tlangpuiin mi 614 te pek thin a ni a. Chung ang thlan chungchangah chuan District tinah D.C Chairman-na hnuaiah District Committee din a ni a. Tahchuan, MLA te pawh member-ah an tel deuh zel a, a district area amite kha. Chungte chuan dilna tling khawm atangin District tina allotment zat atang khan heng ang dawng tur eizawngtu ber thi-a hmeithai ta, kum 18 atanga 64 inkar te hi Rs. 10,000/- dawng turin an thlang thin a ni tih kha ka han chhan theihna ni sela.

Tin, hearing aid hi kum 2009 leh 2010 ah Alimco atangin Ministry of Social Justice & Empowerment, Ministry atangin Alimco kaltlangin a tlawm thei ang berin min lei tir a, chutah chuan 140 kan lei a, tunah hian kan sem zo thawkhat tawh a. Tunah hian lei a la awm leh rih lova. Tunah tak hi chuan sem tur hi kan nei hran lova. Chutiang chu kan dinhmun a ni a. Tin, Tar tiang te pawh, Alimco kaltlang hian eng eng emaw pek, disabled an ni emaw, tar tan te khatiang kha a awm ve thin a. A lo kal chang hi chuan kan han pe ve thin a. Chutiang chu, kan tihdan a ni a. Hearing Aid tak hi chu tun dinhmunah hi chuan kan nei rih lo a ni.

Tin, wheel chair hi Alimco atangin kan dawng bawk a. Chu chu a dawng tlak leh a dawng thei awm turte tan a awlsamna turin District tinah CDPO Office ah te pek an ni a. Doctor lehkha te a awm a, khatiang mamawh leh nei tlak an nih chuan, chung dilna te nen chuan kan neih lai a nih hi chuan an dil a, an lo pe ve thin a. Ka hriatsual loh chuan tun dinhmunah hian kan la nei mai thei hlawm a ni. Tin, Alimco-in NGO te kaltlanga an rawn

tihnaah Spastic Society te pawh engemaw zat anrawn pe a. Chungte kaltlang chuan sem an ni bawk thin tih kha ka'n sawi duh a.

Tin, Member zahawm tak Pu K. Lalrinthanga zawhbelhna Tar pension te hi a dawng awm tak dawnglo hi a awm theih khawp a. Chung ang MLA ten kan ngaih pawimawh hi engtia thun tur nge ni ang tih ang chi kha. A ni khawp mai, recommend hun tur tak hi a hriatthiam theih loh a. Upa lam an ni a, thi ve reng an ni a. Chutiang chu, an lo thih khan report a lut a, thlak leh mai tur kha a ni a. Tahchuan, MLA te pawhin kan ngaih pawimawh tak tak te chu CDPO tinah hian hei hi a remchang hmasa berah min lo ngaih pawimawh sak ula tiin ziak a dah te pawh ni sela. Chungte pawh chu kan CDPO ten remchang hmasa bera lo ngaih pawimawh a, lo honour thin an tum dawn nia tih kha Member zahawm tak zawhna ka'n chhan theih dan a ni e. Ka lawm e.

*Speech not corrected

SPEAKER : Zawhna No. 202-na pawh hi Member zahawm tak te Dr. R. Lalthangliana leh Pu P.P. Thawla te zawhna intawm a ni a. Tunah Dr. R. Lalthangliana zawt turin i lo ko ang.

Dr. R. LALTHANGLIANA : Pu Speaker, a changtu tak Minister-te an awm lova, amaherawhchu, ka'n zawt tho ang a. Demand-ah te pawh kan sawi nual tawh a. Starred Question No.202-na –

- (a) MNF Ministry-in Cabinet thutlukna siama Transport Department Re-structure tura alo tih tawh kha tihpuitlin tumna tuna Sorkar hian a nei em?
- (b) Kum 2009-a Transport Department Re-structuring tura order chhuah tawh, kum 2010-a cancel leh tak kha tunah engtinng a kal dan?
- (c) Mizoram State Transport inenkawl dan tur ruahmanna thar a awm leh tawh em?
- (d) Saiha, Lawngtlai leh Lungleiah te hian Station Superintendent an awm (function) tawh dawn lo em ni? tih ka zawt e.

*Speech not corrected

SPEAKER : A chhang turin a changtu Minister Pu P.C. Zoram Sangliana hi a zin a, a awm lova. Tichuan, Minister zahawm tak Pu J.H. Rothuama a hlan a. Tunah Pu J.H. Rothuama'n chhang rawh se.

Pu J.H. ROTHUAMA, MINISTER : Pu Speaker, kan member zahawm tak zawhna chhanna chu hetiang hi a ni e :-

- (a) Tihpuitlin tum a ni a, tunah hian hmalak mek zel a ni e.
- (b) Transport Department Re-structuring tura order chhuah tawh kum 2010-a cancel leh tak kha ruahman tawh ang a thil tul hmaih palhte siam thaa kalpui zel hi Sorkar tum a ni e.
- (c) Re-structuring tura rawtna Sorkara kal mek ngaihchan rih a ni e.
- (d) Staff indaih dan zir chianga ngaihtuah mek a ni a. Department kalphung siamfel (Re-structuring) hnuah tihchian theih a ni ang.

*Speech not corrected

SPEAKER : Zawhbelhna kan la lo mai ang a. Tunah Starred Question No.203-na zawt turin Dr. R. Lalthangliana i lo ko ang.

Dr. R. LALTHANGLIANA : Hei pawh hi Pu Speaker, tuna mi ang chi deuh bawk kha a ni a. A changtu tak hi a awmlh avangin kan zawt reng reng ange. Starred Question No.203-na – New Secretariat leh hemi area chhunga sorkar hnathawkte tan hian an kalna tur Bus leh thil dang ruahman sak an ni ta em? tih ka zawt e.

*Speech not corrected

SPEAKER : A chhang turin Minister zahawm tak Pu J.H. Rothuama i lo ko ang.

Pu J.H. ROTHUAMA, MINISTER : Member zahawm tak zawhna kha – New Secretariat leh hemi area chhunga sorkar hnathawkte tan hian an kalna tur Bus leh thil dang ruahman sak an ni ta em? tih a ni a.

A chhanna chu – State Transport Authority (STA) in ni 18.11.2011-a a rel angin kumin 2012 kumtir atangin New Secretariat Complex-a sorkar hnathawkte tan City Bus tlantir a ni a, chu chu engemaw chen hnuah Bus neituten an tawp san ta a, Stop-gap arrangement atan M.S.T. Bus tlan tir mek a ni.

*Speech not corrected

SPEAKER : Le, zawhbelhna kan la lovang a, zawhna No.204-na zawt turin member zahawm tak Pu C. Ramhluna i lo ko ang.

Pu C. RAMHLUNA : Pu Speaker, zawhbelhna awmlh turin min chhang thei se ka duh a. Hmanni khan Demand sawinaah kan sawi tawh a hei hi. Amah ngeiin min assure tawh thin kha a ni a. Assurance Committee pawhin hei hi a take-up a. A ngaipawimawh viau va.

- (a) Vety Farm, Mampui, Lawngtlai district chhunga mi hi LADC-ah hlan tumna a awm em?
- (b) Awm nise, engtikahnge hlan a nih ang?
- (c) Ar note awpkeuna (incubator) chhe reng mai hi engtikah nge siamthat theih a nih ang? tih hi Animal Husbandry & Vety Department Minister zahawm tak chhan atan ka rawn zawt a ni e. Chiang kuang deuh hlekin min chhang thei sela, ka zawt nawn lo mai ang e.

SPEAKER : Chhang turin a changtu Minister zahawm tak Pu Nihar Kanti i lo ko ang.

Pu NIHAR KANTI, MINISTER : Pu Speaker, member zahawm tak, Pu C. Ramhluna zawhna chhanna chu –

- (a) Lak tumna awm e.

- (b) Lak a nih hun chu a sawi theih loh a ni.
- (c) Khawl tharin kan thlak dawn a ni.

SPEAKER : Le, zawhbelhna a awm lova. Thil la inmung mek a nih ber chu. Zawnna 205-na zawt turin member zahawm tak, Pu K. Liantlinga i lo ko ang.

Pu K. LIANTLINGA : Pu Speaker, ka lawm e. Environment & Forest Minister zahawm tak chhan atan. Ka zawnna Starred Question No. 205-na, Assembly Resolution passed tawh “Riverine forest reserve hi highland area-a sawn ni rawh se” tih kha eng chen nge a kal tawh min hrilh thei em?

SPEAKER : Chhang turin a changtu Minister zahawm tak, Pu H. Rohluna i lo ko ang.

Pu H. ROHLUNA, MINISTER : Pu Speaker, member zahawm tak, Pu K. Liantlinga Starred Question chhanna chu, Riverine Reserved Forest hi Highland-ah sawn ni rawh se ti a Mizoram Legislative Assembly in Resolution a lo passed tawh chungchanga Sorkar hmalak tawh dan chu hetiang hi ni:-

1. Hon’ble Minister, Environment & Forests hovin Environment & Forest Department hnuaiia Senior Officer-te chuan Dt. 4.7.2011 khan meeting hmasa ber an nei.
2. Dt. 4.7.2011 a meeting-in a rel angin Ministers zahawm takte, Land Revenue & Settlement enkawltu, Environment & Forest department enkawltu leh Local Administration Department enkawltute nen joint meeting neih leh a ni a. He meeting-in a rel angin State Level Committee chu Notification No. B.11020/4/2009-FST, Dt.9.2.2012 hmangin din a ni. State Level Committee chuan Dt. 29.3.2012 khan Chief Secretary kaihhruaina hnuaiiah meeting a nei a. He meeting hian District tina Deputy Commissioner Chairman-na hnuaiiah District Level Committee a din a, Notification No.B.11020/6/20110-FST Dt.14.5.2012 angin. District Level Committee te hi anmahni district chhungah hetiang hma la tura ngen an ni.
 - (i) Riverine Reserve Forest chhunga Settlement area zau zawng chhinchhiah.
 - (ii) Revenue pass neia thlai chin nan ram hman mek zau zawng chhinchhiah.
 - (iii) Forest Reserve chhunga thlai chin nana ram thalai chhinchhiah.
 - (iv) Forest Reserve pawn, ram chhengchhia ramngaw awmna ni si, Riverine Reserve Forest area nena inthlang tura remchang lo chhinchhiah.

Heng zawng zawng tih zawh hma chuan Revenue Department in pass thar a pechuak lovang a. District Level Committee te hian an tih tur hi thla 6 chhunga zo hman tura beisei an ni. Review Meeting hi thla 3 hnua neih leh tura tih a ni. Tunah hian thla 3 chu a ral ta a, Review Meeting hi nei tura rawt mek a ni, tih a ni.

SPEAKER : Zawhbelhna, Pu K. Liantlinga, a dawtah Pu Lalduhoma.

Pu K. LIANTLINGA : Pu Speaker, a lawmawm hle mai a, kha. Assembly Resolution, kan Minister zahawm takin khatieng chena a bawhzui kha a lawmawm

hle in ka hria a. Tin, a area-te khatianga chhutchhuah kha a pawimawh hle a. Tin, hmanna kan PHE Minister pawhin a sawi kha, ‘kan tui lakna hnar a kang tawh a ni’, a ti a ni. A chhan chu hemi tlang rama sawn khan ground water recharging te pawh awm thei tur a ni a. Anih leh Central-ah hianin engemaw hriattirna emaw sawipuina emaw, a thu leh hla la pumhlum chiahlo mahsela in nei tawh em tih te, Central nena din tur Joint Verification kan ti nge ni, khatiang ang chi kha din turte a ni angem? tih lai kha Pu Speaker ka’n zawhbelh a ni e, ka lawm e.

SPEAKER : Pu Lalduhoma.

Pu LALDUHOMA : Pu Speaker, kan resolution passed tawh zingah bawhzui chak pawl tak niin ka hria a kei pawn, lawmthu ka sawi duh a. Ka’n zawh duh chu hemi kan reverine forest reserve km chanve, “either side of the river” han tih hi “both sides” tiin kan kalpui chhova, kan interpretation a inang lova. Hemi chhungah hian mimal ram nei tam tak an awm si a, tichuan, hei sorkarin land acquisition sorkar pawimawh atan an tih dawnin khang ram neitu mimal hnenah khan compensate an pek a ngai a, kha ramah baww khan Forest Department hianin an rawn claim ve leh ta zel si a, heng Mualkhangah te pawh a tira Kolasib D.C. ina assessment a siam lai chuan P & E department chuan engmah an rawn sawi lova, direct-in khu lampangah an lo claim ve mai a, nuai 15 chuang pek tura tih an lo ni ve leh a, a ram thuhmunah khan, mimalin compensate dawng baww, Forest Department-in dawng baww ang hian a kal a kal ta a, a kal zel dawnin a lang a, hei hi kan problem lian tak ni thei a ni a. Hei rail kawngte pawh a rawn chhuak zel dawn a, helai hi engtinngge sorkar hian chinfel a tum a, double hian an claim chho zel dawn tihna em ni dawn, tihfel dan deuh policy siam tumna a awm em tih ka zawt duh a ni.

SPEAKER : Awle, a chhang turin a changtu Minister lo ko ang.

Pu H. ROHLUNA, MINISTER : Pu Speaker, zawhna neituin a zawhbelhna kha, Central lamah hi chuan a hranpain kan la thlen chiah lova. A chhan chu nichina District level Committee-in hmalak dan tur a tih, ram settlement area zau zawng chhinchhiah te, tin, revenue pass nei, thlai chin nana ram hman mek zau zawng chhinchhiah tihte tin, Forest Reserve chhunga thlai chin nana ram thalai chhinchhiah tih kha an han zawh fel hma hi chuan Central lama zuk thlen ngawt khan awmzia ala nei rih lova, a chhan chu a area inthlakthleng lai tur, keimahni lamah pawh Chiang lova khatianga thil kan zuk thlen ngawt khan awmzia a nei chiah lova. Amaherawhchu, 2009 hemi resolution kan tih hmaa Forest Minister, all India-a State hrang hranga mite Union Minister hova meeting kan neih a ka thusawinaah chuan ka lo telh daih tawh a ni. Chuan Central Ministry-ah hma min lakpui turin ngenna kan lo thlen daih tawh a, amaherawhchu, chumi hnuah Member zahawm takin resolution a rawn putlul House-ah kan passed ta a ni, chumi zulzui chuan department leh State sorkarin hma a la mek a, statistics hi rawn Chiang deuh phawt sela, Ministry of Environment & Forest lamah kan umzui anga a theih ang angin, hei hi hma kan la zui dawn a ni. Amaherawhchu, district level-in an tih tur kha rawn ti phawt se tih kha kan ngaihchan chu a ni.

Tichuan, Member zahawm tak Pu Lalduhoma zawhna, reverine reserve forest-ah hian encroachment hi a nasa em em mai a, hei hi tunah a department ang pawhin kan buaipui khawp mai a. Lehlamah chuan nia, khulai Mualkhangah te leh hmun dang dangah te pawh reverine reserve forest chhungah hianin harsatna hi kan tawh a ni. Khulai Mualkhang chungchangah te pawh khuan 2007 ni tain ka hria a, ka hriatsual loh chuan sorkar hmasa khan LSC a lo pe a, reverine reserve forest a ni tih kha chu an hai bik hauhin ka ring lova, mahselangin LSC an lo pe tlat mai a ni, chu chu wawiina min ti khawlhkhamtu leh harsatna min siamtu chu a ni a. Lehlamah chuan Forest Conservation Act, 1980 zulzuiin Forest Department hi a kal lo thei lova. Tin, Mualkhang chungchang bik chu han sawi leh ta ila. A bottling plant bun anih dawn khan forest clearance an lo la tlat mai a ni. Chuvang chuan forest clearance khatia precedence lo awm tawh wawiinah hian ti leh lo ta ila a adjacent ramah harsatna a awm thei dawn a, chuvang chuan tih loh theih loh a ni a. Chuvangin reserve forest chhunga forest clearance kan lak kha sorkar leh Department ang pawhin tih ngei ngei tur thil anih avangin tih a ni a. Tin tuna encroachment awmte hi kan resolution ang khan hmalak zui zel theih anih chuan hei hi chu la chinfel theih dan awm turah kan ngai. Hei hi ka chhan theih dan a ni Pu Speaker.

SPEAKER : Zawhna 206-naah kan kal anga, mahse a zawttu Pu B. Lalhlengliana hi tukinah khan a lo kal ve a, mahse a hnar a thi leh vak mai a, a lo kal theilo a. Pu C. Ramhluna hi a aia pek a ni a, mahse kan kal kan rih phawt anga. Zawhna 207-na zawt turin member zahawm tak Pu T.T. Zothansanga i lo ko ang.

Pu T.T. ZOTHANSANGA : Pu Speaker, ka lawm e. Ka starred question no 207-na, Hon'ble Minister of Environment & Forest changtuin min chhan tura ka zawhna chu hei hi a ni. Mizoramah ramngaw engzat nge kan neih? tih a ni.

SPEAKER : A chhang turin a changtu Minister Pu H. Rohluna i lo ko ang.

Pu H. ROHLUNA, MINISTER : Pu Speaker, member zahawm tak Pu T.T. Zothansanga zawhna chhanna chu, ramngaw neih zat chu sq km-in a hnuai ami ang hi a ni :-

Very dense – sq km 134
Moderately dense forest – sq km 6521
Open forest – sq km 12855
A total chu 19240 a ni.

SPEAKER : Zawhbelhna zawt turin Pu T.T. Zothansanga.

Pu T.T. ZOTHANSANGA : Pu Speaker ka lawm e. Ramngaw kan nei tam lo khawp mai a, very dense forest phei chu kan nei tlem khawp mai. Thlawhna atanga en phei chuan tar sam ang deuh hi a ni a, a hnuailam kawlh hi a tam khop mai a, venhim hi a ngai khawp mai. Very dense forest-ah national park ang chi ho hi a telin kan ring a. Ka bial chhungah khian Murlen National Park kan nei ve a, tah khian MR 20 zet an awm a ni. Khimite dinhmun khi Pu Speaker ka zawhna pakhat nen khian a in relate tho a, han sawi tel hram ka duh a. “Murlen National Park Wildlife Guard te dinhmun siamthat tumna a awm

em?” tih ka zawt duh a. Pu Speaker i phalnain kum 2008 inthlan dawn tepah khan kan Mizoram sorkarin lehkha a chhuah a, i phalnain kan chhiar lawk ang e, “To the Range Officer, Murlen National Park, Subj. : MR te dinhmun (hei hi August ni 22 inthlan dawn tepa an lehkha chhuah a ni) Murlen National Park hnuaiiah hian MR engemaw zat hun rei tak thawk tawh te an awm a, PCCF thu angin Oct 2008 atang hian kum 10 aia tam thawk tawhte chu skill 2 leh kum 10 la thawk tlinglo te hi semi-skill a kalpui tum an ni. Thu leh awm hma chuan a chung category-ah hian an hlawh pawh pek phawt tum nise a tha ang” tih a ni a. Tun thlengin an dinhmun hi a la ngai reng mai a. Hei hi inthlan dawna skill tam tak an upgrade-na, anni dinhmuna mi rilru han tihthawh uaina boruak kha a ni ang nge ka hre chiah lova. Engpawh nise, an dinhmun hi a chhe khawp mai a. Tunah hian kum 20 chhung thawk tawh mi 6 an awm a, tin kum 15 chhung thawk tawh mi 9 zet an awm a, a ngai hlin hlawh an la la a ni. An dinhmun hi siamthat a tha khawpin ka hria a, unskilled vekin kum 20 chhung an awm tawh a ni a, an dinhmun hi kan sorkar hian siamrem tumna a nei em? Helaia a tarlan ang hian PCCF thu ang tho kha a ni mai si a, a dan leh kaihhraina danah hi chuan a leng niin a hriat a, chuvangin chhungkaw 20 zet dinhmun chhe tawh tak mai khi engtin nge kan hotute hian skill a an level-puite chu an sang awk awk a ni si a, khalai an thu chhuah ang tho kha helaia mite hi an la bet reng mai si a, engtin nge tumna a awm em? An dinhmun siamthat tumna a awm anih chuan engtik atangin nge anih ang, tin, an vaiin mi 20 hi em ni ang tih kha ka zawt duh a. Tin, a awmlo anih chuan PCCF hian an kalphung a hre chiahlo em ni tih kha ka zawt duh a ni.

SPEAKER : Ama zawhna vek starred question no. 217-na ami kha a rawn zawt ta chu a ni. A chhang turin a changtu Minister zahawm tak i lo ko ang.

Pu H. ROHLUNA, MINISTER : Tun dinhmunah hi chuan Murlen National Park a wild life quard awmte dinhmun siam that tumna kan nei rih lova, tunah hian National park hnuaiiah hian mi 36-in wild life quard angin an thawk mek a, tichuan nikhata an hlawh kan pek theih hi Rs. 170, thlakhata Rs. 5100 hlawh ang an ni. Tichuan MR approved 22 an awm a, Park workers hi mi 6 an awm bawk a, chu chu central sponsored scheme hnuaiia awm an ni a. Tichuan 13th Finance Commission hnuai atangin fringe area amite involve-in ruai tel ta ila, tichuan a venhim kawngah pawh a tangkai zawk ange tiin mi pariat hi tunah hian chhawr mek an ni.

Kan ram ngaw neih chhun angte hi protected area te an ni tlangpui a, tunah hian sanctuaries te, National park te leh DTR leh safety reserved nei khaw tlem te kan la awm a, chung chu dense forests kan neih hi tunah hi chuan a ni rih mai a, rampum ang pawhin tan kan lak a ngai a ni.

SPEAKER : Chanchinbua ka lo hmuh danin an rama an LSC pek Revenue-in an ram pek khawm hi Mizoram aian a zau daih tawh an ti a, thil ni thei a ni ang aw ka ti a. Kan Aizawl khawpuia kan inhmun area hi teh ta vek mai ila, Mizoram dung leh vang kan teh ang khan han pawt parh ta ila Tuirial leh Tlawng hi chu a pha hrim hrim tawh dawnin kan ring a, chuvangin a surface-a teh khanin lo zau thei viau mai mahse boruaka teh kha chuan zimte si kha a ni a, Pu Zualan ram thuhruk kan ni a tih ang deuh khanin. Chuvangin condense forest, moderate forest tih te pawh hi han pawt kauh kauh ila chuanin boruak melah chuan hei ai hian a zim daih

kan ring a, chuvangin kan ram sq. km 21000 kan tih ai hian LSC ta vek ila Mizoram hi chu sq. km 50000 lai hi chu a tling mai awm e te ka tia ni.

Pu K. LIANTLINGA : Pu Speaker ka lawm e, Health & Family Welfare Minister zahawm tak chhan atan ka zawhna starred question 208-na - 3F Regulation hmanga Doctor 66 lakte hi Sorkarin dah ngheh tumna a nei lo hi dan kalh a ni em?

Pu R. LALZIRLANA, MINISTER : (Pu Lalrinliana Sailo a zin avangin Pu Lalzirliana a pe a ni). Pu Speaker ka lawm e, Pu K. Liantlinga zawhna chhanna chu - 3F Regulation hmanga Doctor 66 lakte hi Sorkarin dah ngheh tumna a nei lo hian Mizoram Health Services (MHS) rules 2009 a kalh lo.

*Speech not corrected

Pu JOHN SIAMKUNGA : Pu Speaker ka lawm e. Minister PHE Department changtu chhan atan. Starred question no.209-na, Greater Hnahthial Water Supply Scheme, Tuichang pump tum hi engtikah nge zawh tum a nih?

SPEAKER : A chhang turin a changtu Minister zahawm tak Pu S. Hiato i lo ko ang.

Pu S. HIATO, MINISTER : Pu Speaker, MLA zahawm tak Pu John Siamkunga zawhna chu, Greater Hnahthial Water Supply Scheme Tuichang lui pump tum hi tluang taka a kal chuan nakum inthlan hma, March 2013-ah zawh hman tum a ni e.

*Speech not corrected

SPEAKER : Zawhbelhna, Dr. R. Lalthangliana.

Dr. R. LALTHANGLIANA : Pu Speaker, demand-ah kha chuan sawi chu a ni nual a, amaherawhchu Chiang leh zuala min han hrilh theih nan zawhna pahnih ka han zawt e.

(1) Lunglei khawpui leh a chheh vel min chawmtu, tin, kan Lunglei Water Supply Scheme hi hmanna kan ngaihthlak tawh ang khan tuihna te a chak tawh vak loh avang sawn Tlawng saw.....kan pump a, min chawm zo lo ta tan hle mai mihring kan pung chak baw a, chumi chungchangah chuan sawlai atang nilo sawn hmun dang atanga Water Supply Scheme dang siam tur khan ruahmanna siam tan a ni tih kha kan lo hria a, kha kha khawi atangin nge ni sum kha hmuh kan beisei? A thlen chin kha min hrilh thei se ka duh khawp mai a.

(2) Buarpui lai bawr vela kan tui harsatna kha kan sawi tawh a, chumi rual chuan ground water atanga an lak mai ni lova, lui tui ngei khulai atanga lak tur kan neih kha tih tum a ni a tih kha a awm baw a, engemaw pawisa hmanga project siam tur ni ang deuh khan min hrilh a, enge ni kha khan kan thlen chin dik tak kha, hmanni windup kha a hun in hman rei viau

naa, helai vel hi min hrilh chipchiar si lova Pu Speaker, ka'n zawhbelh hram a ni, a thlen chin khawi atanga hmuh tura beisei nge tih kha.

*Speech not corrected

SPEAKER : Artahkawn tih ang deuhin Buarpui a lar hle a, Bungmun te a lang mang si lova. Awle, chhang turin a changtu Minister zahawm tak Pu S. Hiato i lo ko ang.

Pu S. HIATO, MINISTER : Pu Speaker, nichinah khan kan inchhang nual tawhin ka hria a. Lunglei Greater Water Supply Scheme hi tuihnate a lo tlem tak avangin tih dan tur kawng zawng ila kan ti a, tunah hian Mat luite kan survey tir a, chumi survey-ah final a la awm loh avangin DPR ala ni rih lova, chu chu chak takin kan kalpui mek a Tin, sum hi eng atangin nge kan hmuh ang tih hi chu kan hriat tawh angin khumi scheme a puitlin hunah chuan DoNER te emaw, tin Urban leh Rural Department, Govt. of India atang hian sum chu kan dil thin a ni. Buarpui kan sawi thin a, eng chen chiah nge an kalpui tih hi vawiin khan ka chhang thei lova, mahse, a lui lak tum kha kan survey mek tih kha ka hria a, enge kan thlen tawh tih ka chhang thei lo a ni. a tui kan lak hian engemaw chen chu ala phuhruk ve bawk niin kan hre ve bawk a ni.

*Speech not corrected

SPEAKER : Awle, zawhna No. 210-na hi nichina mi ang bawk khan a zawttu a awm lova, kan kal kan rih anga, zawhna No. 211-na hi zawt turin member zahawm tak Pu Lalrobiaka i lo ko ang.

Pu LALROBIAKA : Starred question 211-na Transport Minister chhan atan, Taxi intlanchhawk thin an vaia tlan leh ta hi Taxi owner leh Taxi driver nawrna avanga tlan a ni em? tih kha ka zawhna a ni e.

*Speech not corrected

SPEAKER : Chhang turin a changtu Minister zahawm tak aiah Minister zahawm tak Pu J.H. Rothuama i lo ko ang.

Pu J.H. ROTHUAMA, MINISTER : Taxi intlanchhawk thin an vaia tlan leh ta hi Taxi owner leh Taxi driver te nawrna vang a ni lo.

*Speech not corrected

SPEAKER : Zawhna No. 212-naah kan kal anga, a zawt turin Pu C. Ramhluna i lo ko ang.

Pu C. RAMHLUNA : Pu Speaker, Transport Department changtu Minister zahawm tak chhan atan starred question No. 212-na :-

- (a) High Security No. Plate siam nan hian engzat nge sen ngai?
- (b) A siamtu bik deuh hi ruat a ni em?
- (c) Motor zawng zawng hi eng hunah nge nei tura tih an nih?
- (d) High Security No. Plate pakhat siam nan hian Transport Department hian Vat an la thin em? Engzatnge an lak? tih a ni e.

SPEAKER : Le, chhang turin a changtu Minister aiah Pu J.H. Rothuama i lo ko ang.

Pu J.H. ROTHUAMA, MINISTER : Pu Speaker, Member zahawm tak Pu C. Ramhluna zawhna chhanna chu hetiang hi a ni e :-

(a) Motor pakhata High Security No. Plate set khat siam nana sum sen ngai zat chu :-

(i)	Two wheeler – Scooter	-	Rs. 669.00
(ii)	Two wheeler - motorcycle	-	Rs. 668.00
(iii)	Three wheeler (Passenger & goods)	-	Rs. 940.00
(iv)	Light, medium & Heavey Commercial vehicles/trailers combination	-	Rs. 945.00

- (b) A siamtu bik ruat a ni.
- (c) Kum 2014, April ni 26-ah chuan nei vek tura ruahman a ni.
- (d) High Security Registration Plate siam nan hian Transport Department-in VAT an la lo.

*Speech not corrected

SPEAKER : Le, zawhna 213-ah kan lo kal ang a, kan Member zahawm tak Pu T.T. Zothansanga i lo ko ang.

Pu T.T. ZOTHANSANGA : Pu Speaker ka lawm e. Ka starred question No. 213-na Hon'ble Minister for District Council Affairs Department-in min chhan tura ka zawhna chu hei hi a ni. MADC inthlan chungchangah lungawilohna thu Court-ah thlen an awm em?

SPEAKER : Chhang turin a changtu Chief Minister zahawm tak Pu Lal Thanhawla i lo ko ang.

Pu LAL THANHAWLA, CHIEF MINISTER : Pu Speaker, Mara District Council inthlan chungchanga lungawiloh vanga Court thleng hriat a ni lo.

SPEAKER : Pu T.T. Zothansanga zawhbelhna.

Pu T.T. ZOTHANSANGA : Pu Speaker, hmanni lawkah MADC inthlan sawlaih felfai takin kan nei a. Chumi hnu lawkah chuan party pakhatin Press Conference an kova, thil eng eng emawte an sawia. Tin EVM te kha a rawn mawhpuh a. Hei India ramah Separation of Judiciary te kan han nei a, lungawilohna duh duh hunah thlenna turte kan nei tawh a. Helai kawtkaih tute emaw ko khawm a, ui ke tang chiauva lo chiauvak vak hi kan sim a hun tawhin ka hria a. Kan lungawilo tak tak anih chuan Court hi kan thlenna hmun tur niin ka hria a. Tin, chubakah khalaia an Press Conference mai bakah kan party senior tak takte pawhin EVM hi mipui hmaah an dem an dem mai a. (SPEAKER : Zawhbelhna zawt phawt mai rawh) Thuhmahruai ka'n nei anih kha, zawhbelhna thuhmahruai. Tichuanin EVM demna hi a awm a awm mai a, State Election Commission changtu i ni tho bawka, kan Minister zahawm tak, kan Chief Minister kha, Election Commission hian hetiang EVM sawisel sawisel hi an ngaimawh thu hriat a ni em? tih kha ka zawt duh a ni.

SPEAKER : Le, a theih ang ang chhang turin kan Chief Minister zahawm tak i lo ko ang.

Pu LAL THANHAWLA, CHIEF MINISTER : Pu Speaker, a chaklo lam pang hi chuan puhmawh tur zawn hi tih dan a ni ve hrim hrim a. Chuvangin, engang zawng pawhin puhmawhna kha zawng selangin an right kha a ni ve a, ka zuk sawi phak a awm lova. EVM sawisel sawisel hi Election Commission-in an object em? an duh lo em tih erawh chu ka zuk zawt lova, ka zin hunah ka lo zawt ang a. Amaherawhchu, tihchingpen theih anih loh zia erawh chu ka chhiar tawh. Hmanniah khan zawhna a awm a, a rawn thleng hman lova. Khatah kha chuan rawn thleng se Member zahawm takte hi ka sem vek ang ka ti a. Nakinah remchangah ka la sem dawn nia.

SPEAKER : Awle, zawhna no. 214-ah kan kal ang a, a zawt turin Member zahawm tak Dr. R. Lalthangliana i lo ko ang.

Dr. R. LALTHANGLIANA : Pu Speaker, tukin chu kan kal chak ber tum a la nih ka ring a, a lawmawm nge ni pawh ka hre lova. Kan Minister-te a hnu zelah pawh khan chhang rang tur hlir kha an ni dawn a, ka'n zawt leh tho ang e. Ka Starred Question No. 214-na :-

- (a) Revenue collection of Transport Department during the last three (3) years i.e. 2009 – 2010, 2010 – 2011 & 2011 – 2012
 - i) MST - Wingii) MV/STA - Wing
- (b) Total No. of employees of a & b above, ka tia, a chungamite hnathawktu zat ka zawt a ni.

*Speech not corrected

SPEAKER : A chhang turin a changtu Minister aiah Minister zahawm tak Pu J.H. Rothuama i lo ko ang.

Pu J.H. ROTHUAMA, MINISTER : Pu Speaker, Member zahawm tak Dr. R. Lalthangliana zawhna chhanna chu hetiang hi a ni e :-

a) A hnuai mi ang hian Transport Department hnuai hemi hun chung zela Revenue collection chu hetiang hi a ni :-

		<u>2009-10</u>	<u>2010-11</u>	<u>2011-12</u>
		<i>(Rupees in lakhs)</i>		
i)	MST/ CPP Wing	202.11	232.82	214.58
ii)	MV/ STA Wing	813.71	929.23	1852.11
b)	1) MST/ CPP -	527 nos.		
	2) MV/ STA -	113 nos.		

*Speech not corrected

SPEAKER : Kha kha cheng han tih kha nuai zel a nih kha aw, nuai bi a nih kha. Ni e, nichina kan Member-ten an han sawi ang deuh hlek khan kan Office lam hian thil fel zawk nan tiin a department-wise deuh hlek hian Thawhtanniah, Thawhlehniah ti khan kan han thliar ve a, chu chu kan felna turah kan han ngai a. Mahse, kan Minister-te pahnih hi an ni kan ruatah hian an awm remchang lova, Member-te tan pawh a hrilhhaithlak a, House tan tak pawh a hrilhhaithlak a. Hetiang hian an chhuak bo dawn a ni tih te chu lo hre lawk ila chuan kar hmasa lamah khan an zawhna zawng zawng lo hlawm sak pawh hi Office lam chuan kan hreh miah lovang a. Mahse, hei, tunkar lamah an chhuak bova, an Demand kha an nghak hram hram lek khan a lang ta mai a. Chuvangin, Member-te in lo satisfy loh pawhin inhriatthiam hram hram tum ila a tha awm e.

Tunah zawhna no. 215-na zawt turin Pu K. Liantlinga i lo sawm ang.

Pu K. LIANTLINGA : Pu Speaker, ka lawm e. A hmasaa mi chhanna ang deuh tho kha a nih mai hmelin ka hria a, a inang deuh khat a. Transport Minister zahawm tak ka zawhna Starred Question No. 215 - Kum 2008 – 2012 hian Motor Vehicle Tax chi hrang hrangah hian sorkarin sum engzat nge a lak luh? Year wise-in min hrilh thei em? tih a ni e.

SPEAKER : A chhang turin a changtu Minister aiah Minister zahawm tak Pu J.H. Rothuama i lo sawm ang.

Pu J.H. ROTHUAMA, MINISTER : Pu Speaker, Member zahawm tak Pu K. Liantlinga zawhna chhanna chu hetiang hi a ni e :-

Kum 2008 – 2012 chhunga Vehicle Tax chi hrang hrang atanga sorkarin sum a lak luh zat chu Rs. 2804.36 lakh (cheng nuai sanghni h zariat pali point pathum paruk) a ni a.

Year-wise (Rupees in lakh)

Sl No.	Financial Year	Road Tax	Passenger & Goods Tax	Total
1.	2008-2009	285.89	143.83	429.72
2.	2009-2010	311.92	134.45	446.37
3.	2010-2011	352.34	193.27	545.61
4.	2011-2012	1180.38	202.28	1382.66
	Total	2130.53	673.83	2804.36

*Speech not corrected

SPEAKER : Le, zawhna number 216-na zawt turin member zahawmtak Pu John Siamkunga i lo ko ang.

Pu JOHN SIAMKUNGA : Pu Speaker, Hon`ble Minister for Health & Family Welfare Department min chhan atan heng zawhna te hi ka zawt e :-

- (a) South Vanlaiphai PHC-ah hian doctor engtikah nge dah a nih dawn?
- (b) Hnahthial CHC-ah hian doctor dah belh dan a awm angem?

SPEAKER : A chhang turin a changtu Minister zahawmtak a awm lo a, a chhang turin Minister zahawmtak Pu R. Lalzirliana`n chhang rawh se.

Pu R. LALZIRLIANA, MINISTER : Pu John Siamkunga, MLA zahawmtak zawhna chhanna –

- (a) Doctor indaihlohna a nasat em avangin South Vanlaiphai PHC ah hian doctor dah tur hi sawitheih a la ni rih lo.
- (b) Doctor indaihlohna a nasat em avangin Hnahthial PHC ah pawh hian doctor dah belh tumna a awm rih lo.

*Speech not corrected

SPEAKER : Zawhna no. 217-na hi chu nichinah zawhbelhnaah khan a zawt tawh thoin a lang a, kal kan theih tawhin ka hria a, zawhna no. 218-na zawt turin member zahawmtak Pu C. Ramhluna i lo sawm ang.

Pu C. RAMHLUNA : Pu Speaker, Health & Family Welfare Department Minister zahawmtak chhan atan Starred question no. 218 chu hei hi a ni e.

- (a) Mizoram pumpuiah hian Health Worker Post hi engzat nge awm?
- (b) Health worker ho hi regular appointment, state contract leh RCH leh NRHM hnuaiia contract te hi engzat nge, female leh male?
- (c) State contract employees leh central contract employees te hi remuneration engzat nge pek an nih ?
- (d) Contract a rawih hote hi a nghetin an rawih theih ve hun tur engtik nge ni ang? tih a ni e.

SPEAKER : A chhang turin a changtu Minister zahawmtak aiah, Minister zahawmtak Pu R. Lalzirliana i lo sawm ang.

Pu R. LALZIRLIANA, MINISTER : Pu C. Ramhluna MLA zahawmtak zawhna chhanna –

- (a) Health & Family Welfare Department hnuaiiah chuan Mizoram pumpuiah Health Worker male post hi – 382 leh Female post hi – 388 a awm.

- (b) Tuna Health & Family Welfare Department hnuaiia Health Worker dinhmun chu-
- | | | | |
|------|----------------|---|-------------------------|
| i) | Regular | - | 237 (Male) 310 (Female) |
| ii) | State contract | - | 20 (Male) 13 (Female) |
| iii) | RCH Contract | - | 12 (Male) 79 (Female) |
| iv) | NRHM Contract | - | 110 (Male) 231 (Female) |
| | Total | - | 379 (Male) 633 (Female) |
| | Grand total | - | 1012. |
- (c) State Contract employees hi remuneration Rs 11,360/- pek a ni a, contract employees central hnuaiia mite chu hetiang hian remuneration pek mek an ni. Category-900, Category -2, Category-3 10800.
- (d) Contract rawih, a ngheta rawih loh hote hi sorkarin a ngheta a rawih hun tur a la hre lo.

*Speech not corrected

SPEAKER : Le, tunah chuan No. 219-na zawt turin Pu T.T. Zothansanga i lo ko ang.

Pu T.T. ZOTHANSANGA : Pu Speaker, ka lawm e. Hon'ble Minister for Health and family Welfare Department-in a chhan tura ka zawhna chu hei hi a ni.
Health Department-in eng award-te nge a dawn?

SPEAKER : A chhang turin Minister zahawm tak Pu R. Lalzirliana i lo ko ang.

Pu R. LALZIRLIANA, MINISTER : Pu Speaker, Member zahawm tak, Pu T.T. Zothansanga zawhna chhanna -

- 1) NRHM Improved tha 2010-ah 2nd position.
- 2) Most Improved in State Health Sector Small State Award – 2011.
- 3) Outstanding Improvement in Programme Implementation of RSBY in the North East Region Award, 2011.
- 4) Population Foundation of India in J.R.D –Tata Memorial Award, 2012.

*Speech not corrected

SPEAKER : Khai le, kan zawhna leh chhanna hun a lo tawp ta a, tukin chu zawhbelhna awm vak lovin kan kal a, kan chak pur pur khawp mai. Member lokal remchang lo te, Pu P.C. Zoram Sangliana a zin a, Pu Lalrinliana Sailo a zin a, Pu B. Lalthlengliana damlohna avangin a lo kal thei lova.

Nimina kan sawi tawh ang khan Zirtawpni kha Demand for Grants sawi nan kan hman tak avang khan Private Member's Resolution hi vawinah kan lak a lo tul ta a. Ni 24.7.2012 thawhlehniah ballot a ni a, chuta lo chhuak ang khan kan la ang a, Bullettin Part – II No. 225. Ni 25.7.2012 a kan rawn sem tawh ang khan Pu Lalduhoma Resolution kan la ang a. Resolution No. 1 “Mizoram Home Guard Volunteers zinga Skilled-I chinte hi Work Charge-a dah ni rawh se,” tih a ni a, tunah Resolution neitu move turin i lo sawm ang.

Pu LALDUHOMA : Pu Speaker, Resolution kan ballot ni khan ka resolution hi pakhatnaa pawh fuh kha a ni a, a dawt leh pawh hi ka resolution kha a ni zel a, a tul ngang a nih hi ka ti deuh a ni.

Hei, Mizorama Home Guard-te hi tunah hian 1020 vel an awm a, Mizoram hmun hrang hrang 80/90 velah hian deployed an ni a. Tin, Ministerial Staff hi 150 vel, Regular leh Regular lo an awm a. Tin, Quarter Guardmen an tihte leh Bandmen an tihte khu chu regular vek an ni thung a, an vai hian volunteers an ni lo a ni. Heng Regular-te hi an hlawh a sang bik a, volunteers kha nihna sang zawk pawh ni selangin an hnuaia mite kha an hlawh chu a sang zawk tlat a ni. Hei hian discipline-te pawh engemaw chenah a khawih ve a ni. Pu Speaker, 2009 March ni 20-ah khan Mizoram Home Guard-te hamthatna tur Resolution ka rawn pulut tawh a, lungrual takin he House hian min pass pui a, ka lawm hle a, ka Resolution kha sorkarin chak takin a bawhzui ta nghe nghe a. Tichuan, khata tanga hamthatna eng eng emaw tuna an lo hman tak hi a awm hlawm a, tunhma lamin Rifle Allowance-te an lo dawng ngai lo va, tichuan, thlatin Rs 25 an lo dawng ta a. Tin, Ration Allowance hi thlatin Rs 550 an dawng ta bawk a, Washing Allowance hi Rs. 50 atanga Rs 80-a tihpun a ni a. Tin, rank pay an ti mai a, hei hi an lo dawn pangai kha a leta tihpun sak vek an ni bawk a, Daily Allowance Rs. 143 atangin Rs. 184-ah tihsan a ni bawk a. Tin, kum 15 hnuailam pang kha skilled-II Scale pek an ni, mi 518 an awm a, kum 15 chung lam hi skilled-I ah hlan an lo ni ta a, tunah hian mi 502 an awm a ni. Tin, Mizoram Home Guard Rules, 2010 kha siam a lo ni ta bawk a, khata tang khan hamthatna tam tak an dawng leh a, tunhmaa nikhat pawh chawlh nei ngai lo khan leave chi hrang hrang an lo nei chho ve ta bawk a. Post reservation hi Police Department ah 10% dahsak an ni a, Excise & Narcotics-ah hian 5% a ni a, Environment & Forest-ah hian 5% a ni a, Prisons-ah 5% a ni bawk a ni. Tin duty laia thite hi ex-gratia Rs. 1,00,000 pek tur an lo ni ta bawk a, funeral expense atan Rs. 5000/- pek an ni bawk a. Chutiang chuan thil tam tak hamthatna kan Mizoram Home Guards te hian an lo dawng ve ta a. Eizawna zahawm tham tak, itawm tham tak tunah hi chuan a lo ni ta a, tunhma lama mi thenkhatin fiamthu nana an hman thin ang kha an ni tawh lova. An hlawhte pawh hi English Medium-a lehkha thiam pui puite hlawh ai hianin a sang zawk fe tawh a, a lawmawm takzet a ni. Kum khatah hian hetiang uniform ha ho hi chuan 13 months pay hi an la vek a, hengte hi pek an la ni lova, pension-te an la nei lova, Employees Provident Fund Scheme hnuai atangte hian Sorkar insengso em em lo deuh te pawhin tih dan dan ngaihtuah a tha hle a. Tin, Medical re-imburement te pawh an la nei rih lova, mamawh hi chu an la nei neuh neuh a. Amaherawhchu tum khatah sorkarin an mamawh zawng zawng hi a pe thei bik lova, sum leh pai harsatnate a awm a, an Adviser, an Association-ah hian ka ni a, an adviser ka nihna ang pawhin “A lawmawm thawkhat e, a inthlahrunawm tawh e, heng bak hi chu dil mah ila kan hmu tawh chuang lo ang, i ngawi rih deuh ang u hmiang mawle”, ka lo ti ve thin a.

Chutianga inthlahrung taka ka awm lai chuan Pu Speaker, kan Ruling Member zahawm tak Pu R.L. Pianmawia hian tuna ka resolution ang chiah hi comma leh chhunhan pawh engmah danglamna awm miahlo in a rawn thehltut ve ta a, kei aiin a thehltut hmasa nghe nghe a, mahse balloting-ah khan a chang ta tlat lova, Ruling member zahawm takin chutiang a rawn thehltut takah chuan kei hi ngawi mai mai thei ka ni hleinem ka ti ta a ni. Tichuan a tih ang chiahin, tawngkam pakhatmah danglam lovin kan thehltut ve ta a, chuvangin, vawiinah hian Pu Speaker, ka Resolution bikah pawh ka ngai lo, kan member zahawm tak Pu R.L. Pianmawia nen kan Resolution intawmah ka ngai a, theihtawpin kan tang dun turah ka ngai a, kan pahnih ta ang tlukah ka ngai a ni. Tin, Democratic Principle-ah, kan kalphungah chuan Ruling member-te hian Private Resolution mah ni se, Sorkarin a pawm loh tur leh

pass-pui loh tur chu an thehluh ngai lovin ka hria a. Chuvangin ruling member zahawm takin a rawn thehluh kha chuan, “Sorkar mitmei a hmu anih hi, a bik takin Home Minister nen chuan an sawi dun ngei ang a, a va lawmawm em, kan ngaih dan a thuhmun leh dawn anih hi”, tih ngaihtuahna kha ka pu lo thei lova. Kan Home Minister hian ka bial lamte pawh a rawn tinzawn deuh ta mai em ni te ka ti deuh rum rum a ni. Chuvangin pass ngei tur leh tihpuitlinsak tlak ni ngeia ka ngaih avangin, vawiinah hian hlawhchham lo turah ka ngai a, tlang ngei turah pawh ka ngai a ni. Chuvangin tuna Skill-I chin 502, hei hi ka sawi soal mai thei a, a figure chiah hi chu, hengte hi Work-charge dinhmuna dah luh ve ni turin he ka resolution hi ka han move a, hmana ka resolution hmasa lungrual taka kan pass tawh ang khan vawiinah hian lungrual takin, kan zavaiin min pass-pui turin ka sawm theuh che u a ni e. Ka lawm e.

SPEAKER : Aw le, resolution neituin a rawn move ta a, kan sawiho anga, hun kan inpek dan tur hi mi pakhatin engtia rei nge ni han ti leh thliah thliah ta ila, Chair atangin han rawt ta ilangin, a rei berah minute 10 inpe ta ila, chuan minute 8-ah khan warning bell kha han tiri leh ta ilangin, a tha kan ti mai em? Nge minute 5 kan ti zawk dawn? Anih leh minute 10 ti ang aw, tunge han sawi dawn le? A changtu Miniser-in sawi hmasak a tum tlat mai a, midang sawi kha min barakhaih ang aw. Pu R. Lalzirliana.

Pu R. LALZIRLIANA, MINISTER : Pu Speaker, ka lawm e. Vawiina kan resolution hi thil tha tak mai a ni a, a tih theih leh theih loh chu thudang ni se, mite an hlauh tlemte atanga han san theih kha chu duhthusam a ni a, tunlaia kan sorkar hnathawk tam tak pawhin an hlauhah lungawi reng siin an thianta hlauh ang an hlauh ve tak loh avanga sorkar nawr mek te pawh an awm thei a, chutiang ang chu a ni a, thil tha tak a ni a. Hei resolution neitu kha khulam bialtu Home Guard tamna lam bialtu a ni a, hmanah khanin a resolution hi kan lo pass-pui tawh a, khatih lai khan sorkarin tih kan tum mek keini pawhin file-ah te kan lo ziah vek tawh Cabinet-in an remtih tawh mai tur kha Session a rawn awm a, a rawn pulut hlauh mai a, ani pawhin a lo ngaipawimawh ve a, sorkarin kan tih lam reng reng kha chu a lang ta lova, bialtu MLA a tha ber tih kha a ni ringawt mai a, kha kha a hlauh dawn tih kha kan hre tho tho mai a, khatiang anga rilru tluang taka House-a kan thatlohna lai te min sawisel ngam a, kan thatna lai te min fak ngam hi an tha a lawm mawle, a ti a, kan House Leader hian. Chuvangin hei hi chu hnawhlak a keinin zuk pun leh kher kher a ngai tawh hleinem an allowance hrang hrangte chu, chuvangin pass-pui ila hamthatnate pawh a lo dawn ve pawhin a tha a lawm a ti a, kan pass-pui mai a, sorkar tih lam kha chu Pu Speaker, a lang ta lo reng reng a, a credit la tu kha chu MLA kha an ni deuh vek a, a thikawm deuh rum rum a. Kan Unit a tlema a firfiak deuha kal phei chuan engahnge maw khatiangte in pass tir reng reng, hetiang hi min awpbeh nasat tawh nak lai hian hetiang ang chuanin a buaithlak ngawt ang, an rawn ti a, chutiang ang hial chu kan lo thlen phah tawh a. Vawiinah pawh hian chutiang avang ni chuang lovin kan han sawi kan han sawi ang a, a pass theih dan emaw pass loh dan emaw te chu kan han ngaihtuah turah kan ngai a.

Tin, Home Guard hrim hrim hianin Mizoramah hianin Punjab tih lohah India ram State zawng zawngah hian Home Guard an nei vek a, Punjab-ah hian keini hlauh aia sang hi an hlauh a, a bak zawng zawngah chuan kan hlauh hi a sang ber a ni. Chuvangin Home Guard kan enkawlina hi a tha thawkhat hle tawh a ni tih hi a chiang a. Tin, tunah hianin sorkar hnathawk kan police-te ang deuhin out post hi kum khatah ni riat an nei a. Tin Paternity Leave hi ni 15 an nei a, Maternity Leave hi ni 45 an nei bawk a, Medical Leave hi ni 30 an la nei bawk a ni. Chu chu Home Guard te kan chhawr hah viau naa han chhawr loh

lai pawhin engemaw leave te pawh hi an nei ve thei a ni tih kha heta Muster Roll kan tih naran ang kha chu an ni lova, muster roll pangaite chu an kal lohin an hlawh kha cut mai tur a ni a. Chutiang aia chung fetah chuan an awm tawh a ni tunah hian. Nichina kan ngaihthlak tak ang khan Police-ah te, Excise and Narcotic-ah te, Forest & Environment-ah te, Prison-ah te hmalak a awmin engemaw sorkar hriatpuia tam tham deuha lak a awm chuan percent kha an nei ve vek a ni tih kha kan hria a. Anni hi an chang a zau ber nghe nghe a ni, sorkar hnathawk dang chu Department danga va insawn zung zung emaw an tana quota siam sak emaw kha an vang hle a ni. Home Guard hi kan dah pawimawh em em a ni tih hi a langin ka hria a helai atang hian. Kan hriat tawh ang khan engemaw ram tana an thawh tak tak laia an lo thih chuan cheng nuaikhat Exgratia-ah khan pek tur a ni a. Tin, an duty laia an lo thih hrim hrim awmlai emawa an lo thih chuan cheng sangngain mitthi vuinaa an senso vel kha tum sak an ni thin a ni. Tin, Home Guard anmahni chauh pawh nilo an chhungte tan hian free medical facilities hi pek an ni nghe nghe a ni. Chuvang chuan Home Guard hi sorkar hnathawk dang ai hian an tha emaw ni chu aw a tih theih a, a pawisa faia an lak hi a tam love tih mai kha a ni a. Tin, sorkar hmasa lam ai khanin he sorkar hian a duhsak chho viau a ni a. Nikhatah duty allowance hi Rs. 143 an hmuh lai hian Rs. 184-in kan sorkar hian a tihpun sak a, tuna Skill II kan tihte kha Rs. 240 late an ni a, tin, Skill I hi Rs. 300 late an ni kan tih kha. Home Guard-a a rank hniam ber hian thlakahata a lak hi Rs. 7855 lai a la nghe nghe tih kha ka sawi duh a.

Tichuanin kan resolution hmasa kan lo passed tawh leh ration allowance te hi an hmu ve ngai lova tunhmain. Tunah hi chuanin ration allowance-ah hian Rs. 550 lai pek an ni lehngal a, Rifle allowance-te pawh hi Rifle keng ve reng si hmanlai atanga Rifle keng ve reng tawh si kha allowance pawh an lo hmu lova. Tunah chuan Rs. 25 Rifle allowance-ah hian pek an ni a. Washing allowance hi chu Rs. 50 an lo hmu ve tawh thin a, tunah chuan Rs. 80 a tihpun a ni tawh a ni. Chutiang chuan an rank pay-ah pawh hian tunhma sorkarah kha chuan Lance corporal-ah hian Rs. 50 hi per month-ah an hmu thin a, tunah chuan Rs. 100 an hmu tawh a. Corporal-ah hian Rs. 70 hmu thin an ni a tunah hian Rs. 140 a tihpun a ni tawh a. Tin Sergeant-ah hian Rs. 90 an hmu thin a, tunah chuan Rs. 180, a let thawk thawk an hmu zel a ni. Tin CSM Quarter master-in Rs. 110 hmuh thinah khan Rs. 220 pek zel a nih chu an duh Pu Speaker, chutiang chu an ni. Home Guard kan chhawr dan hi, State dangte ai chuan kan chhawrna deuh bawk a, chuvang chuanin hetiang duty-na chi hrang hrang VIP-ah te, kan Supply Godown-ah te leh a tul ang angin, Traffic duty-ah te pawh hian a tul chang chuan kan hmang thin a ni. Chutiang ang chu kan hman dan a ni a. State dangah hi chuan 24 hours hi an chhawr lova, keini hi chuan 24 hours chhawr ang deuh mai kan ni tunah hian.

Kan Resolution tak hi a harna deuh chu Home Guard Skill-I chinte hi chu Work charge-ah dah ni rawh se, tih hi a buaithlakna lai a awm ta a, Pu Speaker, Work charge-ah zuk dah tur chuan PWD te, PHE te, P&E te hetiang works nei, a project va nei hote hianin chumi an supporting staff an lak tur atan chuan sorkar hna nghet lo, khami works an neih chhunga thawk tur, a thawktute permanent a thawkte pui tur atan work charge hi siam a ni thin a. Chuvangin heng hi a dan tlangpuiah chuan an works an zawh khan an bang vek tur a ni. Chuvangin tunah hian Home Guards hian works hi kan nei ve si lova, chuvangin helai tak hi chu kan duhsakna hi a lawmawm viau mai a, amaherawhchu tih theih a ni lo a. Chuvang chuan kan sorkar hian work charge ho hi PWD Manual Volume II, 2002 Edition kha tidanglam hretin duhsakna liantak an nei a, sorkar hnathawk hlawh ang deuh hi an hlawh vek tawh a ni a. Chutianga la thei tura chu helaia DP&AR (ARW) ina Notification an lo chhuah danah chuan PHE ami te, PWD ami te, Power & Electricity Department atan chauh hian phal a ni nghe nghe a. Midang tan works an neih ve mang loh avangin, a chhan chu anni hian Central Sponsore Scheme te, World

Bank te, an neih zawm zat avang hian ban lem lovin an ti a. Tunah hian khawimaw laiah works lo nei ta ila, chuta tan chuan lo la ta ngawt ila, khami kan tih zawhah khan Home Guard kha ban vek tur a ni anga. Chuvang chuanin helai hi chu tih theih loh angah a Department changtu nihna angah ka ngai a. Chuvangin Pu Speaker, tuna kan Resolution hrim hrim hianin a bialtu MLA khulaia Home Guard hmunpui changtu hi... He Resolution hian Election lam hi a kawk deuh ran mai a, Pu Speaker, tunah hian pass sak ila, pass sak lo mah ila a credit chu a la tawh hrim hrim, kan bialtu pa hian min duhsak a ni an ti dawn hrim hrim a. Pass lo mah ila a tan a na chuang lova. Chuvangin helai hi kan pass-pui theih chi niin a lang lova, work an neih ve tlat loh avangin khalam atan khan tihlueh hleih theih niin a lang lova. Tin, Ruling MLA phei chuan lo ti selangin, hei hi chu a lo lan ve chiah khan, hei chu reject tur a ni kan ti mai a. Tin, hei hi chu an reject e, reject love, a hlawkna chu a tel dawn hrim hrim a ni. Chuvang chuan a tha tawk a, sawi vak loh pawh hian a tha lawm ni tih te pawh hi ka ngaihtuahnaah chuan a awm deuh a ni, ka lawm e.

*Speech not corrected

SPEAKER : Tunge han sawi ve leh dawn le? Pu R.L. Pianmawia.

Pu R.L. PIANMAWIA : Pu Speaker, ka lawm e. Hei Resolution tha tak ka'n thehlut ve kha a ni a, kan House-ah pawh mi zahawm leh faktlak Pu Duhoma'n a lo pulut ve hlahu mai bawka. Engemawti zawnga ka ngaihtuah chuan a lawmawmna lai tam tak awmin ka hria a.

Tin, Resolution putlueh chungchangah Congress Party-ah chuan kan House Leader hian kan hmuhi hi a phuar lova, zalenna min pe a ni tih chiang takin ka hria a, kan Home Minister han sawi atang khan he Resolution hi keini ang rawn putlueh awm tawka lek anih dan te pawh han sawi ka duh a. Hei kei chu inthlan campaign laia min tih ang khan Branch YMA President awm tawka vel kha ka ni a. He thil tihtheih miah loh han pulut tawp tur pawh hian ka inawm tawka hlein ka hria a. Han thlir zau deuh leh chinchang hre deuh tan chuan ka tih tawh hnua ti kha a ni lehngal a, ka aia a zawk nih kha chu a duh ka ring miah lo va, chuvang chuan inhnudawh leh pawh a hnial ka ring bik lo va, hnuhdawhleh ka duh laiin mawl taka ka lo tih kha, thlir zau miah lova ka lo tih kha ballot-ah a tlang ta lo hrim hrim a, chuvang chuan he thil hi thui taka han ngaihtuah pawh hian mimawlina ka han ngaihtuaha ka han tilang ta lo hi a tawka vel hle a ni awm mang e aw tih ka rilruah a awm a. Mi chinchang hriate han rawn a, han biak hian kan sorkar hian Work Charge Establishment-ah category 88 a awm a, PWD in 32, P&E in 24, PHE in 32, heng hi a awm a, chuvang chuan Work Charge establishment-ah Home Guard volunteer te an lo tel ve bawka si loh avang hian an tello tih hi ka lo thlir pha ve bawka si lova. A lehlamah chuan kan dinhmun nen a inawm tawka, min min lo nuihzat deuh a nih pawhin mi min hmuh dan leh min puh dan kalhmang atangte chuan kei chuan ka tuar zo tho va, a awm tawka a lawm mawle tiin rilru dam takin ka awm tho va. Amaherawhchu, kan aia miropui leh fing leh fel zawk sorkarah pawh hun rei tak lo awm thei tawh, changkang zawkin hetiang a han pulut ve duh hi chu a lehlamah chuan awlsam zawnga lo tawng tawh thin DAH lo hmang lo hmang tawhtu tan chuan a awm ve thona lai phei chu a awm awm mang e aw tih ka ngaihtuah a. Chuvang chuan he resolution hi mimawlin tein a ka lo tih, thlir zaute tan chuan tih chi miahlo kha a lo nih avang hian tha hlea kan ngaih kha a lo tih theih miahlo tih kha ka chiang a. A chhan chu sorkarah pawh la awm ve lo tan leh thintlang pa mai tan chuan establishment awmdante pawh ka lo hriat loh avang khan ka lo ti ve thlarawka a ni a, chuvang chuan mimawlin ka tihlang ta

lova kha a tawh china ngaih theih mai nise a thain ka ring a. Mihring dana ropui hotuten hetiang an rawn thual nawn leh kher tur hian chuan an intitlawm lutuk ang tih a hlahawm hlein ka hria a, min an ngaihsanna zawng zawng pawh a tlahniam ang tih ka hlau hle a, pawl ka ti a ni.

Tin, Home Guard Volunteer-te hi a hming atang hian ngaihtuah ila, thil hi a hming atang hian tihtheih leh tihtheihloh hi a lo awm thei awm mang e aw ka ti a. V/C-ah hian kum 1984 atang khan ka tichho ve tawh a, V/C member-ten thlakhatah Rs. 45 kan lak thin lai pawh khan ka telve tawh a, 19 Jeans chhuah tirh kha a ni a, thla li hlawh kan lak khan ka lei zo lova, Zion Street-ah sawn zing chaw ei kham atanga chawhnu dar 2 thleng thla li hlawh khan lei ka tum a ka dil ngat ngat a, dawrah ka thu a, chawhnu dar 2-ah chuan thinrim deuhin min leitir a, chuvangin kha V/C a kan thawhrim dan te ka chhutin tihpuna tihsan kha a tha ka ti em em mai a ni. Kan Minister kal tawhah te pawh khan V/C hlawh hi min tihsan sak ve teh u ka ti a, hlawh (salary) a nilo alawm, lawmman alawm an ti tlat mai a ni. Chuvangin lawmman anih kha chuan han nawr san vak kha tih theih kha a lo ni lova. Tin, Volunteer a lo nih miao chuan mi an in Volunteer na na chuan a lo theih loh bawh a ni tih kha a hriat a, a lak danah pawh hian kan tawng tu khaw huatthu suhah, Darlawn V/C atang pawh khan hei kan khaw mi a ni a, kan khaw mi ngei a ni a kan duhsak a, lo la ve rawh kan ti a, kan ziah thlak hi chu an la ve zel mai a, recruitment ropui leh engemaw kha chu a ni lova, chuvangin sorkar-ten establishment-a tel anga thil han kalpui tak tak tur chuan a lo ni mai lo a ni tih chu chuan a tichiang hlein ka hria a. Chuvangin, kan duhsaknate, an tana kan thahnemngaihate tun Sorkar hian nasa takin a lo lantir tawh hi lawmthu han sawi mawlh mawlh mai bak chu tih tur a vang hle tawhin ka hria a. Chuvangin, he Resolution lo lut kan lo tihtlang tawh loh kha duhtawh mai a, ka aia fing zawh chuan hnukdawh leh mai turin ka ngen a ni e. Ka lawm e.

Lt. Col. Z.S. ZUALA : Pu Speaker, ka lawm e. Home Guard hi kan sipai bang hote tam tak employment hmuhna a ni a, a hming atang hian kan tui ve reng reng a. Hei kan resolution 'Mizoram Home Guard Volunteer zinga skill-I chin te hi work charge-ah dah ni rawh se' tih kan member zahawm tak Pu Lalduhoma'n a rawn move pawh hi a tha ka ti khawp mai a. Tunah khanin kan Home Minister leh kan member zahawm tak Pu Pianmawia khan an rawn sawi tawh a, kan Home Minister khan a sawi fel tawh hlein ka hria a. Khami bakah kha chuanin eng eng emaw Home Guard chanchin han sawi ve reng reng pawh hi kan duh ve deuh va. Thil tha tak a ni a, anni hi mi khawsak harsa zawh hetiang dinhmun position-a han dah chhoh pawh phu em em vek an ni a, mahse. Sorkar-in dan a lo neih ang te kan kalpui a ngai ang a. Tin, Home Guard hi 1964 khanin Sub. Hon. Capt. Lalmawia hova an raised a ni a, insurgency lai khan engemaw chen chu an han titawp a, chumi zawhah chuan 1971 khan an raised chho leh a, chutah chuanin Maj. Zama-te, Col. Rowley-te leh IGP khan engemaw chen chu a enkawl a, chumi hnuah chuanin Capt. Malsawmliana te'n an enkawl a. Sipai bearing nei khan training-te, discipline-te an han ti chhova a tha khawp mai a, sipai bang tam tak permanent staff-ah te leh volunteer-ah te pawh an awm a, a then chu Central Jail-ah te an awm a, an titha khawp mai a. Amaherawhchu, chung hun chuan harsatna an neih ve chu building anmahniin an nei lova rented house atangin Office an run a.

Tin, staffing tuna a awm dan ang ni awma kan hriatah hi chuanin permanent staff hi 154 an nei a, hemi a 28 chu Ex-servicemen an ni a. Tun hmian sipai bang enkawla Office-ah te ka la awm lai khanin kan IGP thin, Pu Lalchhunga pawh

khanin sipai bang tha tak tak Home Guard-ah te in pe a, Police-ah te pawh hian min pe ve la a ti thin a, kei khanin Police-a in duh phawt chuanin kan pe ang che u a ni mai a lawm. Mahse, Police-ah hian in duh lo thin a, ti te khan kan infiam mai mai thin a, kha ti khawp khanin Ex-service-ho khan an enkawl a, a tha chho va. Tin, hun engemaw chinah khanin an training centre CTI Sesawng-ah khianin hmun an han establish a, khangah te pawh khanin Pu Malsawmliana Rtd. Army Officer ho khan an han camp a, an hmunte kha an sam fai a, Sesawng khaw hotute pawhin an pui a. Tin, Sesawng hote pawh khanin an lo welcome a, Home Guard-ho pawh khan hmun tha tak an pek avang khan an lawm khawp mai a. Ka hriat dan pheh chuanin khang hunlai khanin Home Guard Training Center tha ber a ni e te pawh an ti a.

Tin, funding chungchangah hianin Central hianin 50% hi Home Guard raising man hianin a pe thei a, tin, recruit training-ah hian 50% hi a pe bawk niin ka hria a. Tin, an equipment pawh hi 50% hi Central hian a pe thei a ni. Khatiang taka Central leh State-in a enkawla a tihchhoh kha a ni a, an dinhmun hi an duhsakawm khawp mai. Work Charge-ah te pawh hian han dah chhoh theih ni se a lawmawm khawpin ka ring a, mahse, Work Charge hi ka lo hriat ve dan chuan CPWD Terminology a ni a. Anni hi khatiang ang CPWD nena in connect-na nei vak lo, department an ni a, project leh works an neih si loh chuan han dah ngawt ngaihna a awm lem lo niawm tein, a hre zawkte hi chuan an sawi a. Chuvangin hemi a resolution hi a tha hle a, an duhsakawm em em a, pek ngei pawh keipawhin ka duh a. Amaherawhchu hetiangah han hlan chhoh tawp mai hi chu Sorkar kal hmang a nih loh hmel tlat bawk si a, chuvangin a neitupa pawh hian withdraw pawh hi a hreh lo maithei a. Hemi lo ang hian resolution dangin an hlawhpun dan te leh facility tha zawka pek dan te rawn ngaituah chhuak zawk ta se, chutiang chuan kei chuan mimal tak pheh chuan pass-pui nghal hmiah pawh ka duh a. Chuvangin resolution hi chu tun dinhmunah hi chuan a rem hrih lo tih kha ka han sawichhuah ve dan a ni a. Tin, pass hrih loh mai hi nise tih kha ka han sawi theih chu a ni e. Ka lawm e.

SPEAKER : Tunge han sawi velehdawn le? Kan buk ringawt mai dawn em ni? Pu Lalthansanga.

Pu LALTHANSANGA : Pu Speaker, hei i veilam atang hian han sawi ve te pawh a thain ka hria a. A rawn move-tu pawh kha a inthlahrung hle a. Amaherawhchu ruling treasury bench lampang atanga he resolution hi lokal a ni a, chhun han pawh tihdanglam loha han tih a ni a. Chuvang chuan Home Guard te an dinhmun hei a tha tawh hle mai a. A changtu Minister pawh khan a rawn sawiah pawh khan a chiang hle tawh a, chumi rual chuan Home Guard han tih hi, ni e vawinah hei, an Commandant General post te pawh hi MPS-te hian an la luah niin a hriat deuh hlek a. MPS atang hian an zuk posting thin a, hetiangte pawh hi anmahniah khuan engnge ni an RR-ah te pawh khuanColonel chin ang, kum 5 Deputy Commandant General anga lo service tawhte tan chuan kha post kha luah theih tih ang khan a awm a, chutiang turte pawh chuan tunah hian anmahniah khuan, an inenkawl naah khuan qualified tawh an nih avangin MPS kher ni lem lo, khatiang anga rawn tih dan, sipai bang ka hmaa rawn sawituin a rawn sawi ang khan, sipai bang tha tak tak mai te, sipai lama experience lo nei tawh te, Field Colonel te pawh an lo awm tawh a, chutiang chuan an han mind ve thei tawh lawm ni tih ang khan ka'n sawi lang duh a.

Tin, ni e, hei Home Guard kan enkawl dan hi, tunlai tawng takin matching share kha 50% kha Central atanga tum a lo ni reng mai baw a. Chuvang chuan 50% Mizoram a tum anih avangin vawinah an hlawh hi work charge ang a nih lem loh pawhin tun aia hlawh tha zawk hi kan han phut sak tihna a ni mai a. A work charge-te level ang deuh, mahni tlukpui te, level pui-te phak loh tih ang deuh hlek khan khati lai kha a ni a. Tin, anmahniah hian post an neih zawng zawng pawh hi, regular post hi 154-ah hian tunah hian vacant post hi 30 lai a awm a. Tunah khuan 124 regular post hi an hnawhkhat mek a ni a. Tin, chubakah chuan Central-in an rawn sanction-naah hian, hemi volunteer hi 1260 lai hi a phal ni a, chuti chung chuan tunah hian post luah lai mek hi 1028 a ni a, chutiang a nih chuan post 232 lai hi vacant a awm ta a ni. Hengte hi hnawkhah ni ta sela, hengte hnawkhah a lo nih chuan, hmannah khan North Vanlaiphai bul, Bawktlangah khian Home Guard Training Center, engnge ni a purpose tur tak chu ka la hre lo a, Home Guard-te tan hian Bawktlang khua VC khian ram zau deuh mai an pe a. Tichuan tunah pawh hian Home Guard ho hian khitalai hmun develop tur leh khatianga hmun a thlawna hmun an lo hmuh takah si chuan tiin tunah khian in te han sa a, a hmun hma te develop tur leh bul han tanna tur atan, duty pahnih khat awmna tur te pawhin hma an la tan dawn niin ka hria a, chu hmun chu a purpose tur tak hi vawinah hianin a la Chiang Chiah Iova. Tin, hetiang anga central-in a rawn sanction post anga full strength tan ang hi chuanin khitalaiah te pawh khianin training centre te pawh hi a neih theih ang a.

Home Guard te hi kan hriat tawh ang khanin vawinah hianin Mizoram chhungah hianin a VIP te thlengin FCI godown te leh hemi traffic te a zawl zawng zawng te, hmanni jail a tlan chhuakte pawh kha Home Guard ho an duty-na pawn deuh hret niin ka hre nghe nghe a. An duty-na area chhung chu nise kan man ngei ngei ang an ti deuh a ni awm e. Chutiang khawp chuanin anni hi chutianga thahnemngai, chutianga training pek ngawih ngawih ngai ka hma amiin a sawi ang deuh hlek khanin hei hi kan khua ami a ni a, lo la leh rawh u tia lo lak leh mai thin te an nih avang khan training hi nasa zawka hemi kan police ai mah pawha training pek nasat ngai ni te pawh hian hriatna hi a awm deuh hlek a. Chuvang chuanin an full strength ang te hi sorkar hian han siam sak se chu mi tamtak eizawna kan lo siam sak te pawh a ni leh theih ang a, chutiangte chuanin he resolution hi Mizoram sorkar leh Central sorkar-in a tum tawm anihna ang leh tun kan sorkarin duhsak tak maia opposition resolution te min lo tihhlawhtlin sak tawh thin angin he resolution te pawh hi ngaihtuahna uluk tak nen, Mizoram sorkarin matching share-ah 50 % kan lo tum ve a ni baw a. Chutih lai karah employment generation kan sawi nasa hle a. Chutianga kan buaipui laia chutianga kan thalaite leh awm awl mai mai turte sipaia tang zolo deuh te han ti ta ila, a tling zolote tan pawha lo in training-na tha tak leh lo inhmakhawsuihna atan a tha em em mai a. Vawinah Sainik atan te pawh chutiang chuan training te peka sipaia lut tam tak pawh an awm a. Chutiang chuan Home Guard atang hianin vawinah khatiang experience-ah khan sipai atan te pawh hianin han ti se chu nasa takin a pui theih ang tih ka ring a. Chuvang chuanin helaia kan resolution work charge han tih hi chu tuna mi ai hian an hlawh te pawh hi ala thain la tihchangtlun nisela a tha ange, an tih laia hi work charge han tih kher hi chu ni e, khatiang ang mi engemaw force lampang ang deuh form ha hi chu an la ni Chiang Iova, anih pawhin hetiang anga an hlawhte Mizoram sorkarin 50% a tum anih ang hianin han tihthat sak leh zual sela, an level puite pha turin tih kha ka sawi lang tel duh baw a.

Tin, hei company commander turte pawh hi a hna te pawh hi pali lai hi a ruak niin ka hria a. Hetiangte pawh hi hnawkhah sak a tha hlein ka hria a, chutiang chuanin anmahni dinhmun hrang hrangah hianin vawinah la ennawn zual an ngai em em a ni tih kha

he resolution hmang hian Pu Speaker, ka'n sawichhuak ve a. Chuvang chuan he resolution hi Pu Speaker, i ding lama mite pawh hian chiang takin han ti sela, vote tamtak an hmuh lehzualna tur zawk a ni a. A bialtu pa kha an vote vek ang tihna pawh kha a ni chuang lova. Khami a tihhlawhtlin saktute pawh kha allot hi an pe hlei hlei mai a. Hei kan hriat tawh angin P.C sorkarin Hydel project kan atchilh nge kan ruih chilh nge tih pawh ka hrethiam chiah lo, chutiang khawpa kan tihte chu hei vawiinah Mizoram sorkar hian leh political party-te hian Hydel Project hi vawiinah chuan an rawn tihchilh ve ta hle mai a. An han sawi a, kan dinchhuahna bul tur chu kan Natural resource atanga revenue kan lak loh chuan kan ti lo anga, chumi bul ber chu current a ni, tihte an han sawi thin te hi a lawmawm hle hian ka hria a, khawthlang lampang, Kolasib thlang lampang P.C sorkar laia Mizoram development 80% deuhthaw kan lo plan na hmun lampang te pawh khu duh ai hianin hlamchhiah a ni thin a. Khutilai angte kan tihna chhan chu khuti lampang atang khuan Mizoram hi min rawn chawm dawn a ni a. Khutilam bialtupa te pawh Pu K. Lalrinthanga te pawh hi ka duhai hian a tang lo thin a, Mizoram hnuk a nihna lai hi a sawi chhuak lo mah mah thin a, a sawi te lutuk thin a khutilai khu Mizoram hnuk tak tak a ni a. Mizoram hi vawiinah kan thilung leh tihtakzeta kan vei hi a ngai tawh a, ni lova politics a hniak tam lam lam ti ang zawnga thlirna kan nei lutuk hianin kan ram hi vawiinah a uaithlu mek zel a, kan zawh loh nghawngkawl te pawh hi kan thleng tan niin a hriat a. Chuvang chuan Resolution-te opposition lam atanga kan han putlulah hianin thahnem kan ngai a, a tul a ni, a tul takzet a ni, hetilai a technical thilah hian ti mai lo hian central lamah te pawh nimirah kan Chief Minister zahawm takin kan Power Minister Pu Sinde pawh, Home Minister te pawh a be mai dawn a. Amaherawhchu, chutih rual chuan kan Hydel Project hawn turte pawh inauguration hi rawn ti turin kan sawm a, nimahsela kan sawm thovang a, a ti a lokal turte pawh a ni a. Chuvang chuan state dangah an tha e, tih emaw Delhi-ah pawh darkar li vel current a awm lova, an phunlo an ti a, vawiinah hian eng ang buaina nge a chhuah dawn pawh a hriat tawh lova, khutilai an power grid station a chhiat avang khuanin, khulai U.P. Power Cooperation Chairman phei chu a awmna chin pawh hriatloh khawpin tunah kan buai a ni mai a, India ram mipui maktaduai nga vel kha chu kan buai tawh a ni a. Chuvangin, state dang tih loh emaw, midang an phunlo emaw ni lovin keini state tereuh te leh inhrechiang em em mai te hi Pu Speaker, hetiang mi tam takin lo inhnangfakna leh eizawna an lo neih theihna tur anih dawn avang hianin hemi Home Guard te pawh hi nasa lehzualin an hlawh te hi tihsan a, worked charge level ang a an hlawh te pawh hi dah sak a, pension te pawh hi an neih chhoh ve zel theihna tur leh he dinhmun hi dinhmun pawimawha a awmna turin he Resolution hi ka rawn support a ni tih kha ka rawn sawi a ni. Ka lawm e.

SPEAKER : Pu K. Lalrinthanga.

Pu K. LALRINTHANGA : Pu Speaker, ka lawm e. 'Mizoram Home Guard Skilled-I Volunteer-te hi Worked Charge-a dah ni rawh se' tih Member zahawm tak Pu Lalduhoma Resolution hi a rawn chhuah atang khan sawitur kan hre ve awmlo mange aw ka ti a. Amaherawhchu, kha a chanchin kan han ngaithla a, engemaw tlema zawng chu sawi tur awm vein ka hria a. Hei Resolution puluttu hi thil timing hi a hre angreng a. Home Minister-in a rawn tarlan atang khanin sorkarin Home Guard Volunteer-te hlawh tihsanna tur file a kal mek tih kha Chawlhmmuna awm tan chuan hriat awl tak tur a ni a. Chutianga an lo hriat takah chuan tianga han tih ve then mai kha, (an hlawh tihsan tura Assembly-a han move kha) a remchangin anni tan chuan

advantage lakna tur tha ve hlein ka hria a, a timing ve hlein ka hria. Chutih rual chuanin tuna kan han ngaihthlak tak ang khan “MLA, ruling party-in resolution a putluh ang chiah mai, comma pawh danglamlo angin ka pulut a ni” a ti a, pass mai tur ang khanin a lang ve leh tlat mai a ni. A hun kha a rawn siam thiam hlein ka hria a. Mizoram sorkar hnuaiah chuan nichina kan hriat ang khanin Home Guard-te facility hi a tha tawh hle a. Amaherawhchu thil tihsual deuh a nei em aw ka ti a. Home Guard skill I a awm tawh te work charge a dah chungchangah hian ani hi mi lehkha thiam a ni a, dah theih an nih loh zia chu a hrechiang sa viauin ka ring a. Skill I ah hianin hnawk tih deuh hi a nei emaw ni chu aw tih ka ngaihtuah deuh a. Home guard skill I a awm tawh te work charge a dah tura kan pass chuan work charge a awm te dinhmun kha ngaihtuah chiang ila, PWD-ah te, P & E-ah te, PHE-ah te work charge a hnathawktute works an neih loh chuanin pawisa kha pek tur a awm dawn lova, an tawp mai dawn a ni a. Home Guard a skill I te hi work charge ah lo dah chho ta ila works a awm loh chuan an bang vek mai dawn a ni a. Chuvang chuan skill I a awm tawh zingah hian hnawk tih deuh an awm a ni mai awm mange aw tih ka ngaihtuah a, hei hi eng nge ni ka hre thiam chiah lova. Chutiangte anih chuan skill I te hi an ban mai kan duh si loh chuanin work charge a dah loh kha a tha hlein ka hria a. An tan a him zawkin ka hria a. Chutiangte anih avang chuanin rawn tarlan ve hrim hrim kha a thain ka hria a.

Vawiina kan resolution-ah hian sawi tur tehchiam pawh ka hre lo. Ka hmaa sawitu pawh khanin sawi tur a hre vak lo a ni ang. P & E-ah khan a kai ta daih mai a, khawthlang lam Serlui bialte kha a rawn kai daih mai a, chuti tehchiamin sawi tur a awm lo. Chuvang chuan keipawhin sawi tur chiam ka hre hran lem lova. Work Charge dinhmuna hlan chhoh hi a rem lo chung chung hetiang a ruling party MLA-in a resolution atana a rawn submit avanga rawn submit ve mai kha a ni a. A neitupa pawh hianin a duh tak tak nge duh tak tak lo tih pawh kha ka hrethiam chiah lova. Chuvang chuan vawiina kan resolution hi chu i pass lo mai teh ang u tiin ka rawn sawi a ni e. Ka lawm e.

SPEAKER : Pu Hmingdailova Khiangte.

Pu HMINGDAILOVA KHIANGTE : Pu Speaker ka lawm e, ka ding leh veiin an sawi tawh a, ka vei lama Col. Z.S. Zuala te nen khan dawr khatah te kan leng ho deuh bawk a. Tin, Home Guard leh Ex-servicemen-te pawh engemaw chenah Zoram hi chu kan inhnaih deuha han sawi ve te pawh a chak awm a ni. Home Guard hi a bul an tan atang khan Pu Speaker, Ex-Servicemen hoin an tanpui a. Tin, an training-na reng reng hi Army mentality nen leh training standard pawh kha Army pensioner hoten training an pek anih avangin an danglam bik a. Khangte avang kha anih ka ring a, State danga Home Guard te hman dan ni lo angin Silaite kan kentir a, silaite kan kentir avangin vawiinah pawh kan sorkar hotuten Rifle allowance te pawh an lo pek phah a ni a. State dangah te chuan kan hriat ve chinah chuan volunteer an ni a, engemaw chen an rawn thawk a, an chawl a, an ko leh a, kha ti reng reng kha a ni a. An standard te pawh hi vawiina Mizorama kan Home Guard standard hi kawngtin rengah an pha lo hrim hrim a ni. Vawiina Mizorama kan Home Guard-te hi chu an standard pangngai hian Police-ah pawh lut se an tha tawk a, Army-ah pawh lut se an danglam vakin ka ring lo. Chutiang khawpa training that te chu an ni a, an rilru, an ngaihtuahna zawng zawng leh an taksa pawh training sa vek an ni. Chungcho chu vawiinah hian duhsakna tinrengin kan sorkar chak takin a lo duhsak tawh a, total pay te pawh kan ti ve mai ang chu sangsarih/sangriat dawn lai an lo la a. Pay-ah hian duh tawk a awm lova, tha tawk ve hleah ngai phawt ila. Amaherawhchu vawiina kan Resolution kan move “Mizoram

Home Guard Volunteers zinga Skilled I chinte hi Work Charge-ah dah ni rawh se” han tih hi kan mizo thufing pakhat ka hrechhuak a. A move-tu pawh hian a hrechhuak thoin ka ring a, changela sawibel kha an ang awm hlein ka hria. Han bel dawn mah ila a theih loh, ka hmaa miten an sawi ang khan Home guard hi fel tak, training fel tak, sawisel tur neilo mah ila, heta a Skilled I chinte Work Charge-a han dah dawn hian technically-in a rem thei lo a. Project lian tak, works lian tak awm sela chumi hnathawktute chu PWD-ah leh Engineering Department-ah te chuan a thawktu tur kha a tangsa ten an daih loh avangin Work Charge-in an thawk a. Chu project chu an zawh chuan an chawl veleh mai a. Chumi engineering Department a Work Charge leh vawiina Home Guard-a Work Charge a han dah tum dante han ngaihtuah hian a inmil lo hrim hrim, a theih loh a ni. Chuvang chuan khalam kha chu kan sawi tawp hmain remchang han lak leh ka duh a.

State dangah chuan Home Guard a top post hi IPS Officer an ni a, a chhan chu Home Guard hi State Police kutah a awm thin avangin. Vawiinah pawh hian Home guard hi tunhmaa amaha a awm thin kha titawpin Mizoram Police hnuaiah an awm ve ta a. Amaherawhchu a top post No.1 hi Mizoram Home Guard Commandant General hna hi Mizorama MPS Senior Officer-in an enkawl a. Amaherawhchu a hna hi a lawk lu mai a, a lian fu mai a zawhbelhna leh zawhnaah ka rawn siam tawh kha chu a chhuak chiah lo naa zawhbelhnaah ka rawn sawi a. Tahchuan Mizoram Police Service Officer Senior Administrative Grade level hian he hna hi enkawl sela. Tin, he hna hi functional-in siam bawk sela tih khan ka rawn rawt a, chu chu ala remchang thovin ka hria a, kan sawinawn duh leh mai a ni a. Tichuan a thawktute kha an thatzia leh an fakawmzia te, an tangkaizia te kan sawi hlawm a, khang kha chu chiang sa a ni. Amaherawhchu Skilled I chin Work Charge-a han siam, han pek kha a remchan loh thu erawh chu technical hian a remlo hrim hrim a. Mizo upa tawnga changela sawibel kan tih kha a ni takmeuhin ka hria a, han bel dawn mah ila a remlo, a tla zel dawn a ni, mi nuihte pawh kan tiza palh ang a. A move-tu hian a ngaihtuah vang vang chuan tuna kan han sawi zawng zawng pawh hi kan sawi tur hi a hre vek sa thoin ka ring a. Amaherawhchu advantage pawh a awm a nge tiin ka hmaa miten an sawi tawh ang khan an sawiah ngai ila, a sual chuang lova, a demawm chuang lova. Engpawh nise, tihlawhtling tur erawh hi chuan tih chi a ni lo ve hei hi chu, tih kha ka rawn sawi ve duh a. A hnukdawh duh mai pawhin ka ring ani hi chuan, mihuaisen an tih hi chu thil diklo an hriatchhuah hnu a correct leh ngam hi mihuaisen an ni a, ani chu mihuaisen turah ngai ila. Chu chu ka sawi thiam tawh a ni e, Pu Speaker.

SPEAKER : Sawi tur kan awm tawh lo em ni? Pu R. Selthuama.

Pu R. SELTHUAMA : Pu Speaker, ka lawm e. Resolution tha tak Member zahawm tak Pu Laldhoma'n a rawn pulut a. 'Mizoram Home Guard Volunteers zinga Skill I chinte hi Work Charge a dah ni rawh se' tih a ni a. Kan thianten an sawiloh lam phenah khan thil dang hi a awm deuh emaw ni chu aw kei chuan ka ti a. Inthlan hnunung berah khan ka hresual a nih loh chuan Member zahawm tak Pu Duhoma hi Aizawl West - I-ah leh Tuivawl Constituency-ah khan a ding kawp a. Pu Piana nen hian Tuivawl Constituency-ah an inkhing tawh a. Khang avang khan Pu Piana hian rilru nei deuhin West - I lamte hi a rawn beisei ve ta deuh ang a, Home Guard lam hi hetiang hi tanchhanah a rawn hmang ta deuh emawni aw tih hi ka rilruah hei hi a rawn lut deuhhlek a. Pu Piana hian kan hotute biain khilam panga awmlo hian, West - I-ah hian ka lo ding ve ang e tih rilrute hi a rawn pu ta zawk aw tih ka rilruah a lo lang deuh a. A ni chiah nge ni chiah lo chu ka hre lova. Kha kha a move-tu pawhin a rawn sawi khan, ama rilru puakchhuak chiah pawh ni lo Pu Piana'n a tih kha a ngai ngaiin, danglamna pawh awm lo khan a rawn thehlut ve leh mai kha

a ni a. Advantage-ah hman an tum tawn emawni chu aw tih kha ka rilruah a rawn lang deuh a.

Engpawh ni sela, Home Guard hrim hrim hi Mizorama awmte hian hma an sawn ta hlein ka hria. Tunhma U.T hun te, District Council hun te kha chuan kan Home Guard-te pawh hi tun ang hian an fel zan lo deuh emaw ni, mite nuihsawh te pawh kha an hlawh deuh emawni chu aw kan ti thin a. Ral atangte pawh hian auh nawmnahte pawh kha an tawng thin a ni. Amaherawhchu, khatih hunlai boruakah kha chuan Home Guard-te pawh kha a mipui hnuailam deuh, han en pawh hian chuti lutuk lo deuh te pawh kha an awm ve hlawm ni awmin a lang a. Chutiangan, hun a lo kal zel a, tunah hi chuan Mizoram Home Guard a awmte hi an fel hlawm tawh khawp mai a. Nichina sawi hmasaten an sawi ang khan sipaiah pawh awm sela, Police-ah pawh lut sela zahpuiawm lo. Tin, Mizoram chhungah mai pawh ni lovin, State dangah te pawh duty ta sela, zahpuiawmlo tak, Mizo tan pawh chhuanawm tak an ni tawh hlawmin ka hria a. Tin, a mihring hrim hrim ka hriatte pawh hi mi fel tak tak, pianpui felna nei, mahni kohhranah te pawh inhmang, chutianga mi fel tak tak te chu an ni hlawm a. Chuvang chuan, anmahni hrim hrim atanga zuk ngaihtuah pheii chuan tuna Resolution hi pawmawm khawpin ka hria. Skill – I mai bakah pawh hian midangte pawh hi Work Charge ah hian dah theih ni nghe nghe sela, an vai hian dah theih dan awm ta sela, an phu-in ka hria. Chuvang chuanin, a Resolution hrim hrim hi chu a tha khawpin ka hria. Sesawnga an hmunpuite pawh khi a tha em em mai a. Kei pawhin ka han hmu ve tawh thin a. Khtiangan khawp khian an chei tha a. Khi khi Police Force te Training Centre a an neih te ai pawhin a chhe bik lova. Tunah Thenzawl amite ai pawh sawnin kei chuan a chhuanawm zawkin ka hre nghe nghe a. Chuvang chuan, anmahni Organization tlangpui han chhut hi chuan tun aia hlawh tha zawk leh dinhmun tha zawk hi chu an phu khawpin ka hria. A Resolution hrim hrim hi chu tihtheih chu ni sela, ka support a ni. Amaherawhchu, a Resolution hi a tihtheih em tih kha zuk ngaihtuah a ngai ta a. Chu mi kawnga zuk ngaihtuah chuan, nichinah khan kan Home Minister zahawm tak khan a rawn sawi tawh a. Hemi Work Charge hi chu Central PWD Manual lam ami a ni a. Hna lian deuh te an han thawh dawnin a hnathawktu pangngai regular worker te mai lo, chung ang chu rawih an duhin a hranpaa sorkarin post siam lovin kha a hnaa a pawisa awm atanga hlawh an rawn rawih ve thin angte tan khan a ni a. Entiran, Tuirial Hydrel Project te an ti a. Hei hi PWD-in lo thawk ta sela, mi thar a thawktu tur la lovin khu a hna atangan a pawisa sanction awm atang khan mithar an ruai zawk ang a, chumi ang atana tih chu a ni a. Tin, a hna a zawh pheii chuan khamia an lakte kha bang leh mai tur a ni ta a. Chutiangan anih si chuan tunah hian Home Guard ho chuan hemi work hranpa kha an nei ve bawk si lova. Chuvang chuan, a resolution kalphung hrim hrim han en hian thil tih theih loh niin alang ta a. Chutiangan alo nih si takah chuan hei a mover hi hemi tuna a member zingah pheii chuan a senior pawl pawh a ni a. Term 2(hnih)-na a ni tawh a. Tin, mihring mihrinna lamah pawh a fel a, a fang fel a, sorkar hna lo thawk tawh IPS Officer te lo ni tawh a ni a, keini ai chuan a hre daih turah kan ngai a. Chutiangan anih chuan uluk taka han ngaihtuah pawh hian atir atang khan tlang turin a ngai bik miah lovang tih hi kei ka ring sa a. Engpawhnisela, tlang lemlo mahsela kan bialah te hian kan la din leh duh dawn chuan anni vote han hlawm deuh vote engemaw zat han hmuh theihte pawh a tha ange tih rilru te pawh kha an pu tel ve ngei ang tih kha a rinawm a. Chuvang chuanin, a tlang chiah ringlo mahsela tute emaw lawmzawng han sawite hi chu a nuam ve bawk a, chuvanga rawn tichho deuh mai te pawh chu niin a rinawm a. Chuvang chuan, uluk taka hetia kan han sawi tawh hnu hi chuan Synod khawmputena, ani Synod khawmpuiaah te pawh telve fo thin hei hi kan sawi khawm a, a resolutionnilo hi kan sawi khawm a, sawi khawmna hi kan duh tawk e ti ve mai a, pass lem lova han tihchhoh mai chi hi niin alanga. Chutiangan ang turte chuanin amah ngei pawh hian han withdraw em chu ni lovin sawikhawmna hi kan duh tawk e ti ang hianin a

rawn tichho thei mai lawmni tih kha kan sawi duh chu a ni e. Chu chu ka sawi theih tawk a ni e Pu Speaker, ka lawm e.

*Speech not corrected

SPEAKER : Tunge sawi leh dawn le? In awm tawhlo em ni?...aw.. Pu K. Liantlinga.

Pu K. LIANTLINGA : Pu Speaker, hun tha tak min pe a, ka lawm e. Hei wawiina kan resolution hi “Mizoram Home Guard Volunteer zinga Skill-I chinte hi Workcharge-ah dah ni rawh se” tih a ni a. Kha an sawi tam viau tawh a. Tin, kan Minister-te pawh khan a sawi tawh a. Helai hi nia, Home Guard pawimawhnate kan hria a, kan ram venhimna kawngah Bank-ah te, VIP leh Godown hrang hrangte leh hmun pawimawh dangah te pawh duty thin an ni a. Helaiah hian Police ang chiah em em an nih loh avang leh volunteer angtea kal an nih avang hianin an dinhmun hi resolution hmasaah chawisan, tihsan an lo ni tawh a. Thil hrang hrangah a lawmawm rual rualin uluk deuh zawka thil ngaihtuah chu a tulin ka hria a.

Tin, kan ramah hian thil fel vaklo leh tha vaklo kan politics kalphung hi party feeling leh rulling leh Opposition, Opposition thiltih chu paihthlak duh hrim hrimna te, hetiang han awmte hi a pawi em em a. Tin, Treasury Bench lampangte pawh hian chu chu a tha e tia lawmthu sawina ringawt lo deuh hian kan ram tana thil tha leh tul, pawimawh ang chi te ngaihtuah hian resolution hi siam thin sela, a thain a rinawm a. Tuna an han sawiah pawh khanin, ruling lampangin an putlul tho a ni a. Amaherawhchu wawiinah Opposition lam atanga putlul anih avanga khati taka han sawisel leh te pawh kha a dik ber angem aw? a tih theih a. Ruling putlul chu nise chuan a tlang leh anga, tlemin hmanna kan tih ang deuh khanin patent error a awm a, hei hi tidanglam deuh hret ila, i siamtha mai ang u hmiang, han tih theih mai te pawh kha a nih a rinawm tho a ni. Entirnan, ‘Workcharge’ han ti lo deuh te pawh khan a level, a tlukpui deuh hleka regularize han tih emawte pawh khan patent error an ti ang a. Hmanni te pawh khan dik tak chuanin Bill, a aia pawimawh awm chuang lo Dan, ram inenkawlna turah pawh a cloused a pumpui maite kha delete ngai khawp khan a’n awm a full sentence te delete ngai khawpte pawh kha patent error-ah khan kan han pawm lut kha a ni a. Chu chu House-in lungrual takin kan ti a. Wawiinah pawh hian uluk taka kan ngaihtuah ngai chu, Ruling leh Opposition lam emaw sawi lovin wawiin atana Home Guard-te tan thil tha turah hian harsa awmin ka ring lova. Ruling lamte hian an duh leh duh loh a ni mai a. Dik tak chuan an hmasawna tur leh an thatna tur passed a nih loh chuan tawngkam thiam takin sawi mah sela, an rilruin duhsakna tak tak an nei lo aniang a, a tih theih a ni. Nei se chuan kan han siam danglam hret ang a, workcharge level-in dah ni rawh se, han tih pawh kha workcharge level an nih chuan engemaw chenah IVth Grade emaw, a aia chung hret emaw kha an ni pha thei dawn a ni tihna angah pawh ngai ta ila.

Tin, kan sum leh paiah pawh hian engnge a chhan ka hre lova. Home Guard hi 232 vel, Central-in a rawn sanction si, laklohte pawh hi an awm niin a lang a. Hengah te pawh hian lak a theih lo’ m ni? Sum leh pai hi kan ui viau em ni? tihte pawh a ngaihtuah theih a. Kan House leader zahawm takin Plan Budget-te pawh a rawn tisang a. Rs. Vaibelchhe 600 zeta sang hi Home Guard lakna turah State matching share-a pek ve turte kha pein ruahmanna siam chho sela a thain ka ring a. Tin, politics-ah hrim hrim hian dan hnuai leng anga kan inngaih tlat chuan, Danah chuan a theih loh alawm, kan tih hi, Politics level-ah chuan thil

theih loh hi a awm tur a ni lova. Thil theih loh hi tithei tura inruahman tur a niin ka hria, dan chu a siamtu kan ni a, a theihlohna dan chu, i her rem hret mai ang u hmiang, a theih dan a awm mai lawm ni? tih te pawh khan kan ngaihtuah a ngaiin ka hria, rilru zau tak i hmang ang u. Tam tak hi chu sorkar hna lo thawk tawhte pawh an awm a. Tumah ka zuk demna nilovin sorkarina dan a siamah hian, sorkar hnathawk chu an thawk mai a ni. Amaherawhchu Assembly rorelna hi chu (Legislator) dan siamtute an nih avangin dante hi siamtha a, a theih loh kha theih tir dan ngaihtuah a ngai a ni. Chutiang ang rilru chu zau takin kan put a ngaiin ka hria a, dan pakhat hnuaiia kun tlat lovin.

Tin, min ka tawng lo haw lo sela, tun tuma Legislator zingah hian ukil lamte pawh kan thahnem deuh a, kan thusawi pawh hi a ukil deuhin, a point a han inlaka, han inkher fek fek te hi a awm duh a, politics-ah chuan awmlo sela. A zau thei ang berin mipui tana tha tur leh ruahmanna ang hawi zawng hian ke kan pen hi a tulin ka hria. Chutiang chuan vawiinah pawh hian ngaihtuahna zau tak neiin ruling MLA zawng zawngte leh opposition MLA zawng zawngte pawh hi ka sawm duh che u a, ruahmanna tha kan siamte pawh a ngaiin ka hria. Chuvang chuan helai error tlem awm pawh hi her danglam hret ila, chuan i siamtha hret mai ang u hmiang, tihna te pawh neiin Home Guard-te hi duhsakna thinlung tak tak ruling-te hian nei sela chuan, thil harsa niin ka hrela. A chhan chu dan siamtute kan nih avang khan ruahmanna fel leh fai tak, kan tih hi a ngaiin ka hria a. Chungte chu vawiinah hian he resolution support-na atan hian ka'n sawi ve duh a, chuvang chuan "Mizoram Home Guard volunteers zinga skill I chin te hi work charge-ah dah ni rawh se" han tih hi rilru thianghlim takin lungrual taka pass turin kan member zawng zawngte ka'n sawm ve che u a ni e. Ka lawm e.

SPEAKER : Pu C. Ramhluna lo sawm ang.

Pu C. RAMHLUNA : Pu Speaker, ka lawm e. Hei tukinah hian Home Guards chungchang thu kan han sawi leh chu a ni a. Kan House-ah hianin Home Guard chungchang thu kan sawi ta zeuh zeuh a, lawmawm hlein ka hria a, anni ho hi volunteers anga ngaih kha an ni a, kan hria a. Tichuan, sorkar hian fel takin anmahni enkawlina tur pawh a ruahman a, tin, a ngaipawimawh viau anih ka ring a, an Commandant General te hi MPS atanga awm deuh furte kha an ni a, chuvang chuan hei hi ngaihtuah ngai tak pawh a ni reng a ni tih kha a chiangin ka hria a.

Tin, thil tih theihloh anga ngaih tlut hi House hian kan tih tur a ni em aw tih ka ngaihtuah deuh a, a chhan chu Dan siamtute kan ni a chuvang chuan thil tha ni a kan hriat chu kan siam mai tur a ni a, impossible anga ngaih fo hi thil tha niin ka hre lova. Hmanah pawh khan ka sawi tawh a, Napoleon-a chuanin 'impossible is the word found in the dictionary of fools' a ti a, 'thil tih theih loh tlat hi chu mi a te dictionary-a awm a ni e' a ti a, chuvang chuan keini hi chuanin a thaa kan hriat na na na hi chu kan siam mai tur a ni a, Dan siamtute kan ni a, chuvang chuanin kan passed chuanin Dan kha chu kan siam chho leh mai anga chumi Dan pawh chu kan hunchhung hian kan siam anga kan passed leh mai dawn a ni a. 'Mizoram Home Guard volunteer zinga skilled I chinte hi worked charge-a dah ni rawh se' tih a ni a. Ni rawh se kan tih kha chuan a nihdan tur kawng kha chu Home Department-te khan an siam anga kan passed veleh mai ang a.

Tin, chubakah hei worked charge kan han tih ho hi work atanga an hlawh hi pek an ni e kan ti a, a dik thova, mahse an tihdan anga kan hriat ve mai mai hi chu dik ber lo maithei a, an hlawh zat tur an tuk a, tikhan Budget-ah khan dah sak ve mai ang u work charge an ni e an ti a. Tichuan, PWD te, P&E te Budget atang khan an pe ve a ni mai, plan fund ang deuh khan an kalpui ve a, kha kha a ni deuh mai a, a hming khan an kalpui kha a ni deuh mai a. Work kha a awm loh pawh khan Budget-ah an dah thova, an la ve reng mai a. Kan kawmchhakah khianin pasal sun a awm a, ani pawh khi work charge-ah khan an dah a, hmeichhia a ni a, hna han thawk vak thei kha a ni lova, work charge khan a thawk ve reng mai a, work a awm loh pawh khan a la ve reng mai a, churang chuan a hming kha a ni deuh mai a, anniah pawh khian. Churang chuanin tlema an changkanna tura Home Guard-ho tlema uplift an nih ve deuhna tura Skilled 1 chin hi i dah chho ang u tih kha chu ui em em turah pawh ka ngai lova, tin, tam pawh a nih ka ring lova.

Tin, kan lo enkawl dan hi, hei a Rule-te pawh kan nei a, notification atang khan kan hre mai anga, ka'n en mai mai a, a tha fu a, ki hrang hrangte pawh kha an lo nei ve a, mahse duh angin kan lo enkawl tawklo tihte pawh kha a chiang reng mai a. Tuna vacancy 232 kan neih rengte pawh kha engatinge tun thlenga kan fill loh tih kha ngaihtuahna a kal thui viauin ka hria a, churang chuanin hetiangna kan han sawichhuah hi anmahni tan pawh khan a hlawkpuiawm hle dawnin ka hria a. Vawiihah ringawt pawh hian Home Guard post vacant 232 awm Govt. of India leh State-ten kan share theih reng si engatinge kan fill loh tihte pawh kha vawiih atangin kan hriatchhuah phah leh ta a ni reng mai a. State sorkar pawhin hei hi hmalakna tur kawng ni te pawhin ka hria a.

Tin, chubaka ka sawi leh duh chu Pu Speaker, hei CAG Report thar ber kha ka'n en mai mai a, kum 2002-2011 inkarah khan agency 9 hian Home Guard ho hi an lo hmang a. FCI Rengtekawn te, FCI Bairabi te, PGCL Luangmual te, AR Tuikhuahtlang te, AIR Chawnpui te, FM Radio, AIR Chawnpui te, Apex bank te, Rural bank te, Lengpui Airport te. Tichuan kum 10 chhunga Home Guard an va rawihna man kha tunah hian 2.79 crores a tling daih a ni. Kha kha anmahni rank ang khan AG khan an lo chhut sak a, kum 10 chhung kha an thing char char ta a, Lengpui Airport ami hi mi 5 an ni a, anni hi kum 10 chhung khan 15.57 lakhs kha an thawhna man a ni ta a. Lengpui Airport chuan hei hi a pe a. Agencies 8 dangho hian an la pelo a, chumite la pekloh ho hi 2.64 crores a tling daih mai a, kum 10 chhung khan, kha kha kum khat chhunga han chhut sak khan 28 lakhs vel a tlingin ka hria. Lehlamah chuanin skill-1 ho kha work charge angin hlawh lo pe dawn ta ni ila, agency-ina an hlawh an lo pek tur ang zat pawh kha skill - 1 ho hi kan pein ka ringlo. A chhan chu tunah hian a sangberin Rs. 9000 vel thlakhatah a hlawh pha kan ti a, work charge-ah chuan Rs. 15000 vel emaw a hlawh chho thei mai thei a, Rs. 15000 mi 6 tan han chhut khan Rs. 180000 vel a hlawh pha a ni mai a. Chuan 20-30 vel awm ni ta ang se, cheng nuai tam anih ka ringlo reng reng. Churang chuan thil huphurh awm niin ka ring lo a. Churang chuan helaia keini roreltuten thil tihtheih a ni love han tih ringawt hi a dik pawn ka hre tho. An work kha a ni ve mai a, lehlamah chuan kawng va laih tawrh tawrh leh kawng laih leh insakna a work kha work a ni chuang bik lova, anni pawh khan kha kha an hnathawh tur a ni mai a, an title job kha a ni ve a, khami atang khan an va thawhnate khanin agency-ah khan pawisa kha an chhunglut tur kha a ni ta a. An rawn chhunluh kha an ei ve dawn angah pawh lo ngaihsak ta ila kumkhatah 27 lakhs kha an thawk chhuak thei tlat a ni. 100 leh tlem an ni a Home Guard an rawih ho hi. Hengte pawh hi State sorkar hianin outside the state agency an ni mah mah, FCI te, AI te an ni mah mah a, khang ho khan an theih ang bera Home Guard hoina an va thawhna hlawh kha State sorkar hian a rang thei ang ber an rawn pek vat hi a tul a nih hi

mawle tih kha telh duh an awm a, chu chu kan sawi chhuak tel duh bawk anih chu. State sorkarin tan a lakna tur kawng a ni a. Khatiang khan an hlawh turte pawh kha a ngaihtuhsak mai tur niin ka ring tlat a, an thatna tur a ni ve a.

Tin, chubakah incentive tha tak a ni dawn a, an hnathawhte pawh kha an lo tui ve zual anga, churang chuan Pu Speaker, vawiina kan resolution hi i hnawl mai lo teh ang u. Helampang leh sawlampang tih a hnawl ringawt hi thil uiawm tak a ni a, a chhan chu a merit of the case hi ngaihtuah ta ila, sawi tawh ang khan dinglam atang pawh khan a awm ve tho mai a, joint resolution ang pawhin a ngaih theih nghe nghe reng kha a lo ni a. Pu Speaker, vawiina kan resolution hi pass ngei nise thain ka hria a, ka rawn thlawp a ni e.

SPEAKER : Sawi tur kan la awm em? Pu Chawngtinthanga.

Pu CHAWNGTINTHANGA : Pu Speaker, sawi tur tamtak pawh ka hrelo a, amaherawhchu tlem azawng han sawi ve tulin ka hria a. Resolution neitu Pu Lalduhoma hi tluk loh rim a namin ka hria, a hun takah tih awm tak hi a hre thei riau mai a, kan hun tir lamah pawh khan Home Guard-ho duhsakna tha deuh mai resolution a rawn siam a, khami ang khan kan Home Minister-in a sawi angin file-a process mek a nih avangin leh Home Guard hi tuna sorkar hian a duhsak em avangin thil tha tam tak a lo ni tawh a, a ropui hlein ka hria kumkhatah out-pass ni riat an nei thei a, paternity leave ni 15, maternity leave ni 45 te, medical leave ni 30 tih angreng te an nei thei vek a ni a. Tin dah ngheh theihna Department hrang hrang Excise, Environment & Prison-ah te hian a fel leh a tha tan reserve sak vek an ni a, chhiat tawh thuah pawh a nuai tel ralna tur te, family free medical pek an la ni zui zel te hi a ropui hi ka ti em em a.

Tunhmaa thil la awm ngai reng reng lo he sorkar hnua thil awm thar ta te a nasa khawp mai. Kan hriat tawh angin Ration allowance nei ngai reng reng lo kha Rs. 550 mipakhatah pek a ni a Riffle Allowance pawh mipakhat Rs. 25 pek an ni a, tin, rank pay-te pawh pek an la ni lehzal a, land corporal hi Rs. 100 pek a ni tawh a, surgeon kha Rs. 180-in a pung chho dawrh a, CQMS hi Rs. 220 a ni. Kan hriat ang khan Home Guard-a a hniam ber pawh hian Rs. 7750 an lo hlawh tawh a, India ram puma Home Guard enkawlna chungchangah hian Mizoram hi a titha ber dawttu a ni tih pawh kha kan lo ngaithla tawh a, an duhsakna a sang em em niin ka hria. Kan chhawr tangkainate leh an hnathawh hah avangte hian duhsak pawh an phu reng a, vawinah hian an chungchang han ngaihtuah a, hei aia tha zawk pawha han tih hi engemaw ti kawng chuan kan state sorkar hian tlin selang chuan a tha hle pawhin ka hria. Amaherawhchu vawiina Resolution hrim hrim pawh hi kan han en hian a wording tak mai hi a buai tlat mai a, skilled I chin hi work charge-ah dah ni rawh se, work charge-ah dah ni rawh se tih ringawt mai, he thu hi member zahawm tak Pu Liantlinga khan a dan zawnga inkheuh neuh neuh lovin a tha a nih chuan keini hian dan siamtu kan ni a, kan pal pawp mai tur a ni lawm ni, thil tha chu dan atangin a siamtu kan ni a kan ti mai tur alawm tiin Pu Speaker a sawi a. Khatiang zawnga han ngaihtuah chuan politics-ah hian engkim a tih theih, dan siamtu kan ni tiin kan han sawi ngawt thin a, amaherawhchu democracy-ah pawh hian dana phuar vel kan ni tih hi chu kan hriat reng a pawimawh tlatin ka hria. India ram democracy ropui ber leh lian ber kan tih thin hi danin min phuar vel tlat a, constitution tha tak kan nei a chu chuan min phuar vel tlat a, Legislature pawh hian dan kan siam dawn reng rengin a guide lines-ah chuan

dan zawng zawng hi constitution kalhin kan siam thiang lo a ni bur ringawt a ni tih kha kan hriat a pawimawh a, chuvangin constitution en karin thil kan tih a ngai a.

A dawt lehah chuan National Policy an rawn duang a, Central sorkar-in constitution hnuaiyah, kha National Policy kalh reng reng lova dan kan siam hi a ngai zel bawh a. Nichinah khan kan ngaithla tawh a, kan member zahawm tak Col. Z.S. Zuala te kha Home Guard Mizorama a inception-ah khan theih ang tawka he Home Guard laluttute zingah khan an lo tel alo ni a. National Policy-ah chuan Home Guard hi State tinah ram leh hnam venghim turin an tangkai dawn em a volunteer-in, India sorkar pawh hian engemaw zat scale pein hman tangkai theih a ni ang ti a policy an rawn duang niin a lang a, chutiang chuan kan kal mai a ni a. Keini an thawk ta lawka vawiinah, kan duhsak avanga work charge-a han leh chu, han lehlin chhoh ngawt mai kha chu, kan tifuh lovang tih hi ka hlau deuh nghe nghe a. Tin work charge hi a nihna tak takah chuan work-a va charge tur a ni tih kan hai lo, tumahin. Nichina kan member dangten an sawi tawh ang khan work department PWD te, PHE te, P & E te hian regular employees-ten an hnathawh tur neih kha an enkawl na a indaih sen loh vanga enkawl tur bik work-a an charge mai turin lak theihna an nei a, Central PWD manual volume-I ang khan an la a ni a, Zoramah hi chuan an dinhmun a tha viau, tlemin an her danglam hret a, a nihna takah chuan kha work kha lo zo se bang mai tur an ni. Tin member zahawm tak pakhatin a rawn sawiah khan budget-ah an hlawh tur dah ila work charge te hi tih kha, work charge hlawh tur hi budget-ah an dah ve ngailo. Work nei te khan an work-ah khan an va charge mai a, khata tanga an hlawh kha pek mai thin niin ka hre ve a, ka hriat danin. Chuvang chuan Home Guard hi tunah hian duhsakin PWD department-ah emaw PHE department-ah emaw, P&E department-ah emaw work neihnaah hianin va dah ta ila, engtik niah emaw work kha a zawh hunah anmahni kha ban an ngai leh mai dawn si a, tuna tha taka rei tak hnathawk thei tur hi kan duhsak luatah hian kan tawrh tir zawk ang tih pawh a hlauhawm a. Chuvangin tuna a wording ang ang hi chuan pass mai theih niin ava lang lo ve? hun remchang zawkah duhsakna hi chu resolution dangah kawng dangin a la her rem theih lawm ni, tunah hi chuan pass chi ava ni love? tiin ka rawn sawi a ni e, ka lawm e.

*Speech not corrected

SPEAKER : Awle, kan hun alo tawp leh ta a, dar 2:00 P.M.-ah kan sawihona kan chhonzawm leh ang a, chumi hma chu i lo chawl rih ang u.

Sitting adjourned at 1:00 P.M.

2:00 P.M.

SPEAKER : Sawm leh pakhatin kan sawi tawh a, tunah Pu K. Lianzuala.

Pu K. LIANZUALA : Pu Speaker ka lawm e. Hei waviina kan resolution hi a puluttu Member zahawm tak hian ngun tak leh chiang taka ngaihtuahna atanga thehlut a ni lo deuh mai awm mang e aw ka ti a. A chhan chu ani hi helaiyah House-ah pawh kan Member zahawm, kan chhuanvawr a ni a, a dan leh hrai lamte pawh hre zawk ni turah ka ngai a. Tin, a thehluh dawn khan kan Member zahawm tak Pu Piana hian a sawi a, kan han thehlut tur kha tikhan a han thehlut chawp a ni a, tiin a sawi a. Chuvangin tum lawkna tha tak nena thehlut

anah hmel lohva, chuang chuan inngaihtuah ngun thei deuh sela a tha awm mang e aw tih ka ngaihtuahnaah a awm deuh va.

Tin, Home Guard ho hi kan ngaihtla tawh a, Mizoramah an service a pawimawh hlein ka hria a. Sorkar pawn a duat a, tuna kan sorkar mek pheih hi chuan nichina kan Home Minister-in a sawi ang khan, an dinhmun hi a hrechiang a. Duhsakna leh malsawmna awm thei ang hi an la hlawm viau tawhin ka hria a, an lawmpuiawm pawh ka ti a. Tin, wawiina kan sorkar mek hian sorkar hnathawkte dinhmun hi a ngaipawimawh a, nasa takin an dinhmuna tih theih awm hi chu a tihsakin ka hria a. An hlawh chungchang a ni emaw, an service chungchangah pawh. Chuang chuan wawiina kan sorkara hotu, kan House Leader te leh kan Minister te pawh an fakawm ka ti a, an chungah hian Sorkar hnathawkte pawn lawmthu an sawi turah ka ngai a. Home Guard hi discipline an nei tha a, kan sipai, kan police te ai mah pawh hian discipline an nei thain ka hria a. An duty-na hmunah hian an titha viau zel a. Thingtlangah Rural Bank leh Bank-hoah te pawh hian duty tura kan hman hi an ni deuh vek mai a ni. Tin, service danga an va luh pawh hian discipline tha leh a che tha hi an ni deuh vek mai a ni. Chuvangin kan Home Guard hi wawinah hian Mizoram sorkar tan hian a hlu hle te hian ka hria a. Tichuan an hun kal tur atana duhsakna ruahmannate pawh a awm zel turah ka ngai a.

Amaherawhchu, nichin khan kan Home Minister zahawm takin a sawi a, Workcharge Skilled I te, work charge-a dah chungchang kha a sawi chiang hlein ka hria a. Budget-ah pawh dah an nih ngailoh thute kan ngaihtla a. Workcharge chu a chiang mai a, work va charge-na tur awm lo na na a han inhlan chhoh kha dan leh hrai a ni lo hrim hrim phawtin ka hria a. Tin, hei Engineering Department te leh Department dangte pawhin an ti thin a, an hna/work-in a zir chuan hna/work an neih chuan Workcharge kha an la mai thin a, an awm loh chuan automatic-in an chawlh leh a ngai thinin ka hria a, chutiang chu an dinhmun a ni a. Tin, Home Guard volunteers te hi 1028 an awm mek niin ka hria a, an thahnem viau va. Tin Skilled I-ah hian 456 lai an awm a, a resolution neitu khan nichina kan thianten an sawi ang khan hlawkpui tur ang pawh ni ta se hlawkpui tham fe an ni ve hrim hrim mai a, 456 zet skilled I kha an awm mek a ni. Tichuan Home Guard volunteer 1028 lai an awm bawk a, kha kha nichin khan an sawi fuhlo deuhvin ka hria a, kan sawi ve leh duh a. Tichuan, tunhmaa la awm ngailo Rifle Allowance te leh thil dang dang kha an lo pe tha hle tawh mai a, wawiina kan sorkar hian. Kan ngaihthlak tawh ang khan Punjab state tih lohah chuan Home Guard te dinhmun state sorkarah titha ber, siamthat sak ber kan niin ka hria a. Hei zu tehkhin phak pawh a ni lova, Punjab state te chu kan hria a, state hausa leh ngelnghet an ni a, anni tih theih ang kha keini dinhmunah ti thei kan nilo hrim hrim mai a ni. Chuvangin, Home Guard-te duhsakin han ti dawn pawh ni ila, a charge-na tur work pawh a awm bawk si lo, a kawng hi a kaw lo niin ka hria a. Chuang chuan, a Resolution neitu zahawm tak pawh hian hei hi ngaihtuah let chiang thei se la, wawinah hian hei, hun tam tak kan khawhral a, a hlu si a hun te, han inhnuk hniam thei mai se a tha mang e aw, tih hi kei ka ngaihdan a ni a. Han sawi thui tur pawh Pu Speaker, ka hre hran lova.

Vawiina kan thil tih hi pass chi niin ka hre lova. Kan hotute leh kan Member zahawm takten an sawi ang khan va charge-na tur pawh awm lo, sorkar pawhin an dinhmun tur a ngaihtuah mek reng laia kum sawm zet hun kal tawha benefit advantage an hmuh loh te wawiina sorkarin a pek zel lai a, thil theih ni se sorkarin a tih duh em em a ni. Theih loh chung leh thil awm ang lo han tih hi a remin ka hre lova. Chuvangin, he Resolution hi wawinah chuan a neitu Member zahawm tak hian han pawthla lehin han inhnuk hniam thei mai sela a tha awm mang e aw, tih kha ka ngaihdan a ni a. Chu te zawng chu ka'n sawi ve a ni e, ka lawm e.

SPEAKER : Tunge sawi leh dawn? In awm tawh lo em ni? Pu P.P. Thawla.

Pu P.P. THAWLA : Pu Speaker, ka lawm e. Resolution pawimawh tak mai Pu Laduhoma putluh 'Mizoram Home Guard Volunteers zinga Skilled-I chinte hi Work-Charge a dah ni rawh se' tih hi mahni mimal tan mai hlawkna ngaihtuah a ni hauh lovang a. Mizoram pumpui tana thil tha tur, thil tangkai ni bawk si ngaihtuahna atanga rawn putluh a ni ngei ang tih ka rilruin ka pawm nghal a. A tira a Resolution neituin a rawn sawi tak ang khan amah mai pawh ni lovin Ruling Member lam atang pawhin he Resolution ngei hi a pawimawh tiin a thehlut tawh a, mahse balloting-ah khan pawhchhuah a nih tak loh avangin vawiinah hian sawi tel loh mai a ni tihte pawh kha kan hria a. He Resolution pawimawh tak mai vawiina he House zahawm taka kan sawiho thei hi a sawitu nih pawh thil chakawm tak mai, sawi nuam tak mai a ni a. A ngaihlut tan, a bik takin Home Guard service-a awm mek tan pheii chuan House zahawm taka sawi mek lai hian a phurawm hlein thil lawmawm tak a ni ang tih hi a rinawm a. Tuna kan Home Minister zahawm tak hi Home Guard-te dinhmun hrechiang ber tur a ni pawhin ka beisei a. An dinhmun tangkai dan te, duhsak an phu leh phu loh dan zawng zawng pawh Resolution hmuh rual rual hian rilru ngaihtuahnaah kan hrethiam sa vek thovin ka ring a ni.

Mizoram hi Government of Mizoram kan nih hi kum 40 a kal mek tawh a. Chutih chhungin party mal rorelna chang zing ber chu tuna rorel lai Congress Party hi an ni a. Mizoram Home Guard UT kan nih hnuah kan lo neih sa kal zelah pawh mumal taka Mizoram sorkarin hman tangkai an nih theih nan dan siam kum 1985 pawh hi Congress sorkar lai tho a ni a. Kum 2010-ah khan Home Guard Volunteer hote an hlawha allownace tlem an hmuh belh theihna tur siam pawh khan tun sorkar chhung kha a ni thova. Chuvang chuan, Mizoram Home Guard-te bul intanna leh hma an sawn zel theihna atan chuan mawhphurhna an nei bik a niang tih te pawh ka rilruah ka ngaihtuah hial a ni. He rorelna chak tak mai sorkarna kalpui mek lai hian a sawi leh pawh hi thil hun tak niin ka hria a.

Pu Speaker, tun sorkar hi Mizoram sorkar kal mekah, kal tawh zawng zawngah plan sum a pun san lai ber a ni. Vawi leh khata vaibelchhia 600 lai plan sum rawn pung ta mai chu lawmawm kan ti tlang a, chutianga plan sum nasa taka alo pun kum a, kan sipai ho tangkai tak mai, Home Guard volunteer ho dinhmun alo that zawk theihna tur leh anni pawh tun aia ti tak zawka, sincere zawka an rawngbawl hna an thawh theihna tur chungchang sawi a ni leh hi lawmawm ka ti hle a ni. Tin, tunah Home Guard ho dinhmun tlangpui chu office lama thawktute regular bik ho zawng zawngte hi za chuang vel an ni a, skill – I a thawktute tuna ka hma lawka rawn tarlan kha 456 an ni a rawn ti a, a eng ber nge ni move tu khan 502 an awm a ti bawk a, a dik zawk pawh a hriat lem loh a, mahse sipai number dik tak hi chu danglam zung zung thei a nih bawk avangin 500 bawr vel chu skill – I-ah hian an awm tih chu a hriat mai a, tin Skill – II ah pawh 518 vel an awm tih a hriat bawk a, an zavaiin 1028 vel chuah an ni. Post ruak awm teuh te pawh kha he Home Guard te dinhmun hi kan siamthat sak zawk chuan kan thangtharte zinga tangin mi tam zawkin he volunteer rawngbawl hnaah hian an lut duh ang tih a rinawm a, chuvang chuan tuna kan rel lai hi pawimawh ka ti khawp mai.

Tin, Mizoram Home Guard volunteer mah nise kan hman tangkai dan chu police te ang thoa hman an ni a. Hei keini Legislator-hoah te pawh hian Home Guard ho tuk leh zan kan hmu a, an chet dan te, an duty dan te, an phaktawk anga an sincere ve dan te, tuk leh zana hmutu kan ni bawk a, anmahni dinhmun diktak han ngaihtuah chuan volunteer tih

hming pu mahse an rawngbawl hna leh an pawimawhnate kha chu police service te ang tho khan kan chhawr tangkai ve a, hmun hrang hrangah Mizoramah, members 1000 vel chauh ringawt hi a tawk lo hle a, kan mamawh belh zel dawn a ni. Amaherawchu, chutianga kan mamawh em em lai chuan an dinhmunte tlema chhungkaw chawmna thama kan siam ve deuh loh chuan tam tak tan chuan an lut duh lo te pawh a ni maithei. Chuvangin Pu Speaker, tuna kan sorkar chak tak hian ro a rel lai ngei hian Home Guard ho dinhmun 1985 a Dan kan lo siam sak tawh tlema 2010 a kan han thual tak kha a aia tha lehzualin Skill – I ho tan work charge hlawh an laka taima zawk leh thahnemngai zawka ram rawng an bawl theih nan, an duty-te an pek theih nan a pawimawh hlein ka hria a. Keima mimal ngaihtuahnaah chuan an volunteer hun chung hi kum 60 an tlin chuan tih hi, heta kan awm chhung leh legislator home-a kan awm chhung hian chu Home guard volunteer pakhat chu mi sincere tak mai a ni a, mahse ama kum dik tak kha 60 alo nih chuan a haw nal nal mai a, pension pawh a awm chuang lo a, 65 thleng te pawn extend ta ila, an la tlin viau te pawh ka ring bawk a. Mahse khang kha chu resolution pawn lam sawi dana awm mai ni ta sela. Chutianga chu a nih avangin Pu Speaker, he Mizoram Home Guard volunteer ho hi an tana beiseina sang zawk, kaisanna chi khat a ni mai a, chuta kawng hawnsak lehin skill – I a kum rei deuh lo thawk tawh ho tan hian workcharge-a an luh theihna dan hi siamsak leh ta ila, an tan pawh a lawmawm anga, a ram pawn nasa zawkin kan chhawr tangkai a beiseiawm zawk bawk a. Chuvang chuan, he resolution pawimawh tak mai member zahawmtak Pu Lalduhoma`n a rawn luhpui, ‘Mizoram Home Guard volunteer zingah Skill – I chinte hi workcharge a dah ni rawh se’, tih hi Pass ngei atan ka support a ni e. Ka lawm e.

SPEAKER : Pu T.T. Zothansanga.

Pu T.T. ZOTHANSANGA : Pu Speaker, ka lawm e, hei a rawn support tu lam atangin kan member zahawmtak Pu Liantlinga leh Pu P.P. Thawla khan a rawn sawi a, anni pawh khan dar hmasa thleng an sawi thleng lo ve zel mai a, hun an han dil belh zel kha a ni si a, an support dan kha a chiang lo em ni? tihte ka rilruah a rawn awm a. Pu Tlinga phei chu hun dil belh hial tura ka ngaih lai khan dar hmasa pawh kha a sawi thleng lo kha a ni a, ka rilruah hian a awm a ka han sawi a ni. Pu Speaker kan resolution putluh thin hi fimkhur ngai khawpin ka hria a, mahnia Mizoram tana pawimawh lutuk nia kan ngaih leh loh, ka tawng min lo ngaidam sela, Dr. Ambedkar-te daih kan zuk vei a, he kan ram chhungah hian vei tur a tam khawp mai a, hetiana eng emawa section leh society ang vel lekina an lo buaipui tur ang chi Election Oriented lutuk ang chia kan kal kan kal ang hi a fuh lo em aw? ka ti a. Tin, kan hotute tho an ni nain, heta resolution tam tak, lawmthu sawina kan han tih ang chi pawh hi a tha ka ti chuang lova.

Hei kan Resolution copy hi kan en ngar ngar a, Pu Liantlinga`n a rawn tih hi chu awm ka ti khawp mai a. Tin, keimahina ka rawn tih pawh kha, kei chu ka thu hi kan duh hleuh hleuh thin khawp mai a, ka thehluh kha kei pawhin awm ka ti tel bawk a. Hei, ka resolution hi hman atang khan a tlang hlei thei tawh thin lo va, ka ui khawp mai a. Mizoram Urban Area Control Act, chung chang kha kan House hian mumal taka adopt leh hi ka duh avangin, hei Aizawlah in luah man a to si a, a ai to zawka Sharma-te hoin an luah duh dawn chuan kan inhnawt chhuak zung zung mai si a, khatiangah khan mumal deuhva dan han zam felte kha tha ka ti a. Amaherawchu, vanduai thlak nge ni ka hre lova, kan ram leh kan ram mipui tan thingtlang miten he khawpuia kan chhen fak ber tur kan siam theihna tur kha han sawi vak kha ka han chak a, amaherawchu a rawn chhuak miao si lova, pawu ka ti khawp mai a. Engpawh ni sela, Resolution kan tih thinah hian he kan ram mipui nawlpuiten kan

hman tangkai theih tur ang hawi zawng hianin ram hruiute pawh hian kan mit leh beng kan len a thain ka hria a, chu chu thu hmaah ka han sawi duh a.

Pu Tlinga Resolution-te pawh kha Zoramah ran vulh tam tak kan awm a, NLUP te nen khatiang khanin han tihchhohna turah pawh pawimawh tak a ni a. Ani pawh vanduai thlak takin a chhuak lo hlah mai a, a pawl ka tihpui angreng khawp mai a.

Hei, Pu Duha Resolution hi, Pu Duha hi Mizo fate zingah chuan ka mi ngaihsan berte zinga mi a ni thin a. Tunhma IPS a nih lai phei kha chuan Arunachal hi India ram bik anih thin loh zia leh thu ngaihnaawm tak takte sawiin, Champhaiah a ti ti kotlangah kan dak a, ngaihnaawm hi kan ti em em a, a thu kha Mathaia ziaak tlukin kan ngai thin a ni. Khatiang khawpa mi ropuite zing ami kha tunah hei, tiang hian hun a lokal a lokal a, House khatah kan han thu chu a ni ve der mai a. Opposition-ah pawh awm se kan chhoh en reng a ni tih kha ka sawi duh a ni.

Hei, vawiina Resolution hi, nichin khan an han sawi an han sawi a, a original takah chuan Pu Piana atanga lokal kha a nih hmel a. Hetianga Pu Piana te'na an tih chuan tiin, a ropuina kha, enge ni, Esaua upatna laksak ang deuh hlek ang khan, a han ziah chawp chung chung a, form an han la chawp a, an han ziaak a, a lo chhuak ta hlah mai kha a ni awm a. A rilru tak tak a pe lo emaw ni aw tih ka rilruah a lo awm a, ka rilruah a lian angreng khawp mai a, Pu Piana thehluh atanga copy ang deuh hleka han sawi kha. Sorkar mitmei a awm hran lova, Pu Piana'n a thehluh pawh khan.

Kei pawh hmannah hemi ka resolution ka thehluh hian, kan Chief Minister zahawm tak hnenah, 'Ka pu, Delhi-ah i awm si a, helaiiah CLP te kan thuho rem si lova, ka han thehluh ve tawp mai a nia' ka ti a. 'E khai, patling in ni a lawm, in zalen vek; chutiangan party-ah kan inphuar tit tet lo, zalen deuh khan awm rawh u. Private resolution a nih kha chuan in zalen a ni,' a ti a. Congress party hi tunhma atangin, mimal dikna leh engemaw lo inrapbet thin awm anga sawinate awm thin mahsela, khata tang khan ropui ka ti lehzuah a. Thil tam zawk hi committee-in kan sawi thin a, hemi Private Resolution ang chiah phei hi chuan kan pu hian zalenna min lo pe zau viau a ni tih te ka han hriat hian tha ka ti riau a.

Nichinah khan kan member zahawm tak Pu Tlinga khan, Work-charge level-ah, work-charge a nih kher loh pawhin a level talah a dah thei a ni kha a rawn ti a. Ni e, a level a dah te pawh kha ropui kan ti viau a nih chuan thu hran ni se. Kan resolution hi a tlangpuiin kan tidanglam ngai lova. Chuvang chuan ani pawh hian a rawn duh chiah lo a ni. Work-charge a theilo tih a hrechiang khawp mai a, chuti a nih chuan a level-ah tal tiin, a tha dang kha min kawhhmuh kha a ni a. Damdawi kan va lei dawn a, kan duh ang chiah a lo neih loh a, "a tlukupui lei mai rawh" an tih ang deuh kha niin ka hria. Damdawi tlukupui lei lah hi kan inkhap viau tawh mai si a, ka ngaihtuahnaah a rawn awm a, kan Member zahawmtak khanin helampang sawlampang tih vang ringawta inhnial tur a ni lo an ti tak naa, vawiin thilah hian helampang leh sawlampang awmin ka hre lova, kan Home Minister zahawmtak Pu Zira'n a sawi ang khanin Home Guard dinhmun hrechiang bertu a ni a, khamiina kan sum leh pai dinhmunte pawh kan ram dinhmun te leh India rama hmun zau zawkte dinhmun han en erawh chuan, tun hunah hi chuan thil tha zawng zawng hi kan tih ala remlo aniang a, kan ti seng rih dawnlo aniang a, a tih kha a pawmawm maiin ka hria a.

Kan Home Guard te hi House a sawi kher ngai lo hianin a tha hi chu an hre ve turah ngai ta ila. Engemaw tia hming intihthatsak tumna ang zia zang a, symbol a an han awm hi chu ka lainat riau mai ka ti. Chuvang chuanin a theih hram chuan an hamthatna

sorkar hnathawk dangten an neih ang tho hian ngaihtuah ve theih niin ka hria a, Assembly term khat chhung wawi hnih an chungchang han sawi ngawt pawh hi an khawngaihthlakawm ka ti a, chu chu ka sawi duh a.

Tin, kan budget te kha kan han en chuanin kan development sum a tam lo ti khanin anmahni a rawn pulut lamtute hian an sawi an sawi a. Kan sum tamloh zia leh sorkar hlawhah a kal hnem si a, NLUP chu han paih ta ila, sorkar hnathawkte hlawh han paih leh ilang chuan development atana sum hi chu a tlem lutuk a ni an tih an tih laia heta a sum chhuak lam zawng hlir maia ruahmanna a rawn awm leh hi chu a Opposition rilru hi a tel ve deuh em aw tih kha kei pawhin ka ngaihtuah tel ve thova. Hmannia kan sawi ang khan kan Mizoram hian sum kan ngah lova, internal resource kan mobilize a ngai si a, helaia sum kan ngah tawh loh avanga kan Plan lam sumte pawh a cher viau thu hrechiangtute kan ni. Chulai karah chuan a hman chhuahna lam zawng hlir mai a, resolution han awm hi chu kan sim hi a tul em aw ka ti deuh a. Sum hmanna tur ang chi zawng anih hi chuanin rawn hrethiam sela ruling lam tihura te pawh hian rawn ngai sela, a tha em aw ka ti a.

Tunah hian vanneihthlak takin kan sorkar hianin Power lamah theihtawpin tan kan han la a, kha zawhna leh chhanna a landan chuan kum 2014-ah te khan Tuirial Hydel Project te tihpuitlin kan han tum kha a ni a, 2014-a kan puitlin thei anih chuan 2017-ah a dang ho kha kan han puitlin leh ang a, Mega Watt 2000 chuang kha kan nei tawh dawn a, chumi hunah chuan helai kan Home Guard te mai ni lo midang hamthatna tam takte kha kan ti thei ang tih ka ring a. Hei tunah hian kan Home Guard te hi 1028 an ni e a rawn ti a, 1026 te kha Tuirial Compensation dawngtute zat kha an ni a, pahnihin an bang chiah a nih hi, tunah hian theihtawpin hma kan la zel a. Tin, ka rilrua thil awmah chuan Mizote hi inthik hnam kan ni a, miin hamthatna an han chan hian inlawmpui kan la thiam lo, han tihsan pawh khanin hmundang atanga han lawmpuina tehchiam kha awmin ka hre lova, tunah pawh hian han ti leh ila, anni pawh chutiang khatiing ti ang zawng khan an rawn lawr leh tuam tuam mai lawng maw aw ka ti a. Ka rilrua a landan tak chuan tuna an awm dan pangngaiyah hianin hemi ration lam chungchangah te hian duat dan kawng awm sela, anmahni tuam chungchangah te pawh hian an duty-na hmunah te hian thutna nuam deuh te an mamawh thil ang chi zawng hi ngaihtuah dan awm sela, hemi a mimal dinhmuna inchawikan inchawikan ai kha chuan nakinah inchnirna leh inthik tur ang nilo zawnga kal hram hram hi a thain ka hria a, chu chu tawitein kan sawi ve duh a ni. Ka lawm e.

SPEAKER : Pu R. Lalrinawma.

Pu R. LALRINAWMA : Pu Speaker, ka lawm e. Hei resolution hi kan sawi chiang viau tawhin ka hria a, sawi vak pawh a tul tawhlo, a dawta awm hi thil pawimawh tak mai, Health & Family Welfare, Govt. of Mizoram kum 2010-2012 chhunga chawimawina chi li ngawt a dawng ta hi lawmawm kan ti tih hi han sawi a chakawm viauin ka hria a. A thenin lawmthu sawina ringawtte an tih rual hian kan executive te, hnathawktutena National Award an dawng te, he House a Legislature-ten lawmthu kan lo sawi hian hnathawktute pawh kan tiphur thei zel a ni tih te a hria a. Chuvang chuan, heng resolution-te hi sawi a chakawm viau a. Amaherawhchu, vawiina kan sawi hi a pawimawh viau baw si a, a puluttute Member zahawm takte an ni a. Home Guard duhsakna leh an ham thatna duhpui chungchangah chuan Pu Speaker, i veilam amite leh dinglam amite hi kan inlungrualin ka hria a, kan duhsak tlang khawp mai a. Kei pawh hi active politic-a ka luh ve hma chuan, he House-a ka thut ve hma chuan Home Guard te hian an legal adviser-ah hun

engemaw chen min hmang a. Chutiang chuan sorkar hmasa lamah te an hamthatna tur hi an fight ve ngar ngar a, tiang chuan keini pawhin kan phak tawkah advice te kan lo pe ve a. Amaherawhchu, an beidawng em em thin a, tun sorkar tharah hian hamthatna a han awm chho ta a.

Ka hma lamah an sawi tawh a, hamthatna hrang hrang, chawlh hrang hrang an neih ve tak te leh an lawmman tihpun tak te, medical facilities an han neih chhoh te, khatiing ang ralna thil an dawn theih te, khang kha tun sorkar thara a han awm chho hi a lawmawm ka ti a. Tunhmaa an legal adviser ka nihna atang pawhin he sorkar chungah hian lawmthu ka han sawi duh a. Ka hmalama an sawi tawh ang khan an tangkai a Home Guard te hi, an duty-ah te hian an rinawm em em mai a, chuvang chuan duhsak pawh an phu a. He sorkar pawh hian a duhsak a, a duhsakna pawh hi ka hmalama kan ngaihtlak tawh angin sorkarin a duhsakna a kal tir mek lainin, resolution avanga duhsakna pek ni lovin, sorkarin a kalpui mek lainin resolution-in a um zui zawk a ni tih kha chiang takin kan ngaihtla tawh a. Vawiinah duhsakna dang resolution lo lut leh erawh hi chu a inhmeh loh dan kha kan hre tawh a, work charge-ah dah ni rawh se han tih te kha an tan a thalo zawk mah mah em tih te pawh sawilan a ni tawh a. Work han tih chuan project te, scheme te, plan te a kaww tlat mai a. Chuvang chuan Home Guard te hi eng angin nge kan chhawr a, eng nge an awm chhan hi, security related thil te, relief engemaw disaster emaw, relief han thawh tura han pun te an ni a. Chuvang chuan sorkarin ruahmanna fel tak a lo siam a, Home Guard atang hian anmahni skill, an thiamna ang kaihnhawih Police-ah te, Excise-ah te, Environment & Forest-ah te leh Prison-ah te luh theihna a lo siam te hi a lawmawm hlein ka hria a. Kha kha an skill-na lam a ni a, tunah hian a resolution ang chiahin kal dawn ta ila chu, Home Guard a tuna skill I te hi PWD-ah te, P&E-ah te, PHE-ah te i dah ang u tihna ang tluk a ni a. Chuvang chuan helam a an skill kha a va hman theih dawn si lova, a inhmeh lo deuh tih kha a chiang mai a. Chuvang chuan he resolution hi han sawi zui lutuk tur pawh awm loin ka hria.

Pu Speaker, nichinah i veilam atang khan thil theih loh leh inhmeh lo zawng ringawt hi kan ngaihtuah a, a theih dan hi kan ngaihtuah tur a ni, dan siamtu kan ni a, dan kan siam mai tur a ni tih angte kha a han ri nawk nawk a. Amaherawhchu, khang kha mipuiten an lo ngaihtla ang a, a sawitute khan dan siamin kan duh duhin i ti ang u ti a an lo ngaihsak loh ka duh hle a. A chhan chu, vawiina harsatna tam tak kan tawhte hi hetiang harsatna sawi reng mai, Dan siam ila kan awlsam mai ang chu tih ngawta awlsam thei a ni lo tih te hi an hre vekin ka ring a. Independence te pawh kan duh a, dan siam ila Independence act, India-in a independence dawnin British atangin independence act pass a ni a, an independence thei a thil theih a ni. Vawiin hian keini hian independence kan duh tiin dan siam ngawt thei kan ni lo reng reng a. Tin, dan kan siam theihna Pu Speaker, constitution hnuaiah dan siam theihna kan neih angin dan hnuaiah dan siam theihna kan nei a ni a. 7th schedule-ah state list a awm a, chu state list ami leh concurrent list amiah dan kan siam thei a. Tin, concurrent list ami kha central pawhin siam theihna a ni a, khatah khan central dan siam leh state dan siam kha lo awm ta se, a lo inkalh chuan Central Act kha a lal zawk tur tih te a ni a.

Chutiang chuan kan thuneihna pawh hi dan hnuaiah vek a ni. Dan zawm lo chuan dan pawh kan siam thei lo a ni tih te hi an hriatsa niin ka ring a, amaherawhchu Resolution an thlawpnaah an duhthawh vang a ni a, mipuite pawn Legislature-ten an duh duh an ti thei a ni, dan an siam phawt chuan ti ang deuha an lo ngaih loh kha a thain ka hria a. Chumi a nih loh chuan vawiina kan harsatna tam tak, a theih rih lo a ni kan tih ang chite zawng zawng kha dan siama tih theih mai a nilo a ni. Chuvang chuan Home Guard te pawh hi Work charge-a dah tur chuan PWD-ah te, PHE-ah te, P & E-ah te kan dah a ngai dawn a ni.

Chuvang chuan thil inhmehlo a ni a, a resolution hi a huap zim deuh hlekin ka hria a, rampum huap ang chite a ni lova, a puluttu member zahawm tak hi Party President a ni a, Home Guard tana tumhnih resolution, duhsakna a pulut a, hei hi a advantage pui ang kan tih rual hian, Home Guard ni ve lo zawng hian Home Guard chauh duhsak mai an ti em lovang chu maw ka ti a. Kuthnathawktu mi harsa tak takte tan an hamathatna zawng emaw, an harsatna sutkianna emaw resolution te hi a tul hle a. Chung angte chu han ni zawk sela chu tih te pawh kha ka sawi lang tel duh a. Tichuan he Resolution hi a nihna ang ang hi chuan pass chi a ni lo a ni, thil kalphung a nilo a ni, tih kha kan sawi lang ve a ni, ka lawm e.

SPEAKER : Tunge sawi leh dawn sawitur kan awm tawh lo em ni? kan ko tawh mai dawn em ni a Resolution neitu, Pu S. Laldinglana.

Pu S. LALDINGLIANA : Pu Speaker, hei Mizoram hmun hrang hrangah kan Home Guard volunteer-te sorkarin tangkai takin a chhawr mek a, kan ngaihtlak tawh ang khan Bank-ah te, Jail-ah te a pawimawh venhimna hna an thawk a. Tin, an thawh danah pawh an thawkrim hle a darkar 24 lai chhawr an ni tih te kan ngaithla a. Pu Speaker, i phalnain Lungleiah ka tupa damlo kanin ka va kal zawk a, Lungleiah sawn kan sorkar hmalaknain Thuamluaia mualah grass phah a ni tawh a, kan thalaiten tangkai takin an hmng a, a lawm pawh an lawm hle a ni. Amaherawhchu chutih lai chuan mual sawn hungna mumal a la neih loh avangin venhim hna saw thawh a ngai hle mai a. Chu chu Home Guard volunteer-te hian min ven sak mek a, amaherawhchu tunlai te hian indaihlohna a nasat deuh hlek avangin duty-te pawhkir tumna a awm mek a, kan sport hruaitute pawh an mangang hle a, minrawn lenchilh a, kan sawiho a. Aizawl lama kan Home Guard hotute kan han bia a, anni pawhin a tulziate hriain tunah sawn a venhim hna indaihlo chung chungin minrawn thawh sak te an tum a, kan lawm hle a. Chutiang chuan anmahni normal duty bakah pawh hian kan Home Guard volunteer-te hian Mizoram hmun hrang hrangah hna tangkai an thawk mek a ni tih kha ka tarlang duh hrim hrim a. Chutihlaih chuan Pu Speaker, an dinhmun dik tak te pawh hi kan hriat chiana kan zir chian pawh hi a tulin ka hria a. Kan Resolutionrawn puluttu member zahawm tak Pu Duhoma hi anmahni thutchilhtu niin, duhsak pawh a duhsak viauin a lang a. Amaherawhchu, chutihlaih chuan he sorkar pawh hian kan Home Guard te hi a duhsak hle a, a tihtheihna chin zawng zawngah chuan an hamthatna tur hi a ngaihtuah a ni tih hi Pu Speaker, kan hriat ve a tulin ka hria a. I remtihnaian helaia an dinhmun, he sorkar lo luh hma leh lo luh hnuah an dinhmun inan loh dante pawh hi kan chhiar chhuak duh a ni. He sorkar a lo pian hma kha chuanin duty allowance te kha Rs. 143 a ni a, tunah hian Rs. 184 a tihpun a ni a. Tin, 1.7.2010 atang phei chuan Rs. 235 ah tihpun chhoh a ni a. Tin, kum 15 service te phei chu Rs. 240-ah chutiang zelin Rs.300-ah a chho a, tunah hian Home Guard volunteer kan tih a pangngai a rank hniam ber pawh hian Rs. 7855 an hlawh thei tawh a, tin an allowances lak hrim hrimte pawh hi he sorkar lo pian hma kha chuan Ration allowance an nei lova, Rifles allowance pawh an nei lova. Tunah erawh chuan Ration allowance-ah thlakhatan pakhatin Rs. 550/- an dawng thei tawh a, tin Rifles allowances-ah Rs. 25/- an dawng thei a, tin, chutiang zelin washing allowances-ah te pawh Rs. 80/- thlakhatan an dawng thei tawh a ni.

Tin, an hlawh hrim hrim pawh hi Pu Speaker, a dang tawh em em mai a, he sorkar lo pian hma kha chuan Corporal te khanin thla khatah Rs. 50/- an hlawh a, tunah erawh chuan Rs. 100/- an hlawh tawh a. Tin, Sergeant an tih te khan thla khatah Rs. 90 hlawh te kha tunah chuan a let thawk Rs. 180/- an hlawh thei tawh a, tin, quarter master kan tihte kha Rs. 110 hlawh thin te khan tunah chuan Rs. 220/- thlakhatan an hlawh thei tawh a ni. Chutiang chuan he sorkar lo pian hnuah pawh khan anmahni, an

dinhmunte uluk taka ngaihtuah sakin tanpui an ngaihna laiah chhawmdawlin he sorkar hian a tih theih ang zawng zawng chu a tichho tawh a ni tih kha ka sawi nawn ve leh duh hrim hrim a.

Tin, workcharge-a dah chungchang Resolution-a a lan danah hian kan Home Minister zahawm tak, anmahni enkawltu khan chiang takin a rawn sawi lang tawh a, a rem loh dan te, a rem chan loh dan te, tin, works hrim hrim han charge-na tur a awm lo a ni tihte kha a rawn sawi tawh a, khatiang bak kha chu a tih theih loh, a remchang lo, he resolution hi lo pass ta pawh ni ila awmzia kan neihpui vak thei dawnin a lang lova. Chuvangin tuna an dinhmun pangngai he sorkarin duhsak taka a lo dahna hi a tha tawk ve viau tawh a lawm mawle. Kan ngaihthlak tak ang khanin heng kan lehkhathiam tak tak MA, MSc te, English Medium a thawk laite ai pawh hian a rank hniam ber hlawh te pawh hi a tha tawh zawk a ni tih te pawh kha kan ngaihthla tawh a, chuvangin he Resolution hi pass a awmze nei tur ni chuang si lo a nih ai chuan a puluttu member zahawm tak hianin hnukkir thei se, tih kha ka ngenna a ni e, Pu Speaker, ka lawm e.

SPEAKER : Tunge han sawi leh dawn? In awm tawh lo em ni? A Resolution neitu kan ko tawh mai dawn em ni? Awle, Pu Lalrobiaka.

Pu LALROBIAKA : Pu Speaker, ka lawm e, hei wawiinah hian duhsakna ropui tak mai Mizoram sorkarin Home Guard-te a lo hlan tawh piah lamah duhsak lehzualna i hlan teh ang u tih rilru puin kan member zahawm tak Pu Duhoma hianin a rawn move a ni a. Engpawh nise, a move dan hi a duh sak a, an tan tiang hian an rawn chhawp chhuak a ni a, a lawmawm ka ti hle a. Amaherawhchu, Home Guard te hi Volunteer an ni tih kha kan hria a, Volunteer-ah chuan volunteer thami tak an ni ang tih ka ring a. Buai lai khan volunteer an awm thin a, keini kan la naupang deuhnaa volunteer ho kha kan hlau thin khawp mai. Volunteer an lokal a nia an tih tawh chuan khum hnuaiyah te kan biru a, kan hlau a, kan tlanche thin a ni tih kha. Khatihlai volunteer kal zel kha wawiin thleng pawh hian kha volunteer rilru pawh kha an la pu zel niin ka hria a, thalo ka ti a tih kha ka'n sawilang zawk duh a. Tichuan, duhsakna tam tak kan sorkar hian a lo hlan tawh a. MNF Ministry sorkar lamah khan theihtawp an chhuah a, nasa takin an bei a, amaherawhchu chuti chung chuan a then an ban phah a, chutia an ban phah chuan an hlawhtling chuang lo a ni. Amaherawhchu, he sorkar thar a lo din tak hnuah erawh chuan duhsakna nasa tak mai a hmaa an la hmuh ngai reng reng loh Rifles allowance tih te, Ration allowance tih te, Washing allowance tih thlengin duhsakna an dawng a ni. Wawiinah hian ngaih loh lamah min lo ngaih sak lo sela, kan Home Guard volunteer te hi Lungleiah awm ta se, kan member zahawm tak Resolution neitu hian a rawn pulut a ngem aw, tih hi ka ngaihtuah a, tunah hian a Bial Chawlhmunah an awm a, amaherawhchu, hlawk viau tura ngaihtheihna lai te pawh a awm a, chutih rual erawh chuan Lunglei lamah emaw, Mimbang lamah awm ta daih se chuan a rawn move-in ka ring hauhlo mai a.

Engpawhnisela, wawiinah hian kan Volunteer te, kan Home Guard-te hi sorkarin theihtawp chhuahin duhsakna a hlan a, tin, duhsakna hlan hlawk tak pawh a nih ka ring a, anni pawh an rinawmin an service-ah nasa takin he sorkar tan leh he ram tan hian an thawk a ni tih hi hairual a ni lo. Tin, thil tih reng rengah engemaw issue a awm pawhin chhiat ni leh accident thilah pawh anni hi an tangkai em em a, an training a tha a chutiang chuan hun an hmang chho a ni. Tin, an fakawm ve hrim hrim mai a, kan member zahawmtak Col. Z.S. Zuala khan a sawi tawh a, Ex-Service ten bul an han tan a, chutiang chuan Training tha tak

mai an han nei a, first aid kan ti emaw, engemaw buai thut thila thil han kalpui dante Sipai tak maiin an han tichho va, Home Guard hrim hrimah hi chuan State dang zawng zawng aiin an discipline emaw an training emaw hi a tha chung chuangin kei ka lo hmu thin a ni. Chutiangte chu an ni a, vawiinah hian a resolution hrim hrim hi duhsakna thilte chu a ni e, a tha e. Amaherawhchu, ka hmaa sawituten an sawi ang khan Work Charge-ah dah ni rawh se han tih kha a kawng hawilo viauin ka hria a, kan mi chhuan tak takte an nih rualin kan hun hmasaah khan Dr. B.R. Ambedkar-a champion-na kha chu Caste System a nih rualin kan doctorate degree nei hial te khanin khatiang lo zawng khan racism lam ang khan an rawn la daih ang deuh kha angin ka hre deuh va. Engpawhnise, thil te hi chu hriatsual leh tihsual hi a awm ve hrim hrim a, a error ang zawngte pawhin ngaihsak ta mai ila a tha maiin ka ring a.

Tin, nichina kan sawi ang khan anni hi he sorkar sum leh paite tha chhoin leh duhsakna awm lehzet thei turah te hian he sorkar hian duhsak a chak em em a ni tih ka sawi duh a. Ka rilrua thil lo awm pakhat chu Pain a Inchhungah ro a rel a, a fate tana tha tur engkim a duhsakna a hlan a, Kawr mawi tak tak leh Pheikhawk tha tak tak a lei sak laiin, a kawmchhak pain hei hi chu a mawilo em mai, a ha zo lo em mai, hei hi i hak tir ang u, ti a a rawn rawt te pawh in angin ka hre deuh va. Engpawhnise, anni dinhmun hi sorkarin a hria a, a duhsak em em a, heng chi hrang hrang an hmuh theih ngailoh vawiina an hmuh takte a ropui ka ti a, ka lawmpui a, chutih rual chuan mihring hi duh tawh kan nei hauh lova, duhtawh a awm lo va, thil chi hrang hrang a sang zela kal kan duh a ni. Anni pawh hian an duh ngei ang tih ka ring a, chutiang chuan he sorkar sum leh paiah te a that chhoh zel a, a kal chhoh zel chuan nasa zawkin duhsakna te pawh kan la hlan ang tih ka ring a. Tin, a hrim hrimah Mizoram Home Guard zinga skilled 1 (one) chin te hi Work Charge-ah dah ni rawh se han tih te, a kawng hawilo kan ti a kan sawi tawh a, chutih rual chuan vawiinah NTUM kan tih te hian nasa takin hma an la a, MR te hi Work Charge-ah min dah sak thei lawm ni? an han ti a, nasa takin hma an lak ve reng laiin khatiang kha hmun tam tak a, mi tam tak, Department tam takah hian hetiang hi an awm a ni, chutiangte chu kan sorkar hian han ngaihtuah hlawm thei sela chu aw tih te pawh vawiinah hian ka rilruah chuan a awm a. Chutih rual erawh chuan thil tih bik emaw, duhsak bik riaua han lan te pawh hi that lohna lai a awm thei a. Mihring kan nih avangin engemaw kal sual maite thil hlauhawm theite a ni a.

Tin, an duty-na chi hrang hrangah kan Home Guard-te hi 24 hours duty an ni a, Jail-ah te, Bank-ah te leh VIP-ah te, FCI-ah te, supply godown leh traffic thlengin tih theih loh an nei lo a ni. An zein em em vek a, kan sawi thin angin tunhma deuh kha chuan keini hriat chinah pawh tlem chuan hnuai deuh lamte an han lut thin a. Amaherawhchu, chung pawh chu ka'n sawilan kher duhna chu training tha tak an nei a, training te an neih zawh meuh chuan, Police-ah te a awm awmah a bright leh engemaw chin kha chu an lut zel mai a ni. Vawiin thleng pawh hian MAP-ah te, MRP-ah te tam tak an lut tawh a, Excise lamah te khatiang chiah khan tam tak an lut tawh a ni. Khatiang kha an dinhmun a ni a, engpawhnise, sorkarin a fate a hmangaih a, chutiang bawkin anni tan thiltha tih a duh a ni tih hi kan hriat theuh atan ka'n sawi duh a. Hei ka lo hre ngai vak lova, tuna an facility leh an thil dawn ang chi te pawh hi paternity leave ni 15 tih te, maternity leave ni 45, maternity leave lamte chu kan lo hria a, amaherawhchu paternity leave kha ka lo hre hauh lo mai a. Khatiangte ni 30 medical leave an han nei thei te hi a ropuiin tha ka ti a, ka lawmpui a. Tin, chutih rual chuan Department hrang hranga quota an han neite hi an hotute fin leh varna leh he sorkar thatna leh zahngaihna vang a ni tih hi ka sawi duh a. Police-ah 10% nein, Excise-ah 5% , Forest-ah 5% , Prison-ah 5% an han nei ringawt te pawh hi a tha ka ti a.

Vawiinah chuan hei kan hria a, Security te pawh kan ti a, security a va training tur khan pawisa an thawh zawk a ni a training-te hian, chutiangte chu a ni a.

Chutiang nilovin kan Home Guard-ah chuan training lai pawhin hlawh neiin kalpui chhoh zel a ni a. Tin ex-gratia grand an han neite leh duty laia thi an awm chuan senso chi hrang hrang an han neive thlap ang chi te hi medical facility thlengin a lawmawm ka ti a. Tin, anni pawhin eizawna anga ngai lovin volunteer an nihna anga tha taka thawk a, an thawh atanga mipuiin zalenna te, mipuiin hnemhnannate an lo neih ve theih nan leh malsawmna an lo nih theihna tur a ni tih hre chung a thawk zawm turin kan duh a. Tin, he sorkar sum leh pai dinhmun hi lo tha chho zel sela, hei bak pawh hi hma kan la sawn dawn a ni tih hi he sorkar ngaihdan anih ka ring a ni. Chuvang chuan vawiinah hian resolution a lo luh dan ringawt ang hi chu tihtlang chia a ngaih theih lova, chuvang chuan a resolution neitu hian withdraw mai sela a tha lawm ni ka'n ti a ni e. Ka lawm e.

*Speech not corrected

SPEAKER : Tunah Pu Nirupam Chakma.

Pu NIRUPAM CHAKMA : Pu Speaker, hun min pek avangin ka lawm e. Hei Member zahawm tak Pu Lalduhoma resolution “Mizoram Home Guard Volunteers zinga Skilled-I chinte hi Work Charge-a dah ni rawh se”, Work Charge-a dah ni rawh se tih hi kan ngaihtuah tur a ni. Work Charge-a dah ni rawh se tih hi a theihloh hrim hrim a ni, chuti anih chuan sawi vak pawh a ngailo, hlawh tihpun ni rawh se ti ila chuan sawi tur a awm, Work Charge-a dah ni rawh se tih ringawt a Resolution putluh hi a theihloh hrim hrim a, work khawih an ni lova, tin, work atangin charge tur an nei lova, Sorkar kalphung kha an en ve a ni a, PWD-te, PHE-te, P&E-te work nei department. Chuan, Work Charge kha an la thin a, work zawh veleh khami scheme an implement zawh veleh ban tur an ni a, chuvang chuan, a duhsak viau laiin pass chia ka ngai lova. Pu Speaker, Work Charge-a dah dil kha chu dah tha ila, kan ngaihtuah tur chu Home Guard-te dinhmun hi a ni, kha kha member zahawm takin a lo thehluhna spirit pawh a ni ngei ang ka ring. An dinhmun hi upgrade theih dan kawng a awm em, facility kan pe tam thei em tih kha kan ngaihtuah tur a ni a. Ka mimal ngaihdanah chuan an nature of duty tuna an kenkawh hi a pawimawh si a, security related duty a nih avangin an dinhmun chu kan ngaihtuah tur a ni. Theih chin chinah kan Sorkar hian an dinhmun chu a ngaihtuah tawh a, Sorkar hmasa nen khaikhin chuan nichinah kan member zahawm tak tak te sawi atangin a langchiang hle a ni. Eng emaw chen chu an ngaihtuah sak tawh a, hei aia phu zawk neiin member zahawm tak te'n an hria a niang, chuvang chuan skill lama dah ni rawh se tih an putluh hi lehlamah chuan an dinhmun hi facility tha zawk leh pawisa tam zawk, lawmman tam zawk hmuh theih nan ti a putluh niin ka hria. Bank-ah te, VIP duty-ah te, Jail-ah te, Supply Godown-ah te, Traffic duty-ah te, keini MLA Hostel-ah pawh vengtu a awm a, 24 hours duty an awm a, CADC House-ah te pawh, tin, a bik takin Rural Bank-ah te hmun dang dangah te, chuvang chuanin, an nature of duty MAP – VIP duty emaw, CRP – VIP duty emaw, Home Guard-te VIP duty emaw te hi an nature of duty-ah chuan it is the same duty a ni.

*Speech not corrected

SPEAKER : Silai tha an keng em? Silai tha, tiang nen em ni an duty?

Pu NIRUPAM CHAKMA : An mawhphurna hi a danglam chuang lo. Eng emaw vanduinah thil awm ta se, they carry the same responsibilities, Jail-ah tang mai tur an ni a. Chuvang chuan, silai keng vekin an duty a, eng emaw light duty kan pe a nih chuan thu dang a ni a, anmahni kan chhawr danah hian nature of duty kan pek danah hian hei ai chuan an phu a ni dik tak chuan, kha kha kan Sorkar-in ngaihtuah zel sela. Amaherawhchu, Work Charge-ah dah ni rawh se tih kha chu a theih loh hrim hrim, anmahni Pay upgrade emaw Skilled II nge Skilled I nge eng emw position-ah chuan dah an ngai a ni. Chumi awmzia chu an pay a san kha facility that kha an mamawh a ni. Keinite pawh Minister kan ni tawh a Pu Speaker, kan Minister nih laiin CRP-in min veng thin a ni a, CRP-in min ven leh Home Guard min ven te chu same duty a ni. Chuvangin, an mawhphurna hi a hniam chuang lo, chuvang chuan, anmahni nature of duty ngaihtuahin kan Sorkar chak tak kan Chief Minister zahawm tak kaihhraina hnuaiyah hei Sorkar mipuite tana siam sorkar, ram tana theihtawp chhuah thin hian tun aia tha zawk hian ngaihtuah se, pawisa awm dan a zirin chu chu a dik zawk ang. Chutiang a nih loh chuan an mahni engnge ni.....kan ti palh ang e. (Interruption)

*Speech not corrected

SPEAKER : I din laiin maw Pu Nirupam. Minister Pu Nihar Kanti kha a awm a in awmna bulah maw, tichuan sorkarin Police dah lovin Home Guard a dah em ni?

Pu NIRUPAM CHAKMA : Aw, Home Guard a dah keimahni pawh telin. An duty that zia chu Pu C. Lalthanliana'n Pu Nihar Kanti hmu turin a kal a, an hre lo a an phal lo mai a ni. Chutiang incident atang chuan an duty that zia chu kan hre thei ang, an mi hriat loh chu kal an phal lo mai a nia, Minister pawh an hre lo a an lo dang mai a. Hei hi a chhan chu hmun dangah te an kal ngai lo a, chhun leh zanah ngawrh takin an duty a, nature duty a awm bawk si pay erawh chu tlem si, kha kha kan ngaihtuah na lai tur chu a ni. Chuvang chuan kan Member zahawm tak Resolution hi pass rem ka ti lo a, a chhan chu work charge-a dah ni rawh se tih hi a theih loh hrim hrim avangin he Resolution hi ka support lova. Amaherawhchu sorkarin hun lo la kal zel turah an dinhmun thatna turin lo ngaihtuah zui rawh se tih chu ka sawi duh a ni. Ka lawm e.

*Speech not corrected

SPEAKER : Sawi tur kan awm tawh lo em ni? Pu Lalrinmawia Ralte khan a phar tawh tak e. Pu Lalrinmawia Ralte, a dawtah Pu H. Zothangliana.

Pu LALRINMAWIA RALTE : Pu Speaker, sawina hun min pek avangin ka lawm e. Kan Member zahawm tak Pu Lalduhoma Resolution "Mizoram Home Guard Volunteers zinga Skilled – I chin te hi work charge-a dah ni rawh se"..... lut thin a, chutah chuan kan inenpui si se lem lo a, amaherawhchu tun tumah hian kan leader-ten a resolution thehluttu hnenah hian, hei i Resolution thehluh hi a lo chhuak palh a nih pawhin thil tih har deuh mai a ni a, han zirchian hian

nang pawn i hrethiam ang a, tuna Home Guard inenkawlna ang angah hi chuan work charge-a dah hi a theih loh hrih deuh tlat avangin pass-pui chi i ni dawn hauh lova, chuvang chuan withdraw mai pawh a ngai ang ti a an lo sawipui tawh a ni a. A chhuak loah a tang hlauh a, a lehlamah chuan a chhuak zawkah han tang sela chu khati khan tawitein kan zawh hmel a ni. Resolution neitu rilru hrim hrim hi inthlan a hnai emaw a hla emaw a eng a pawh nise, a bial chhungah duhsak phu takte harsa takin an la awm a ni tih hriain an dinhmun thatna tur duh a he resolution a rawn siam a nih phawt chuan a lawmawm ka ti a. Nichina member zahawm tak Pu T.T. Zothansanga'n a sawi tak ang khan keipawh hei resolution neitu Pu Duha hi Goa-ah IPS officer nia a zuk awm lai khan eng khu nge maw ni 'tui leh luang' a tih a kha ka ti a, Goa-ah hian khawilai tak hi nge tui leh luang kha ni ang maw ka ti a. Mandavi river khu em ni ang aw ka ti deuh a. Khulai kam vela bangla a thut lai khuan a ni ngei ang, article a rawn ziak a, tui leh luang kamah a ti a. Poona MZP chanchinbu Zamzoah alo chhuak a ni. Chu chu school naupang kan nih laiin ka lo chhiar a, ngaihnam hi ka ti a, ka rilruah hian ala cham renga. Vawiin thlengin article ka rilrua cham rei pawl tak a ni.

Mizo thalaite eng hnathawk pawh nise, zirlai pawh nise eng hnathawk pawh nise veina ril tak atanga rawn ziak kha niin ka hria a, chutiang deuh bawk chuan vawiinah hian kan Home Guard volunteers te hi volunteers ni mahsela keini Mizote hi tlawmngaih, hnatlan volunteerism ngaisang hnam kan ni a, hnatlanga inkhaichhuak mup mup hnam kan ni a, a hlauh beisei lova a thlawna hnathawk ngaisang tak hnam kan nih avangin chutianga tlawmngaih chhuah nasa te chu lawmman pek ching hnam pawh kan ni hlauh a. Tlawmngai no pui dawm tir thin hnam kan ni ve leh chiah a ni.

YMA tun hnu thleng pawhin khaw khat nula tlangval tlawmngai chawimawi thin hnam kan ni a, Home Guard-te hi volunteers an nih avang ngawta dinhmun hniam tea lungawi tura ngai tur hnam chu kan nilova ni. An inpekna, an inthlan ngamna hi ropui deuh mai a ni a. Nichinah member zahawm takin a duhthawhna thu a sawi ang khan an training hi a tha em em a, kan police dangte huatthu suhah an training hi a tha ber pawl a ni lawm ni tih hi kan sawi thin dan a ni a. Tin, an training chhuak, passing out hnua anmahni duty a an va kalna thuah pawh hian kan police tha ber berte nen pawh hian engemaw an inthlahna chuang le? Nichinah member zahawm tak Pu Hmingdailova Khiangte tena an rawn sawi ang khan sipai rilru pu chung a Mizoramah hian raise an ni a, a bul tumtute leh a hotute sipai rilru pu an nih thin avangin sipai tak tak anga hman tlak khawpa chher chhuah an ni a. Kan sum leh pai dinhmunte hian tlin nisela tuna kan sorkar hun chhunga sorkarin hamthatna, duhsakna reiloteah kan Chief Minister leh Home Minister leh hotuten an rem hriatna leh Home Guard te an hmangaihna leh duhsakna avanga an thil lo tihsak zawng zawng belhchhahna kan hriat tak zawng zawng aia tam hi an phu a ni. An hah zia te ngaihtuah leh tuna member zahawm tak Pu Nirupam Chakma-in a rawn sawi angin sipai tak tak anni aia hlauh tam zawkte nena an hah lam inang reng bawk si anih avangin tlawmngai, hnatlang chawimawi thin hnam tan chuan duhsak zel hi kan tih tur a ni ngawih ngawihin a lang a ni.

Helamah hian Home Guard volunteers nuai 4 chuang an awm reng a, amaherawhchu an lawmman zat a inang lo. Kan ngaihtlak tak ang khan Punjab tih lohah chuan tunah hian a han chhan let vena, duhsak vena hi kan Mizoram hian kan tisang ber a ni, kan hriat theih chinah chuan. Hman deuhah khan Orrissa-ah an Home Guard volunteers-te an nuar titih mai a, an buai khawp mai. An hlauh san an ngiat a, nikhata 200 in an tihsan saka an in chhandam a. Engpawhnise, hengte hi an hlauh a sang lova mi state-ah pawh tiin kan Home Guard volunteers-te hi tlemteah pawh hian lungawi rawh u, tih hi he sorkar ngaihdan a ni miah lova, kan tlin tawkah erawh chuan min lungawi sak zel chinga tlawmngai an nih avangin he resolution lo lut chungchangah pawh hianin a puluttu a demawm lohva, a thil tum

hi a demawm lohva. Amaherawhchu kan dinhmun zawkah erawh hian kan tlin em tih hi kan enchian ngai niin ka hria a ni. 2002-2003 atanga 2010, 2011 chung, kumkaw chhunga Kan Home Guard volunteers-te kan enkawl na Central sorkarin a re-imburse tur 50% kha min pe lo reng mai a. Chuvang chuan kan buai khawp a, Central lamah hian kan Home Department hotute hian hei vawi duailo an zuk nawr a, cheng vaibelchhe 14 leh nuai 83 hi ala tang a ni. Sorkar hmasain alo rawihna zawng zawng pawh kha re-imburse loh, min rull ve lohva alo la awm avangin. Tin, re-imburse tur a ni tlat mai a central hian a rawih nan hei hi tiin minrawn pe lova, kan neih hman phawt a re-imbursement dil tur a ni a, tunah hian re-imburse loh kha Pu Speaker, kum kua a tang a ni. Chu chu kan buaipui mek a central hian kum engemaw zat kum 4/5 hi chu an buaipui meka tunah hian adang kan sorkar hnua mite pawh hi a ni a, audit report engmah a awm loh avangin chung atang chuan Home Department-a kan hotute hianin hma an han la a, re-imbursement kan hmuh theihna tur hian bultanna a lo la ngai bul ret rawt khawp mai a. Kan sawi tak angkhan kum 2002-2003 sorkar hmasa hun atanga re-imbursement lo awmlo a ni a, tunah hian kan buaipui a ni.

Chutih lai chuanin kan harsatzia leh cheng vaibelchhe 14 leh nuai 83 hmulet lova harsa taka kan la din lai hian kan sorkar duh dan angin member zahawm takten resolution-te putlut hial a inrawn duhsaknate nen pawh inmil vekin Home Guard Volunteers-te dinhmun chawisan kan duhna avangin tun dinhmunah pheichuan anmahni kan enkawl nana senso 70% vel hi state-in kan tum ta a, central-in arawn pek tur tak pheichu 30% vel chauh a ni, kan phurrit hi kan tisang zel a, kan sen ang ang a zatve anrawn re-imburse zel ang tih kha a ni miahlo a ni a tak takah chuan.

Chuvang chuanin, kan dinhmun kan phaktawkah chuan Pu Speaker, an phutaw kang leh an phutaw aia nasain kan enkawl tihna ni miah lovin tunah hian kan phaktaw leh kan tlin tawh, kan sum dinhmunin a phaktawkah chuan Home Guard Volunteers-te tan hian theihtawp he sorkar hian kan tipuitling ang a, kan phak chinah chuan kum khat emaw, reilote chauh he hamthatna hi an la hmang a ni a, thui pawh kan la kal hmaa a aia sang lehzuala lawnchho zel tura duhsakna, duhsaklo pakhatmah member zingah hian an awm ka hre lova keipawn Pu Speaker, ka duhsaklo miahlo a ni. Anmahni tlukpui hi mi tam tak Rs. 20,000/- chuang hlawh pawh an awm ang, anni aia hahdam hi Rs. 30,000/- hlawh pawh an tamin ka ring. Chuvang chuanin a duhsak zawngah te, an tangkaina zawna thlir chuanin Work Charge aia sanga dah pawh hi a phutuah chuan an phutah, kan duhsaknaah pawh kan duhsak vekin ka ring a ni. Mahse, Pu Speaker, ka sawi tak angkhan kan dinhmun leh reimbursement thute rin aia alo harsatzia hi kan sorkar ngeiah pawh a hmawr kan han hmu chhova, kum tam tak kalta chhung a mi kha hmuhlet tumin, a bul atangin, audit report atangin bul kan han tan a ni a, phur hi ala rit rih em a, chuvang chuanin ka hmaa member zahawm takin a sawi angkhan kan dinhmunin a tlina tlema kan inthianfai deuh hlekte anih loh chuanin anni kan Volunteers-te pawhin min lo hrethiam em ang a, Resolution neitu pawhin sawi tak angkhan 'Work Charge' tih thu lai takah phehi chuan tuna an nih ang anga Work Charge-a dah te phehi hi chu a rem hauh lova tih chu ani pawh a hrechiang bertu tur a ni a. Mahse sawi tak angkhan sorkar ve reng ruang chuan tihdan tur an hria aniang chu maw an pulut dawn tlat mai tih hriain kan pulut ve a ni e, a ti a nichina a move khan chiang deuhin arawn sawiin ka hria a, chu chu a dikin ka ring a. Engtin emaw a tihdan tur hria a, engemaw tih tum kan ni a hriat anih chuan an duhsakna anrawn lantir hi member zahawm tak tu pawhin an tih theihah ka ngai. Chu chu inthlan a hnaih vangah pawh ka zuk puhsak chiah lova,

a bial chhungah an hmunpui a awm avangin a tihtur takah pawh ka ngai tho mai. Amaherawhchu, sawi tak ang khan keimahni lamah khan khatiang khan kan Leader-te pawhin thu an lo sawi ru ve se se a, hei hi chu zawh loh nghawngkawh kan inbat thut ang e, thil tih theih loh tawpte ni dawn riauvin a lang mai a, lunglohvah la lo ila hei hi chu a chhuak anih pawhin a sawiho chi vak lovang a, te an lo tih ruk deuhte anih avangin tunah pawh hian anih ang anga pawm hi thil theih loh a ni a. Nichina kan member zahawm tak Pu Speaker, i veilama mi thenkhatin 'helama mite putluh anih vang ringawta nangni pawn tih in tum tho min han hnial leh vak si hi chu' an tih kha chu a ni chiah lo a ni tih ka'n sawi lang pah ve hrim hrim anih chu. Hun tha tak min pe a Pu Speaker, i hun min pekah hian kan Member zahawm tak Pu Lalduhoma resolution "Mizoram Home Guard Volunteer zinga Skilled I chinte hi Work Charge-a dah ni rawh se" tih hi anih ang ang leh tun kan dinhmunah hi chuan han pass-pui mai chi a ni rih lovang a tih chu ka ngaihdan a ni e, ka lawm e.

*Speech not corrected

SPEAKER : Pu H. Zothangliana.

Pu H. ZOTHANGLIANA : Pu Speaker, hun min pek avangin ka lawm e. Home Guard-te hi an thawkrim a, an duty-ah an rinawm tih hi keipawh ka hmuh dan a ni a. Hman kuma MNF Ministry hunlaia Lawngtlai State Bank rawk anih tum pawh khan duty kha Home guard a ni a, huaisen takin alo kap let ve nghe nghe a ni. Tiang chuan an duty-ah hian an rintlak a, an rin ngam awm khawp ni pawhin ka hria a. Chuvangin sorkarin a theih ang chin china a duhsak let ve hi an phu khawpin ka hria. Chutihruah chuan Member zahawm tak Pu Lalduhoma resolution "Mizorama Home Guard Volunteer-te zinga Skilled I chinte hi Work Charge a dah ni rawh se" tih hi a tum chu a thain ka hria a. Nimahsela, tilaia resolution-a a rawn putluh ang ngau ngau hi chuan pass chi niin ka hre lo ve hrim hrim a ni tih hi ka rawn dinpui duh a ni. Member zahawm tak Pu Duhoma ngei pawhin a rawn move laia a sawi ang khan sorkarin engemaw tak tihsak an tum a ni ang tih ring chungin he resolution hi a rawn pulut a ni a, tih theih chu nise thil tha tak pawh niin ka hria. Kum khat vel liam ta kha niin ka hria a, a hun chiah ka Chiang ta lova sorkarin file kal tirin Home Guard-te an lawmman tihpun sakin hamthatna eng eng emaw te a pek belh dawn a ni tih hriain resolution chutiang ang lam hawi chu a rawn pulut chawt a. 'Kaptu chan' chan dan a thiam khawpin ka hria a, a bial chhungah anmahni, Home Guard te hi an tam bawh avangin a lawmpuiawm ni maiah ka ngai a. Tun tumah pawh hian amahin a rawn sawi ang khan Ruling Party lama Member zahawm tak Pu Pianan a pulut a, mahse ballot-ah a tla ta hlauh a ni tih a hriat khan a ziak chawp nawk nawk a, a theh lut ve ta mai a ni tih member zahawm tak thiante atangin ka hria a. Chuvangin sorkarin eng emaw tak tih a tum leh a, 'Kaptu chan' chan remchang lai tak a ni leh dawn e a tih avangte pawh a ni mai thei a. Chumi piah lamah chuan a duhsaktute zing ami hi chu a ni ve hrim hrim tih erawh chu a phat awmlahin ka hria a. Engpawh nisela, theih ni se kan sum dinhmunte hian zir chu ni se an thawhrim dan te, an hnaa an inpek zawh ziate ngaihtuah hi chuan duhsak an phu a. Dinhmun tha zawka hlankai zel hi an duhsakawm em em a ni tih ka ngaihdan a ni.

Chutiang deuh bawh chuan entirna atan han sawi ta ila PHE-ah te pawh hian M/R tam tak kan nei a, Contract Worker tam tak kan nei bawh a. Kan M/R te hi a thawkrim hlei hlei, chhun leh zan pawh thliar hrang hlei thei lova kan chhawr te, sorkarin a chhawr te an ni a. Duhsak an phu khawp a, kan duhsakna rilru atang chuan kan M/R zawng zawngte hi regularized ni sela, sorkar hnathawh pangngai ang hlauh pek ve ni rawh se han tihna tur khawp hian an thawkrim a ni. Chutiang ang rilru chuan duhsakna an lakah pawh hian kan pu

a ni. Nimahsela chu chu induhsakna a ni mai a, a tak ram chantir turin kan sum dinhmunin a zo lo a ni, kan la tlin lo a ni tih erawh hi chu patling chinte, a bik takin a hminga MLA han ni chinte hi chuan kan hrethiam tlangin ka ring. Chutiang ang reasoning zul zui chuan kan Home Guard Volunteer-te pawh hi kan duhsak chungin, kan sum dinhmun hi chuan tun aia hamthatna dang han pek belh zel hi chu ala tlin lo deuh a ni tih hi kan hai lo tlang turah ka ngai a. Amaherawhchu, Member-te privilege anih angin Private Resolution kan pulut thei a, kan duhsak thu hi House a sawilan ve hrim hrim pawh a tha e tihna rilru a, he Resolution lo lutte pawh hi a ni turah han ngai ta ila ka ti a ni. Chutih rual chuan, thuthar tehchiam dang han sawi tur a awm tam lutuk pawhin ka hre lova. Pu Speaker, kan Member luangliam ve thei tak tak, hun dil belh ngar ngar thintu che ho pawh kha vawiin-ah chuan, an hun i pek pawh an hmang zo lo tlang a, chutiang vel chu a ni a. A ngai leh ngai khan kan sawi hlawm a.

Kawng dang deuhhleka ka ngaihtuahnaa thil awm pakhat chu 'Mizoram Home Guard Volunteers ho zinga Skilled – I chinte hi Work Charge-a dah ni rawh se' tih hian a tum ni thei awm chu technically a zuk chhut chuan, heng volunteers-te tan hian vacant post-ah Police Department-ah te, Excise & Narcotics, Environment & Forests leh Prison-ah te 10% te, 5% te reservation siamsak an nih ang hian works nei deuh PWD te, PHE te, P&E-ah te hian reservation siam thar sak ve ila. Chutah chuan, Work Charge-ah i hnawhlut ve ang u a tihna emaw ni dawn zawk le ti te pawhin a ngaihtuah theih a. Chu chu a ziak ang ngau ngau a kan zuk interpret sak dawn chuan a kawh tur ni ber chu a ni maiin a lang tlat a ni. Chuti a nih loh chuan, legally chuan he Resolution hi tu Sorkar tan mah tihpuitlin theih niin a lang loin ka hre ve deuh a ni. Kan duhsak em a, Work Charge angah hian i dah ve teh ang u, hlawh tihtlak deuh te pawh nei ve sela, hamthatnate pawh tun aia tam zawk hi nei ve rawh se tiin PWD te, PHE leh P&E te leh Department dang works nei thin deuh hoah hian reservation i siamsak ve ang u ti zawnga kan kalpui dawn a nih chuan, a kawng a la kual thui deuh dawnin ka ring a. Chu mai bakah chuan, kan Sorkar hna ruak, vacant post kan neih hote hi nichina kan sawi ang khan kan sum dinhmunin a tlinloh avang zelin duh angin kan hnawhkhat thuai thuai thei lo a ni a. Chumi piahlamah chuan a vacant post zawng zawngah volunteers-te hi hnawhlut huk ang tih kha chu thil theih a ni lo lehzal a. Vacant post atanga za zel a panga te, za zela sawm te Department thenkhatah hnawhlulh theihna chance kha a awm chauh a ni a. Chung ang te te chu Dan kan siamthar a, a kawng kan sial thar a, Department dang Works neiah hetiang hian remchang i siamsak ang u kan ti a nih pawhin, a inngahkhawm chhung a rei duh awm hlein ka hria a. Chutiangte chu thil awmdan a nih teh nuaih avangin, he Resolution hi induhsaklohna avang ni hauh lovin, kan duhsak em em chungin pass theih niin ka hre lo a ni.

A thu hrim hrimah kan Finance Minister zahawm takin a sawi ang khan, tun dinhmunah chuan Mizorama kan Non-Plan Expenditure pumpui atanga chhut hian, kan Sorkar hnathawkte hlawh lama kan pek hi za zela 70 vel zet a ni a. Chuvangin, Sorkar hnathawkte emaw, volunteer te emaw, MR te emaw, Work Charge te emaw hlawh emaw, lawmman lam emaw tihpun zel lam hi chu kan Sorkar hian a tlin lo a ni tih te pawh hi kan hriatchian sa a ni mai a. Chuvangin, kan tlin ang tawka kan induhsak theihna-ah hian lungawi hram hram i tum tlang ang u ti a rilru kan siam tlan te pawh a ngaiin ka hria a. Tun hnai deuhah khan Sorkar hnathawkwawl, mi tlemte intelkhawmin hamthatna tam zawk an duh avangin nawrh leh eng emaw te an han huaihawt a. Khangte pawh kha kei chuan thil tihawm niin ka hre lova. Kan sum dinhmun hi min hriatthiampui a ngai a ni. Hmanni kan sawi tawh ang deuh khan, sa bel sawm kan chhuang a, sa bel sawmah a fatu-te'n bel sarih kan hui a. Sorkar hnathawkte'n kan ei zo vek a, bel thum hi kan ei zo vek a, bel thum(3) hi mipui nawlpuiin an kil tura kan zuah chu a ni, tih ang vel hi tuna kan dinhmun anih avangin Home

Guard-te hamthatna tihpun zel hi an phu, an duhsakawm a ni kan tih rualin kan dinhmun hian ala tlinlo deuh a ni tih hi Pu Speaker, ka ngaihdan a ni e. Ka lawm e.

SPEAKER : Awle, phar kan awm tawh lovin ka hria a, ekhai...tinge phar tlai ve? Pu Joseph Lalhimpua kan ko vanga, adawtah Dr.R.Lalthangliana, chumi dawtah chuanin a concern Minister lam emaw House Leader emaw kan koh a tul ang a. Chuan, chumi dawtah a mover kan koh a ngai dawn a ni. Tunah Pu Joseph Lalhimpua.

Pu JOSEPH LALHIMPUA : Pu Speaker, ka lawm e. Member zahawm tak Pu Lalduhoma, kan senior-ina resolution a rawn putlulh "Mizoram Home Guard Volunteers zingah Skill-I chinte hi Work-charge-ah dah ni rawh se" tih hi a zarzotu turte tan chuan a lawmawm hlein ka ring a. Tin, kan senior member pawhin rilru thianghlim tak pua a rawn putlulh anih ka ring a. Tuna a sawi ang khan vanneihthlak takin sawiho tur zingah a hmasa berah pawh fuh a ni leh ta a, a vanneihthlak hlein ka hria a. Hei hian helai rorelna sangbera thute dinhmun a rawn tifiain ka hria a. Khawilamah emaw kan thu emaw pawh nisela ram tana rawng kan bawlina hi a tichiang hlein ka hria a, a lawmawm hlein ka hria a ni.

Mizoram Home Guard te training-na CTI Sesawng ah khian ka han kal ve zauh zauh a. Nichinah khan kan member zahawm tak, a enkawltu ni bawk Parliamentary Secretary khan a rawn sawi tawh a. A thianghlimin a fai khawp mai a, tin, kan naute ho hnen atanga kan han hriat dan pawhin an invawna leh an training-na hmunte pawh a tha thawkhat hle a ni tih kha a hriat a. Chung chuan thingtlang mite, khawpui mite lehkha thiam deuhle leh thiamlo deuh te pawh discipline tha tak hnuaiah khua leh tui tha, midangte tana tangkai, sorkar tan chauh nilo midangte tanpui theitu tura volunteers tha tak a chherchhuak thin a ni tih kha waviinah hian ka thil hriat tlemte atangin a takin ka hmu niin ka hria a. Chu chu Pu Speaker, kan ram mipuite pawhin an hriat atan helai hmunah hian kan han tarlang ve duh a ni. Ka ngaihtuahnaah chuan kan Home Guard Volunteers te hi, resolution-ah hian Skill-I chinte hi Work-charge a dah ni rawh se tih kha duhtusam tha tak anih laiin, a harsatna leh sorkar dana a tih theihloh dante kan Home Minister zahawm takin a rawn sawi tawh a. Member dangte pawh khan an sawi a, Pu Speaker, khalam pang kha chu ka sawi chhonzawm ve tawhlo vang a.

Amaherawhchu, tawitea hemi remchang laa ka han sawi duh chu kan Volunteers te, Home Guard te leh kan trainers te, kan trainee te pawh hi skill development lamah te, trade hrang hrangah Industries hnuaia a ni emaw Labour & Employment hnuaia a ni emaw hengah te hian thiamthil tha tak zirchhuak thei tur hian hmalak dan a awm angem aw? tih te ka rilruah alo awm a. Hei, kan hriat angin Dan bawhchhiatna avanga Jail tangte pawhin Jail tanna hmunah skill tha deuh deuh an rawn zirchhuak a, cigarette bawm atang ringawtte pawhin thil mawi tak takte an siam a. Tin, painting tha tak tak te, thawmhnaw tha tak tak te chutiangan an rawn zirchhuak thei a ni. Chuvangin, anmahni chungchang kan sawiho mek lai hian hetiang duhsakna member-te hnen atanga resolution lo lut, amaherawhchu, sorkarin Dan leh kalphung fel tak kan neih avanga rem silo te, kan sawiho lai hian remchangah kan rawn la ve a ni. Hetiang hi tih theih nisela anmahni leh ram tan hian a tangkai viau ang tihte ka ngaihtuah a. Chungte chu ka rawn tarchhuak ve duh a ni.

Hei, han sawi kai zawk ila Pu Speaker, hmanniah meeting kan neihnaah kan sawilang a. NLUP scheme hnuaia eizawna nghet kan siamna turah te pawh hian khawpuaia awm Industry hnuaia petty-trade thlang tam takte pawh hi Agarbati stick sawngbawlina te, In

lama an lo enkawl ve mai theih turte hi pek ni ta sela. Chu chuan ram development leh anmahni inkhaichhuahna, eizawna tha zawk, additional source te pawh a siam thei ang a tihte kan sawiho a. Chumi ang deuh chuan Home Guard a awm mekte pawh hian hetiang Skill development an training theihna tur hi sorkar hian remchang han siam sak sela chuan anmahni tan pawh, an chhungkaw tan leh ram tan pawh hmasawna a ni thei ang, tihte ka'n ngaihtuah a. Chungte chu ka'n sawi a ni.

Tin, Pu Speaker, ka ngaihtuahnaa thil awm pakhat, hei workcharge a dah ni rawh se tih nichina kan Home Minister zahawm takin thil tha tak a nih zia leh sorkar dan atanga a theih loh zia a rawn sawi lai khan ka ngaihtuahnaah a awm a. Hei, kan nu leh pa, kan pi leh puten Mizoramah chuan Mizo naupang te, Mizo nausente kan inawih danah an tah deuh te, engemaw inawm nikhuaah pawnah an han thuchhuak a, an han pawchhuak a, thla eng te, thla bial te an han en a, 'thlapui, lo tla rawh, Mapuia'n a awrh nawlh nawlh ang che,' an ti a. Nau tap te pawh an nui uar uar a ni tih te an han sawi a. Tin, hei kan member zahawm tak Pu Chatea hian, 'Bairabi pawh ka sawi tha duh tawh lo, kan sawilan hian in hmalakna hi sawilan a ni zel mai si, Power lamah hma in la nasa si a,' tih te pawh a sawi lang a. Chuvangin kan member zahawm takin, 'sorkarin tih a tum tho niin ka hria,' tia sorkar lawnga chuan a tum te pawh kha a demawm hran lovin ka hria a. Pu Speaker, chungte pawh chu ka'n rawn sawilang a.

Tin, Pu Speaker, han sawilan takah chuan Security chungchange pawh hi sawi tel a thain ka hria a. Nichinah khan kan Parliamentary Secretary zahawm tak, member zahawm tak khan a sawi tawh a. Kan Home Guard te hi an hah khawp mai. An duty state dangah chuan kha kan hria a, Seven to Nine hours te an lo duty thin a. Kan ramah erawh chuan mamawhna leh indaih lohna avang leh anmahni sorkarin kan rin tawkna te, mipuiin kan rin tawkna te pawh a ni ang a, chumi avang chuan 24 hours duty in kan Bank pawimawh te, kan hmun pawimawh tam takah te hetiang hna hi an thawk a ni a. Chuvangin Home Guard volunteers-te hian hetiang zahawmna, chawimawina te pawh hi an phu hlein ka hria a. Chungte pawh chu kan ram thalaite leh kan ram mipui hrim hrimte pawh hian ram tan an inpeknate hi wawinah kan hriat nawn lehna atan te pawh sawilan a remchangin ka hria a, ka han tarlang duh a.

Pu Speaker, hmanni lawkah Olympic hawna inkhawm an nei a. Chuta thusawitute zinga mi chuan Volunteers te avanga Olympic ropui tak mai nei thei an nih thu leh an beisei thute an han tarlang a. Chutiang bawkin khawvel huap intawhkhawm, infiamna leh inelna hmun hrang hrangah hian Volunteers te chawimawina hun hi an lo nei thin a. Kan ramah erawh chuan thalai tam tak zingah thalai thenkhatin Home Guard-te ehniamna deuh te leh anmahni tan pawha hriat nuam mang lova tawngkauchheh te hi kan nei thinin ka hria a. Helaijah Mizoram Rorelna sang berah hetiang anmahni tana duhsakna kan sawilan rual hian an hnathawhnate hi volunteers an nih anga ram leh hnam tana an hnathawhnate pawh hi wawinah hian chawimawi an phuin fak an phu hle a ni tih hi kan hriat nawn leh pawimawhin ka hria a.

Engpawh nisela, Pu Speaker, member zahawm takin Resolution a rawn putluh hi thil tha tak, anmahni tan te pawha tangkai tak tur niin a lang a. Chutih rualin kan ram dinhmun te, kan ram inkaihhraina leh kan inrelbawl dan te nen hetiang workcharge-a dah dan a awm lo a ni tih kan hotuten an sawi tawh a. Chuvangin hei hi chu tun tumah chuan tihhlawhtlin rih loh ni mai sela, tih kha ka rawn sawi duh a ni e, ka lawm e.

SPEAKER : Le, tunah chuan Dr. R. Lalthangliana.

Dr. R. LALTHANGLIANA : Pu Speaker, ka lawm e. Kan Resolution hi a pawimawh khawp mai a. Pu Duha hian a tihtur dik tak a rawn ti niin ka hria a. Ama awmna veng leh a Constituency ami a hrechiangtu, tin, helam pang Service, Force lamah kan senior officer hun rei tak lo ni tawh thinin leh a hrechiangtu dik takin a rawn pulut hi a tihtur dik tak a niin ka hria a. A chungah pawh lawmthu ka'n sawi duh hrim hrim a. Thu kan sawi thiam viau mai a, hei. Term tawp lamah chuan kan han sawi tak tak chuanin Home Guard kan han fak tak tak kha a ropui a. Amaherawhchu, ka rilrua thil lo lang, Pu Speaker, Bible chang thu chu, 'Unau te u, thu chauhin i inhmangaih suh ang u, thil tih leh tihtakzetin i inhmangaih zawk ang u,' tih hi a lo lang a. Helaia thua kan va fak kha a tha. Amaherawhchu, Pathian thuin a ngaih pawimawh lai tak, a taka an harsatna tihhlawhtlinna tur atana phuhrukna lampang kha a tawpah khanin kan han sawi zuzi leh laia erawh kha chu a fel lo deuh mange ka ti a, chu chu ka'n sawi lawk duh a. Chuvang chuan MLA zahawm tak Pu Duhoma han putlul hi vawiinah hian tihhlawhtlin dan kan ngaihtuah chu a pawimawh hle a ni.

Kan Home Minister khan nidanga a tih loh ang takin a department chan lam a ni a, a rawn sawi hmasa a, a rawn hmin viau dawn emaw ka ti a, hei kan ngaihtuah lai mek a ni a, file a kal hi a lo hre ru a niang a ti zawng te khan a rawn ti a, lo kal mek pawh ni tehreng sela kan duhna khatianga infawkkhawm tlang ni bawk si. Tin, Pu Piana khanin tunhmain an lo thehlut tawh thin tih an hriatna zawng zawngte pawh kha rilru hmunkhatin, ngaihtuahna hmunkhatin kan awm dawn emaw kan tih lai meka a tak tak rama kan lut leh thei silo kha a fello deuh mang e ka ti a. Pu Speaker, kan resolution hi kan en thin a vawiina kan tih tur hi ala tam viau mai a, dar lah chu kan ngah tawh lova. Ka'n en a 'lawmawm kan ti' tih ringawt hi pasarih a awm a, kan resolution-ah hian, a tha thova, lawmthu chu kan sawi tur chu a ni a. Amaherawhchu, lawmthu sawi ringawt maia nileng hman kan nilova, tianga resolution tha tak mai lo lut hi a thain ka hria.

Tin, hei sorkar hmasa hunlai pawh khan Home Guard hi a ngaipawimawh a, sorkar kha a muthlu lo a ni tih hi ka sawi ve duh hrim hrim a. Dik tak chuan 1989 bawr vela sorkar kumtawp lamah khan a lo intan ve kha a ni a. Sorkar hmasa ti mai ang kan hmalamah pawh khan theihtawpin tan an la thovin ka ring a, sorkar hmasate khan MLA kha kan ni thin a, ka lo chik vak lova. Amaherawhchu, kan han sorkar phat khan 1999, 2000 bawr vel khan, nitina an hlawh hisapa pek a nih khan khatih hunlai khan Rs. 1500 chiah an la a ni, mahse khami kum khan a letin tipung ang tiin kan sorkar khan tan an la a nikhatah Rs. 100 in a tipung a ni a letin, 100% in a tipung a ni, tahchuan Rs. 3000 pek an ni daih tawh a ni. Chuan hemi kum vek hianin thlatin Rs. 12 chiah washing allowance la thin kha a let hnih aia tam fein Rs. 25 in kan tipung a ni. Chuan 2006-2007 khan an hlawh allowance nitina Rs. 100 thlakhatah Rs. 3000 atang khan nitinin a hnu lawkah Rs. 125 nikhata hisapin thlakhatah Rs. 3780 pek an lo ni tawh a ni 2006 bawr vel khan. Chuan kha bakah washing allowance pawh Rs. 25 atangin a hnu kum thum emaw lekah khan Rs. 50 in sorkar hmasa khan a lo tipung tawh a. 2007-2008 ah an hlawh nitin Rs. 126 atangin Rs. 143 hisapa thlakhatah chhutin Rs. 2490 pek an lo ni tawh a. Tin, heng bakah hian Pu Speaker, trading allowance pawh tihpun kha a ni tho a ni sorkar hmasa hunlai khan, a letin a ni ve tlat. Mess allowance te hi Rs. 20 ni thin kha Rs. 50 a tihpun a ni a, chuan out of packet an ti a Rs. 20 ni thin kha Rs. 25 te

pawn a pung ve thin bawk a ni. Tin, heng bakah 2006-2007 khan mess allowance Rs. 50 atangin Rs. 70 ah, out of pocket tih Rs. 25 atanga Rs. 50 ah. Tikhan a ni, amaherawhchu vawilehkhat a jump sang em em erawh chuan a theih bik lova, heng kan Home Guard, kan volunteer kan tih te hi heng minimum wages sorkarin a siamthat ang zulzui te pawh hian ngaihtuahna sorkar hmasa khan a hmang ve thinin ka hria a, training tha tak nei, duty pawimawh tak tak nei an nih avang hianin kan ngaipawimawh a. An mawhphurhnate kha kan sawi a, a ropui khawp mai a.

Nia, rinai hian Home Guard han tih khan mawhphurhna hi an lo la sang em em mai a, bank hrang hranga duty tih te, traffic police hi an pui nasa khawp mai a. Tin, FCI kudam hrang hrangah te pawh hian an veng thinin ka hria a, Power House-ah te pawh an duty thin a, D.C. office leh an residence-ah te pawh duty an ni bawk a. Tlem lai deuh khanin Lengpui Airport-ah hianin kan sorkar lai pawh khan kan duty tir thin a, Central Jail leh District Jail-ah an duty bawk a, tin, sorkar House kan neih thenkhatah te pawh hianin heng Chakma House angah te pawh hian an duty thin a ni. Tin, Radio station leh medical store thleng te pawhin kan pawtpeng nasa em em mai a, mawhphurhna hi rin aiin an la nasa a, hlen pawh an hlen tha viau a ni. Sorkar hmasa hun lai khan fak thil pawn ka sawi chuang lova, anmahni awmna ngai ngawt ngawt a Home Guard-a an awm hian an future han ngaituah hian eng hi a awm lo lutuk, nupui pasal nei, fate chawm ngai nen chuang chuanin ngaihtuahna sen a ngai a ni kan ti a, chuang chuan IR Battalion, Police battalion angah te pawh 5 % tih te nichina kan ngaihthlak ang khan Department hrang hrang angah te pawh an quota bik te pawh siam a lo ni a. Chuvangin vawiinah hian chumite chuan an titha bik tih pawh a theih em em bik lova. Hei Pu Duha hian kawng lehlamah chuan inthlan dawn avanga rawn ti ringawt tih kha ka pawm lem lova, a chhan chu he Home Guard tana resolution a rawn putlulh kum kha ka Chiang chiah lova tun term kan thut hlim deuh kha niin ka hria, inthlan kan zo chiah kan han lut chiah kha a rawn pulut nghal mai a ni. Naktuk lawkah inthlan kha a awm dawn lo reng reng tih chu hriat sa a ni a, chuang chuan khati zawnga ngaihtuahna engemaw thil kha a nei lo a ni tih hi Chiangin ka hria a, tun tumah pawh hian Inthlan dawn avang lam niin ka hre lova, ka vei lama mi mah nisela han fak ve hlek ila, a timing hi hre angreng riauva, kum dang zawng zawng aiin kan budget kha dik tak chuan nikum te chuan 13.33 percent a pung a ni a, NLUP tiamin khatiang ang hunah te khan putlulh chu a chak ka ring. Amaherawhchu budget en khan a tih chi lo a ni tih a hria a ni, chuangin kuminah kan plan budget kum dang zawng zawng aia a pun san kum ber kherah hi chuan a ti ve a ni. Kan hotuten kan tlin ngang lo a ni tih an han sawi tliar tliar te pawh kha han enchiang deuh ila chuan kan tlin ka ring a, chuang chuan kan ngaihtuahna kan siam that leh ka duh a ni.

Tin, technically a rem lo a ni kan han tih kha Rorelna sang bera thu kan ni a, an rilru ngaihtuahna an future zel tur skill-I a tawp mai lova an future zel tura security awm tur ngaihtuahna thianghlim tak mai hmangaihna nun nena a rawn rawt ve a ni a chuang chuan a hmingah chuan engpawhnisela kan sorkar hi an chak bawk a lawm le, chuangin siamrem dan kha chu kan thiam leh mai dawn lawm ni. Pu Speaker, a pawimawhna tak chu an harsatna tak sutkian tuma ngaihtuahna dik tak pua a rawn putlulhna zawk hi vawiinah hian a zahawm em emin ka hria a ni. Chuvangin thlawp loh theih lohvah ka ngai a ni.

Tin, Speaker kan House-ah pawh hian ka ngaihawh em em pakhat chu Mizorama sorkar hnathawkte bakah a hnathawk hnuaihnnung zawkte hi an nih dan

tur ang hi an la ni lo a ni. MR kan tih te, Work Charge kan han tih te leh sorkara hlawh la lo ang thleng te pawh Labour and Employment te pawh hian thil kan siam a pawimawh, kan hnuaiah hna thawk sela, lo thi ta se tih thlengte khan ngaihtuah tur hi a tam em em a ni. Tin, pay chungchangte pawh kha an hniam a, tihsan sak tur tih hrim hrim ai pawhin tlemin an tlukpuite tluk lo lutuk ang chi phei kha chu ala awmin ka hria, heng PWD, PHE, Electric Department leh Department dangah te pawh contract basis-a thawk te, MR a thawk te, workcharge-a thawkte tam tak kan nei a. Chumi avang chuan 2008 kum te pawh khan sorkar hmasa khan anmahni regularized-na tur ang chi dante pawh an siam thova, amaherawhchu vawiin thlengin tihhlawhtlin a la ni lova, tihhlawhtlin tumna erawh chu kan sorkar hian nei niin ka hria a, a lawmawm a. Engpawh nisela, mihringin Pu Speaker, kan mamawh chu kan future, kan hmalam zel hi tawp lutuk, thim lutuk engmah kal ngaihna awm tawh lo lutuk a, bul lutuka insiam hi a fel lovin ka hria a. Chumi ngaihtuahna nen vawiinah kan MLA zahawm tak hianin he resolution hi a pulut a ni tih hi kan hriat sak a tha a. Chuvang chuan technical neuh neuh a, a workcharge tih lai min tibuai lovang tih vel hi chu kan rule out thei mai lawm ni? Nakinah helai kan ngaituahna duhsakna tak tak hi a awm a kan pass fel hi chuan helai vel hi chu kan la siam fel mai ang chu mawle. Tih tak emah chuan PWD-ah leh Department dang dangah te pawh workcharge-te chu an awm a ni. Kawng lehlamah chuan a nihna takah chuan kan naute ngei ngei pawh kum 20, 18 te pawh workcharge-in an thawk thawh a, amaherawhchu kha workcharge bik kha chu a tawpna a rei tawh. Mahse kha works-in a ken tel kher lovah pawh khan a Department hian siam rem dan an thiam lutuk ringawt. Chuvang chuan vawiinah hian tih tak takah chuan thil hi kan duh leh duh lohah a innghatin ka hria a. Tih tak taka kan tiha rilru taka vawiinah hian kan duhsak anih chuan tihtheihloh tur hi a awm bik a maw ni le? ka ti a ni. Chuvang chuan he resolution tha tak mai hi keini lam hi chuanin tuna anih ang ang hian tlang sela tih hi kan duh a. Kan rulling lamte pawhin hei hi ngaihdan fel tak neiin min support zawk te pawh a tha lawm ni? tiin ka'n ngen pah a ni. Ka lawm e.

*Speech not corrected

SPEAKER : Pu P.C. Lalthanliana'n a phar naa dar 4:00-ah khian kan ban a tul dawn a, ko lo mai ila, tichuan a concern Minister, tuna kan resolution-in a khawih Minister khanin sawi duh a neih kha rawn sawi se, chutah House Leader-in sawi duh a neih chuan rawn sawi bawk sela. Chumi hnuaiah chuan resolution neitu kan ko vanga, kan buk mai tawh ang.

Pu R. LALZIRLIANA, MINISTER : Pu Speaker, ka lawm khawp mai, nichinah khan ka sawi tawh a, sawilo mah ila ka vui miah lova. Amaherawhchu, hming in lam ve leh takah chuan tawite minute 5 lek han sawi ka tum a. Home Guard te hi kan thalo kan ti hauh lova, an tha em em a. Hei, DC thenkhat te phei chuan anmahni Bungalow a duty tur hian force dang ai chuan duh zawk te pawh an awm a, chutiang anga rawn thlang tlat te pawh an awm a ni. An hnathawh hi an tlin a, tha an ti a. Tin, an rinawmin duty atan hian House Guard-ah pawh an tha em em tur a ni a. Hei kan Minister of State khan a sawi hman ta lova, Mathana pawh hian Pu Nihara hmuh a duh a, an inah len a tum a, an dang tlat mai a, a kal thei lova, an dang tlat mai a ni. Chutiang deuh chuan hei kan Cabinet Minister meuh Pu S. Hiato pawh hi Pu Thawla inah len a tum a, an lo dang tlat mai a, ani chu le a awki a ring ta deuh va, a han insawi chuan anih tak chu an ti a, an chhuah leh ta mai a. Chutiang khawpa rinawm an ni a, Home Guard hi. Chuvangin CRP an sawi ang deuh a ni, hriat hi an nei vak lova, an Puten tumah len loh tur, Pu Thawla khan a lo ti si a, ka puin a phallo a lo ti mai a, an

duty kha a tha em emin ka hria a. Thil tha zawng zawng hi vawikhatah a tih theih vek lova, hei hi a tih dan kawng awm sela chuan vawiina kan resolution hi Home Guard te hi Workcharge a an luh theih nan dan thar siam ni rawh se ti ni se chuan chu dan thar chu siam hmasaka tih tur a ni a. Chumi nilova dan awmlo hnuai workcharge-ah i dah ang tih ringawt hi chu sorkar heti zozai ram hruaituten tih chi a ni lo hrim hrim a. Chuvang chuan hei hi a tih theih rih lovang e kan ti a ni mai a. Unaute u, thu chauhvinn i inhmangaih suh ang u, tih te pawh hi a dik ka ti em em mai a. Kan thusawiah pawh hian kan serious loh zia a langin ka hria a. Engemaw tlema a huihphai lam han chhawnchhah ang deuh hlek hian a sawitu kan Oppositin hotute pawh hian an sawi deuh hlekin ka hria a. Home Guard hi an duty-naah an rinawm a, tlema zuk chhawnchhah mai mai turah chuan ka ui deuhva. Chuvang chuan Pu Speaker, tunah hian khatiang zawng khan ka'n sawi hram a ni. Vawiina kan Resolution hi amend theih chu ni selang chuan amend pawh a tha a. Amaherawhchu, amendment hun kha a tawp tawh bawk si a, kan amend hman tawh si lova, Pass chiah ka ngai lo a ni tih kha ka'n sawi duh mai a ni. Ka lawm e.

*Speech not corrected

SPEAKER : House Leader-in sawi duh a nei em?

Pu LAL THANHAWLA, CHIEF MINISTER : Pu Speaker, Minister concern a lo thlen tawh avangin min ko lo mah la pawh ka ti miah tawh lova. Ani kha a awm loh avang khan ka lo din a tul takin ka'n ti mai a nia. Engpawh nise Pu Speaker, Resolution tha tak a ni a, mite hmangaihna leh duhsakna a ni a, keini lam pawhin kan duhsak vek a ni. A rawn puluttute leh a rawn puituten an support ang tho khan keini pawhin kan support a, kan duhsak vek a ni. Amaherawhchu, a hminga sorkar a awm chuan dan a awm ve a, khalai te kha a harsatna lai chu a ni mai a. Tin, Resolution hi tu putluh pawh ni se kan hotute hi chuan a that dan a zir leh a tul dan a zirin pass pui an hnial miah lo a ni.

Nichinah khan Member zahawm tak Pu Lalduhoma, Resolution neitu khan Pu Piana ta a hmuhna atangin thil kaltlang mai thei tur niawma a ngaih avanga rawn pulut ve ta ni khan a insawiin ka hria a, ka hriat sual loh chuan. Pu Piana Resolution pawh kha lo lut pawh nise vawiina kan Home Minister-in a chhanna ang tho kha a chhanna tur a ni. Khami Resolution kha min rawn entir a, balloting-ah khan a tlang ta lova, pakhatna a ni ta lova, midang kha a ni ta a, kha kha min rawn entir a. Chutah pawh chuan kan Home Minister reaction hmasa ber chu, "Hetiang hi thil tihphung pawh a ni lova, Work charge-na tur a awm loh bakah sum harsatna avangin sum tam zawk senna tur a ni a, a kalphung hrim hrim hi a dik lova" tih kha a sawi dan a ni a. Chuvangin, Pu Piana, Ruling Party MLA zahawm tak a nihnaa resolution pawh ni selangin a nihna ngai ang ang hi chuan tuna kan Home Minister zahawm takin a sawi ang khan a tlang dawn chuang lo a ni. Tin, kei phei chuan, "Hetiang ti turte chuan inrawn lawk tur alawm" ti tein a hnenah pawh ka sawi nghe nghe a. Chutiang chu a ni a. Chuvangin, a Resolution a thalo tih lampang a ni lova. Tawngkam thiam leh zuk inhmangaih siak atanga kal tur chi pawh a ni lova. Kan hre theuh a, helaiah dan kan nei a, a kalphung a awm a, chumi nen chuan a inkalh a ni. Chuvangin, kan Home Minister sawi ang khan 'hetiang work charge-a dah theihna dan hi sorkarin ngaihtuah rawh se' tih ang zawngte ni ta zawk sela chuan ngaihtuah dan te pawh a awm tur a ni a. Tuna a nih ang ang hi chuan a harsa rih a ni, tih hi helam atang chuan kan sawi dan leh sorkar kalphungah a nih dan a ni.

Work charge department dangah PWD-ah te, PHE-ah te leh khatiang neiteah chuan an awm ngei a ni. Tin, khami a project-a kha a zawh hnuah pawh an la awm zel tih ang

te kha chu khami project kha zo pawh ni se project dang an nei zel a, PWD te, PHE angah te chuan tawpintai a awm lo a ni. Chuvangin, khami nen kha chuan hei hi a khaikhin emaw a tehkhin theih chiah lovang tih ring ila. Engpawh ni selangin, Home Guard te an tangkaina te kan ngaithla tawh a. Tunhma deuh te phei chuan traffic duty-ah te kan hmang rim em em a. Kawng engkimah volunteers an nihna angin anmahni pawh an zuan a zang a, kan hmang tangkai em em a ni. Tin, kha an rinawm zia pawh kan hria a, Minister-te pawh a tul loh chuan an dang mai a, khatiang tlat kha an ni a, an tha khawp mai an duty-ah. Amaherawhchu, an that vang ringawt khan tuna kan han duhsakna ang kawng hi chu a kal thei lo a ni tih hi hria ila.

Tin, sorkar hmasa lam atang pawhin kan lo induhsak siak tawh daih kha a tih chi khawp mai a. Khatiang kha kan kal chhoh zel dan tur a niin ka ring a. Tin, an hmunte pawh an vawng thianghlim a. Pu Malsawmliana, Commandant General hmasa kha a fel khawp a, a taima khawp a. Khilai hmun a siamah khian, atira a develop tirh atang khian kan enpui ve renga, PWD-ah contract pe miah loin ama kutah khan kan sorkar khan a hlan ngam a, khatiang khian a chhuah thei a ni. PWD ah contract angin kal ta se chuan a chanve pawh khi a chhuahin ka ringlo, chutiang khawp chuan atir atanga lo buaipuitute pawhin thahnem an ngaia, chumi thahnemngaihna chu Home Guard sipaite pawhin an la chhawm chho zela, waviin thleng hian an duty kawng tinrengah duhsak an phu a, chutiang tak chu anih avangin Pu Speaker, nichinah Home Minister zahawmtakin a sawi tawh a, India rama State zawng zawngah hian a duhsak ber kan la ni hial a ni. Tun ai hian sum dinhmun tha se chuan la duhsak pawh an phu a, mahse kan phak chin bak chu kan phak si lova, tihngaihna a awm lo a. Chuvangin he Resolution pawh hi a tha lo e, Home Guard lampangte kan duhsak lo e, tihna ni miah loin, tunah hi chuan sorkar kalphung nen a inmil lo a ni, tih mai hi a ni. Tin, ka sawi tak ang khan Ruling Party MLA Resolution pawh ni selangin, tuna kan ngaihndan ang tho hi kan ngaihndan a ni a, putluh tumtu MLA zahawmtak pawh kha kan hrilh nghe nghe a ni. Ka lawm e.

SPEAKER : Le, sorkar lam dinhmun kan hre ta a, Resolution neitu sawm ila, sawi tul a tih angte han sawi selangin, chumi a sawi zawhah chuan adopt rawn dil nghal bawk sela, ilo sawm ang, Pu Lalduhoma.

Pu LALDUHOMA : Pu Speaker, keini Opposition MLA-te hian Resolution putluh duh hi kan ngah ve em em a, kan putluh dawna kan rilru ngaihtuahna hruai thin chu “A tlang zo angem, tlang zo lo angem?” tih hi a ni ber thin a. “Kan sorkar, kan ruling lam hian min vote-pui thei angem, min Pass-pui thei angem?” tih hi kan ngaihtuah ber lo thei lo thin a ni. Tlang zo lo tura kan rin hi chu kan thehluh ngai lemlo a. Nichina a thu bula ka sawi tawh ang khan, Home Guard te tan hamthatna engemaw zat tihsak an ni tawh a, keipawh mimal takin ka inthlahrung tawh a, chuvang chuan thil dang han tih leh zel hi chu a inthlahrunawm ka ti a. Chutiang rilru pua ka awm laiin ruling member ngeiin Resolution a rawn thehluh takah kha chuan, huaisenna ka nei thar leh ta a, beiseina thar nen, phur zetin, coma pawh tidanglam lo khan, ka rawn thehluh ve ta kha a ni a, a hlawhtlin ngei beiseina kha ka neih vang a ni a. Resolution dang ho hi chu “A lawmawm kan ti”, tih deuh hlir an ni mai a, hengte phei hi chu, chuti takin kan zuk vei ve em em lemlo zawk a.

Kan Home Minister zahawmtak khan a bul kha a rawn tan a, he sorkarin sorkarna alak tirh session hmasa ber 20th March 2009 ah khan he Resolution hi ka rawn pu lut tawh a, Home Guard chungchang kha, khatih lai khan Cabinet-in a rel fel tawh a, file pawh a

kal vek tawh a ni tih kha chu thu belhchian dawl lo a ni a, Home Guard Association te hian nasa takin an bei char char a sorkar an ko ei thei lova an mangang a, engmah tih ala awmlo, chumi chu a witness leh min hriatpuitu chu anmahni Home Guard-te leh an hruaitute hi an ni. Chuvang chuan, engmah tih a la awm loh avanga Resolution kha rawn pulut ka ni a, min lo Pass-pui tak avang khan thil a kal ta a, a lawmawm a. Amaherawhchu, Resolution kan putluh hnuah pawh khan thui fe chu kan umzui ve leh a ni. Chutiang chuan nawr zui ngai kha a awmchho ve lehzal a ni zawk. A thusawi hmangah khan, khami tuma min lo Pass-pui kha, credit lak ve loh an hlauh vang maia min lo Pass-pui a ni tih kha an rawn sawilang ta a, a lawmawm nep ta deuh riau hian ka hria a. Tin, tun tuma kan han Pass leh tur pawh hi, “A inchhir awm e mai, hmanah kan tihsak a, sorkar lakah tuman lawmthu an sawilo, Pu Duha an ti vek mai”, tih tawngkam te kha kan han ngaithla a. Chuvang chuan, an inchhir viau tak avang khan, “Tun tum chu i Pass-pui lovang”, an ti dawn a ni tih pawh kha alang nghal a, paw ka ti hle mai, inchhir vanga khatia inhnawl sak kha chu. Kei chu Pu Speaker, ka bial chhung a ni a, vei awm pawh ka ni a, “A bial a ni a”, an tih kha ka pawm thlap a ni. Amaherawhchu, Zoram pumpuiah Home Guard-te hi an inzarpah a, an hmunpui ber CTI phe chu Chalfilh biala awm daih a ni. Tin, anmahni zinga mi ka ni a, an adviser ka ni a, kum tam tak chhung ka ni tawh a, ka thenawm khawvengte an ni bawk a, chuvang chuan ka ngaihtuahnaah an lian a ni tih hi ka phalo a ni.

Tin, kan member zahawm Pu Piana khan, “Ka lo thehltut kha ka mawl vang a ni”, a rawn ti ta daih mai a, kha tiang kha a lo ni palh anih pawhin, ni 10 chhung withdraw lehna hun remchang a nei a ni. Party leh Sorkar pawhin an pass-pui loh tur anih chuan hrilh a withdraw lehna hman ni 10 chhung a awm a, tuman an ti lo tih kan hria a. Kan tangdun dawn emaw tih nak alaia, pawhfuh loh avanga han at der ngawt mai kha chu, Kaikuangin chhuanlam a siamte pawh kha min tihre deuh rum rum a.

Tin, ‘Work Charge’ tih hi PHE-ah te, PWD-ah te, P & E-ah te an awm kan ti a, M.R. ai chuan an sang a, an hlawhte a tha a, an hlawh tur hi budget-ah a awm bik a ni, ‘Work Charge’ hi chu an nghet bik a ni, regular lo vekah chuan. Chutiang chuan i dah ve ang u tihna mai a ni a, ‘Work’ tih hi engnge ni Pu Speaker, hnathawh sawina a ni. Vawiinah hian keini pawn he rorel hi kan hna a ni, Sorkar hnathawk zawng zawng pawhin an hnathawh theuh hi an hna a ni, sumdawng pawhin dawrkai kha a work a ni mai. Pastor pawhin pathian thu hrilh kha a work a ni mai a ni. Work Charge tih avanga kut hnathawh kher kher a nilo, tuna work charge kan tih zingah hian Pu Speaker, Peon pawh tam tak an awm, Chawkidar pawh tam tak an awm, kawngkhar an hawng a, an khar mai a ni, lei an lai hranlo. Tin, Clerk te pawh an awm a, Computerist-te pawh work charge an tam, khatianga thil put vu vu emaw lampang kha work charge hian a kawklo tih hria i langin a tha ang a.

Tin, Skilled-II leh I kan han tihte pawh hi engatinge anih leh Home Guard kum 15 chin hnuai lam chuan Skilled-II hlauh la sela, a chunglam chuan Skilled-I hlauh la rawh se tih kha kan sorkar hian a ti thei si? Dan thar a siam miah hleinem, engatinge vawiinah hian dan thar siam a ngai kan tih tak tlat bik? Heta Home Guard Skilled-I kan tihte hi PWD-ah an va chhawrtlak e kan tihna a ni hleinem, an scale sawina a ni, an hlawhbi sawina mai a ni, chutiang scale chuan hlauh la rawh se kan ti a, kan ti tawh a, kan sorkar pawhin a ti tawh a, dan thar a siam lova, harsatna an nei reng reng lo a ni a. Tunah hian Skilled –I chin hi kumkhua a heta tawp ngawt lo hian Work Charge-in awm ve rawh se kan ti leh a ni mai a, kha kha anih avangin Changela sawi bel han tih ang hial te kha chu a ni lo a ni tih hi ka sawi duh a.

Tin, “Thawhtur a awmlloh hunah an tawp mai ang”, tih hlauhna te kha a awm a. Pu Speaker, khawvel a tawp hma chuan Home Guard hna hi a tawpin ka ring lo. An thawh tur hi a awm reng ang an work hi chu. Chuvang chuan work-charge a kan dah avanga an hna an bansan hlauh kha chu thil intu lo tak niin ka hria. Vawinah hian Pu Speaker, kan sawi duhdan a inanglo ni maiin ka hria a, a harsa zawnga sawi duh an awm a, a awlsam zawnga sawi duh kan awm ni maiin ka hria a, kan rilru put hmang ni maiin ka hria a.

DAH tih tawngkam te kha an han sawi lang a, nia, hmanah khan nuhza siam nan min hmang thin a, mi fiamnan tak an hmang thin kha a ni a. Tunah rih chuan, “A lo theih reng a lawm maw le”, tiin, “Mipui chanai chu kan dah ta e”, an ti leh tawh anih hi maw le. 6th Pay te pawh kan han ti a, kan dah a, an la mai a ni.

SPEAKER : Ngawirawh aw kan hun a tawp a, i zo lawk ang aw.

Pu LALDUHOMA : Aw le, Pu Speaker, ka zo tep e. Hei kan sorkar hnthawkte pawh hi, “70% an hlawh a kal a, bel sarih hi an eizova, bel thum mipui chanai an rawn chhawpchuak” an ti an ti mai a, hei hi ngaihthlak nuam ka ti lo. Dik tak chuan kan GSDP kan en chuan 60% hi service sector atanga lo kal a ni. Kan GSDP tipungtu an ni, kan dawrkai zawng zawng pawh hi sorkar hnathawkte hlawh a dawrkai an ni. Thlatawpah an inhralh thei hleinem, kan sorkar hnathawkte hlawh hi kan ram economy siamthatu a ni a, development-ah pawh kan sorkar hnathawktute hi kan chhawr em em a, an inthlahrunna tur helaia tawngkam kan hman te pawh hi a tha ka ti lova. NLUP-ah te pawh chhungkaw nuaikhat leh singnih tan cheng nuaikhat theuh kum nga chhungin kan pe dawn an ti mai a, an dah mai a, an duhna lamah chuan. Amaherawhchu cheng nuaikhat theuh hi kum nga chhung hian an pe kim hman angem? chu chu zawhna liantak chu a ni a. Bible-ah khan Pu Speaker, mi pakhat kawchhungah nuai hi a lut pek a, mi kawchhunga luh ching a ni a, nuai hi, Lal Isua khan a hnawtchhuak ta daih a nih kha. Tunah hian Work-Charge dinhmunah hian lo dah ta tehreng ni ila Pu Speaker, Grade-IV regular post pawh hi an la tluk dawn lo a ni. A tam lo a ni kan thil sawi hi. Tin, an hmanrua han en ila, Police-te nen an danglam miah lo, silai tha an keng ve vek tho. Chuti chung chuan an hlawh a inthlau hle a nih hi. Chuvangin thil ropui kan sawi reng reng lova, a la nep lutuk a ni, an dinhmun atan hianin. Chubakah kan sorkar hnathawk tam berte hian sorkar tan pawisa rawn thawh let an nei lem lo, Professional Tax tih mai mai bak chu. Home Guard te chuan an thawk chhuak reng a ni, thlatin nuai tel an thawk chhuak reng a ni, an hlawh tur hi an intum ve a ni thui tak chu. Kan va deploy-na amite khanin an hlawh an pe reng a, kan deploy tam poh leh pawisa an rawn thawh hnem dawn tihna a ni a. Chuvang chuan midang aiin an tangkai bik a ni. Kan sorkar a hausa a budget tha ber neih kum a ni e te an ti a, chuti a nih chuan ka ti deuh a. Nizam of Hyderabad te pawh kha ka hre chhuak a, a hausa em em a a uikawm lutuk an ti a. Mi hausa tak uikawm takte pawh kan ang palh a nge. Chuvang chuan Work charge hi chu i ui lovang u. IR Bn. te kan din a, kan inseng nghek nghek a, chu ai chuan Home Guard hi tiphuisui zel ila work charge mai ni lovin regular force-ah te dah ila, kan thatpui daih zawk ang. Khi Bawktlangah te ram zau tha lutuk an nei a, develop tlak an ni, hmunhma pawh an nei tha a. Chuvangin, hei hi induhsakna sangah ka ngai lova, a lungchhiat thlak zawkin ka hria a. Ka Resolution hi a englamah hi tihdanglam pawh ka phal lo a ni. Pu Speaker, a nih ang ang hian min pass pui turin ka sawm vek a ni e. K lawm e.

SPEAKER : Awle, Resolution neituin a rawn sawichiang lehzuai a, zau zawkin a rawn hawl a, a bengvarthlak a, a hlimawm hle a. House pass-pui turin min rawn dil a, kan buk ang a, “Mizoram Home Guard volunteer zinga Skilled I chinte hi Work Charge-a dah ni rawh se,” tih hi adopt remti apiangin remti ti ru le. Remtilo kan awm chuan ‘remtilo’ ti

rawh ule, voice vote-in remtilo lam a tam zawk deuh tlat mai. Awle Resolution “Mizoram Home Guard zinga Skilled I chinte hi Work Charge-a dah ni rawh se” tih chu House-in a hnawl ta rih a ni. Vawiina kan business chu kan lo duh tawk ta rih mai ang a, a dang kan la tawh lo ang a, khi minute nga laiin kan pel tawh a, kan chawl tawh anga, naktuk ni 2.8.2012 Nilaithawhtan zing lam dar 10:30-ah kan thukhawm leh dawn nia.

Sitting adjourned at 4:05 P.M.